

Siunnersuummut nassuiaatit

Nassuiaatit nalinginnaasut

1. Aallarniut

1.1. Siunnersuummut pingaarnertut tunngaviusut

Siunnersuut pingaarnertut isigineqassaaq tunuliaqutaralugu paasinnineq Kalaallit Nunaanni ilinniartunut inissianik ingerlatsineq aalajangiisuusumik pingaaruteqartoq piginnaangorsaaviumik ilinniartitaanerni, innuttaasunut namminernut ataasiakkaanut, aammalu inuiaqatigiinnut ataatsimut isigisumik pingaaruteqartumik. Ilinniagaq pitsaasoq suliffeqalernissamut inuiaqatigiinnilu peqataanermut aqutissiuussisussaq innuttaasunut namminernut ataasiakkaanut inuiaqatigiinnullu pitsaasumik qularnaveeqquisiuusarpoq atugarissaarnermut aamma toqqissisimanermut. Ilinniartitaaneq, suliffeqarneq aamma aningaasat isertitat inuiaqatigiinni atugarissaartuni aalajangiisuusumik inissisimapput, ilutigisaanillu ilinniagaqarneq annikinnerulersitsisarlungi inuttut inuiaqatigiit avataanni inissisimalernissamut, taamalu aamma isumaginninnikkut ikiorsiissutit annertusiartornissaasa pinngitsoornissaanut. Inuiaqatigiillu tamatumunnga atatillugu inuit ilinniagaqarnissaannik soqutigisaqaannangillat, kisiannili ilutigisaanik pingaaruteqartumik ingerlatsisutut inissisimallutik, aaqqissuussinermi, neqerooruteqartarnermi aqutsinermilu suliassaqarfimmi tassani, taamalu nunami nunatsitut ittumi inuiaqatigiit siammasissumik nunassiffigisagaanni aamma ilinniartunut inissiat ilaallutik.

Aamma Naalackersuisut 2018-imut Ilinniartitaanermut Pilersaarutaanni II-mi takuneqarsinnaavoq Naalackersuisut 2017-imi ilinniagaqarnersiutit aamma ilinniartut ineqarfiinut ineqarnermut akiliutit aaqqissuusseqqiffigalugit sulinermik aallartitsisimasut, taakkulu aqutigalugit ilaatigut ilinniagaqarnersiutinut ilinniartullu ineqarfiinut ineqarnermut akiliutinut tunngatillugu akinik iluarsiiernerit aningaasarsianillu iluarsiiernerit ilanngunneqarumaartut. Naalackersuisut aalajangersimapput tamanna siunissami inatsisitigut naleqqussaannermi ilaassasoq. Tassani ilinniartut ilaasa aningaasaqarniarnikkut sanngiinnerusut iluaquserniarnissaat siunertarinqarpoq. Tassunga atatillugu takuneqarsinnaavoq ilaatigut ineqarnermut tapiissutinut ataqatigiissillugu ineqarnermut akiliutini annertuumik aningaasartuuteqarfiusumi aaqqiissutissamik nassaarniartoqassasoq. Aammattaaq ilinniartut ineqarfiisigut piginnaasat atuuttut iluaqutiginerisa pitsaanerulernissaanik kissaateqarneq saqqummiunneqarpoq, ilaatigut ilinniartut ineqarfiini najugaqartut inuusunnerusut annertunerusumik ineqqanik ataatsimullu atortussanik avitseqatigiittassasut. Peqatigisaanik uparuarneqarluni ilinniartut ineqarfiinut ineqarnermut akiliutip appasippallaarnera, ukiunilu arlaqartuni iluarsiivigineqarsimanani, aammalu ineqarnermut akiliut illup pitsaassusaanut angissusaanullu sanilliullugu iluarsiivigineqarsimanngitsoq kiisalu inoqutigiit aningaasarsiaannut naleqqusagaasimanngitsoq. Nuummi Sisimiunilu ilinniartut ineqarfiini aappariittunik 2012-

imi misissuisoqarnerani assersuutigalugu paasinarsisimavoq 6 %-it inoqutigiittut 500.000 koruunit qaangerlugit aningaasarsiaqarsimasut.

Tamatuma nanginneratut ilinniartut ineqarfii pillugit nalunaarutip atuuttup nutarterneqarnissaa pisariaqartinneqalersimavoq (Namminersornerullutik Oqartussat nalunaarutaat nr. 18, 1. november 2007-imeersoq), tassungalu atatillugu kissaatigineqarluni iluarsaassinerup pissusaata malitsigisaanik inatsisip qaffasissusaatigut iluarsisooqassasoq. Aammattaaq suliassaqaqarfimmi inatsisikkut iluarsaaneq inuiaqatigiit suliassaqaqarfiup pingaaruteqartutut naliliinerannut atatillugu aamma isigineqartussaalluni.

1.2. Inatsisip piareersarnerani pingaarnertut taasariaqartut

Februar 2018-imi ilinniartut ineqarfiit pillugit isumasioqatigiinneq ingerlanneqarpoq, naalakkersuisoqarfiit attuumassuteqartut, ilinniarfeqarfiit iliniartullu kattuffiat ILI ILI peqataallutik, taannalu pissutaalluni siunnersuutip oqaasertalersorneranut annertuumik iluaqutaalluni. Isumasioqatigiinnermi siunertaq tassaasimavoq ilinniartut ineqarfii pillugit inatsisissap pingaarnertut imarisassai sinaakkutissallu pillugit oqallinneq, tassunga ilanngullugit aningaasartuutiviit aamma isertitat tunngavigalugit ilinniartut ineqarfiini ineqarnermut akiliuteqartarnissap piviusunnagortinnissaanut periarfissanik eqqartuineq.

Isumasioqatigiinnermi immikkut pingaaruteqarsimavoq misilittakkat, kissaatit sulinermilu pisariaqartitat tamarmik ilaatinneqarnissaat siunertaralugu soqutigisaqartut tamarmiusut peqataatinnissaat. Isumasioqatigiinnermi suliassaqaqarfimmi malittarisassaliorderit atuuttut misissorneqarput, misissoqqissaarneqarlutik malittarisassallu piviusumik ilinniartunut, ilinniarfeqarfinnut ilinniartullu ineqarfiinik ingerlatsisunut naleqqiullugu atorneqarnerinut assersuunneqarlutik.

Maannakkut malittarisassanik misissuineranut atatillugu isumasioqatigiinnermi taakkunani iluaqutaasut ajoqutaasullu oqallisigineqarput, tassunga ilanngullugit pingaarnertut ajornartorsiutaasartut suunerisa paasineqarneri. Peqatigisaanik aningaasartuutiviit isertitallu tunngavigalugit ilinniartut ineqarfiini ineqarnermut akiliut qanoq piviusunnagortinneqarsinnaanersoq oqallisigineqarluni. Aammattaaq paasineqarsinnaalluni malittarisassatigut tunngaviusut suliassaqaqarfinnik tamanik, sumiiffimmiit sumiiffimmut atuuttunut pissutsinut assigiinngitsorujussuarnik isumaginnippasinnatik. Tamanna tunuliaqutaralugu kissaatigineqarpoq suliassaqaqarfimmi siunissami inatsisissaq pisariaqartitsinerit naammassineqarnissaannut pisariaqartitsinertigut aamma isumalluutitigut najukkani annertoorujussuarnik assigiinngitsoqarneranik paasisaqarnermik aallaaveqassasoq. Peqatigisaanillu nalunaarutigineqarluni ilinniartut ineqarfiisigut piginnaasatigut ineriartortitsiuartoqaraluartoq piginnaalersitsisumik ilinniarnermik pissarsinissamut naleqqiullugu ilinniartut ineqarfiisigut pisariaqartitsinerup aporfiusup annikillisinneqarnissaa siunertaralugu suli ukiuni arlalissuarni tulleriarinissamik pisariaqartitsisoqarumaartoq.

Tamatuma saniatigut siunnersuummut aamma ilaatinneqarput kaammattuutit arlallit Kalaallit Nunaanni ilinniartut ineqarfiinik ingerlatsiviit tamarmiusut taamanikkullu Ilinniartitaanermut, Kultureqarnermut, Iisimatusarnermut Ilageeqarnermullu Naalakkersuisoqarfiup akornanni maj 2015-imi ilinniartut ineqarfiit pillugit Nuummi ataatsimiinnermi saqqummiunneqartut.

2. Siunnersuummi immikkoortut pingaarnertit

a) Inatsisitigut aalajangersakkat atuuttut

Ilinniartut ineqarfiinut tunngasut inatsisitigut maannakkut malittarisassaqaartinneqanngillat taamaallaalli nalunaarutikkut, ilinniartut ineqarfiit pillugit Namminersornerullutik Oqartussat nalunaarutaat nr. 18, 1. november 2007-imeersukkut (ilinniartut ineqarfii pillugit nalunaarut). Nalunaarut inissianik attartorneq pillugu Inatsisartut peqqussutaanni nr. 2, 12. maj 2005-imeersumi § 3, imm. 1, nr. 3-mik tunngaveqarpoq, Inatsisartut inatsisaatigut nr. 17, 8. juni 2017-imeersukkut kingullermik allanngortinneqartoq.

Attartorneq pillugu inatsimmi § 3, imm. 1, nr- 3-mit takuneqarsinnaavoq attartorneq pillugu inatsit ilinniarnermut atatillugu ilinniartunut Namminersorlutik Oqartussanit imaluunnit kommuninit atugassanngortinneqartunut inissianut atuutinngitsoq.

Aammattaaq imm. 3-mi aalajangersakkamit takuneqarsinnaavoq taamatut inissiaqarneq pillugu KANUKOKA isumasiorsinnarlugu Naalakkersuisut malittarisassanik erseqqinnerusunik aalajangersaasinnaasut, tassunga ilanngullugit attartornermik isumaqatigiissummut tunngatillugu pinngitsoorani naammassineqartussat piumasaaqaatillu.

Malittarisassat allakkut attartorneq pillugu peqqussutissamut siunnersuutip UPA 2005-imi pingajussaaneerlugu suliarinerani allannguutissatut siunnersuutitut ikkunneqarput, tassa ilinniartut ineqarfiinut tunngasuni malittarisassanik aalajangersaasinnaanermut sukkanerpaamik tunngavissamik pilersitsisoqarnissaanik pisariaqartitsisoqarmat.

Aalajangersakkanut nassuiaatinit takuneqarsinnaavoq taakkununga pissutaasoq " iliniartut ineqarfiinut tunngasuni malittarisassanik pissarsisoqarnissaa pillugu Inatsisartut Ombudsmandiannit Inatsisartut Kukkuersuineranut Ataatsimiititaliaannit inassuteqarneq. Siunnersuutip kingunerisaanik peqqussummut ilaatinneqanngillat Namminersornerullutik Oqartussat kommunilluunniit ilinniartunut ineqarfiini attartornerit, tamatumalu malitsigisaanik maannakkut periuseq naapertorlugu ilinniartut ineqarfiinik attartornermut atatillugu ineqarnermut tapiissusiinissaq ajornarluni".

Imm. 3-mi piginnaatitsineranut aalajangersakkamut naleqqiullugu nassuiaatinit takuneqarsinnaavoq "Naalakkersuisut Kalaallit Nunaanni Kommunit Kattuffiat isumasioerlugu ilinniartut ineqarfiinut tunngasuni malittarisassanik aalajangersaasinnaasut assersuutigalugu attartornermik isumaqatigiissutip isumaqatigiissutigineranut, atorunnaarsinneranut, attartorneqartup atorneqarnera, torersuutitsineq attartorneqartullu aserfallatsaalineqarnernut tunngasut. Kiisalu oqaaseqaatini ersippoq siunertaasoq

Namminersornerullutik Oqartussat atugassanngortitaanni inissiani ineqarnermut akiliutit aningaasanut inatsimmi aalajangersarneqartassasut, kommunalbestyrelsillu ataasiakkaat atugassanngortitaanni inissiani ineqarnermut akiliutinik kommunalbestyrelsit aalajangersaasassasut".

Tamatuma saniatigut konto pingaarneq 40.02.01 Ilinniagaqartut ineqarfiisa allaffeqarfiata ataatsimut kontuanut oqaasertaliussanut nassuiaatini allassimalluni:

"Ilinniagaqartut ilinniagaqartut inaanni najugaqartut ineqarnermut aningaasartuutissaasa annertussusissaat oqaasertaliussatigut aalajangersarneqarput. Akit qummut iluarsiivigineqarnikuunngillat 1990-ikkulli naajartulernerani. Tamanna akigititanik iluarsisarneq pillugu inatsit atuutsilerneqarneranut atatillugu isumaliutigineqassaaq".

Ilinniartut ineqarfiinut tunngasunik imarisaatigut malittarisassaqtitsineq ilinniartut ineqarfii pillugit Namminersornerullutik Oqartussat nalunaarutaanni nr. 18, 1. november 2007-imiippoq.

Ilinniartut ineqarfii pillugit nalunaarummi § 2, imm. 1-imit aamma § 3, imm. 1-imit takuneqarsinnaavoq ilinniagaqartunut inissiaritinneqartuni inissiamik tunniussisarnermi piumasaqaataavoq ilinniagaqartoq ilinniagaqarnersiuteqarnermik malittarisassat malillugit iliniartitaanermi tapiiffigitissinnaasumi ilinniarnerninik ingerlatsissasooq aammalu attavigineqarnissamik piumasaqaatinik naammassinnissasooq, tak. ilinniagaqarnersiutit pillugit Namminersorlutik Oqartussat nalunaarutaat nr. 9, 19. juli 2017-imeersooq aamma ilinniagaqarnersiutit pillugit Inatsisartut inatsisaat nr. 12, 22- november 2011-meersooq.

Aammattaq tullerriiarinermi malittarisassat atuuttut nalunaarummi § 2, imm. 2-5-imit takuneqarsinnaallutik. Tassunga atatillugu pingaaruteqartumik tunngaviuvoq Namminersorlutik Oqartussat ilinniartunut ineqarfiutaanni ilinniartut ineqarfiini inissiamut naleqqiullugu ilinniartut avataaneersut qaffasinnerpaatillugit salliutinneqartarneri. Taamaalilluni ilinniartut paasineqarput ilinniarnerep aallartinnissaa sivikinnerpaamik ukiunik marluk sioqqullugit illoqarfiup ilinniarfiusup avataani inuit nalunaarsorneqartarfiannit najugaqareersimasut.

Tamannalu allatigut kommunimiit ilinniartunik tullerriiarinermi kommunit ilinniartunut ineqarfiinut tunngatillugu kommunalbestyrelsinit aalajangersarneqartunut najoqqutassianut assersuunneqassalluni.

Kommunit Namminersorlutillu Oqartussat ilinniartunut ineqarfiisa akornanni suliassat agguarneri Namminersorlutik Oqartussani kommuninilu nalinginnaasumik suliassat agguarnerinut naapertuuppoq, taanna naapertorlugu nuna tamakkerlugu ilinniartuni soqutigisat Namminersorlutik Oqartussanit isumagineqarlutik, kommunillu nammineq iliniartuutiminnik salliutitsillutik. Tullerriiarinermik malittarisassat pingaartumik illoqarfinni ilinniarfeqarfiusuni ilinniartut ineqarfiini inissianik amigaateqarnermut atatillugit

isigineqassapput. Tassunga ilanngutissaaq illoqarfimmi iliniarnerup naammassineqarnissaa siunertaralugu illoqarfimmi ilinniarfeqarfiusumi allami inissiamik qulakkeerinninniarluni ilaqutaqarani attaveqarfeqarnaniluunniit iliniartumut avataaneersumut annertoorujussuarmik sapernarnera.

Aammattaaq maluginiarneqassaaq ilinniartut ineqarfiini inissiamik initaartinneqarnissamut inatsisitigut piunasaqaateqarfiusumik malittarisassat atuuttut ingerlanneqanngimmata, tassunga ilanngullugu iliniartunut aalajangersimasunut illusimatitsinnermut naleqqiullugu.

Aammattaaq ilinniartut ineqarfiini inissiaq qanoq ittoq, pissusaanut angissusaanulluunniit naleqqiullugu ilinniartut ineqarfiini najugaqartut ataasiakkaat pissarsiarisinnaaneraat nalunaarummi malittarisassaqaartinneqarnani. Aammattaaq tamanna ilinniartut ineqarfiisigut tatisimanninnermut atatillugu isigineqassalluni, taamaattumik pitsaassuseqartumik initaartitsinissamut malittarisassanik siuumoortumik aalajangersaanissaq sapernarluni. Taamaattumik ilinniartut ineqarfiini inissiaq qanoq ittoq neqeroorutigineqarsinnaanersoq pillugu apeqqut ingerlatsivinni piviusumik ingerlataqarnermut atavoq.

Malittarisassat atuuttut tamatuma saniatigut illoqarfimmi ilinniarfeqarfiusuni illusimatitsinissamut piviusumik pisariaqartitsisoqarnissaa pillugu piunasaqaateqanngillat.

Peqatigisaanik ilinniartut ineqarfii pillugit nalunaarummit takuneqarsinnaavoq ilinniartut ineqarfiini inissiaq sivilunerpaamik ukiumut ataatsimut akuersissutigineqartartoq, tamannalu illoqarfimmi ilinniarfeqarfiusuni ilinnigaqarluni najugaqarnermut atatillugu, assersuutigalugu ukiumik arlalinnik sivilussuseqartumut atatillugu nutaamik qinnuteqarnissamik pisariaqartitsilluni.

Tamatuma saniatigut nalunaarut ilinniartut ineqarfiinik aqutsineq pillugu malittarisassanik imaqarpoq, malittarisassat atuuttut naapertorlugit ilaatigut tassaniillutik ilinniartut ineqarfiini aqutsisoqarfiup ataatsimut allaffia (KAF) aamma ilinniartut ineqarfiinik aqutsisoqarfiit, ilinniartut ineqarfiini inissianut ataasiakkaanut atassuteqartut.

Peqatigisaanik nalunaarummiipput najugaqartut siunnersuisoqatigiivini akissarsiaqartinneqanngitsunik pilersitsinissamut periarfissaq pillugu malittarisassat.

Aammattaaq attartorneq pillugu isumaqatigiisummik isumaqatigiissuteqarnissaaq pillugu malittarisassanik aamma ineqarnermut akiliummik akiliinissamik, aningaasanut inatsisikkut aalajangersarneqartussamik, aalajangersaasoqarpoq, aamma qularnaveeqqusiineq pillugu aalajangersakkanik. Aammattaaq ilinniagaqarnerisutini ilinniartut ineqarfiini najugaqartup tigusineranut atatillugu ingerlaannartumik ineqarnermut akiliutip ilanngaatigineqarnissaanut periarfissaq pillugu aalajangersagaqarpoq. Periarfissarli taanna piviusumik atornerqarnani. Taamaattoqartillugu ilinniartut ineqarfiini najugaqartut assigiinngitsut akornanni immikkoortitsisoqartussaalluni. Ilinniartut ineqarfiini najugaqartut, ilinniagaqarnerisutitut

taarsiullugu ilinniarnermut atatillugu suliffimmiinnermut akissarsiaqartut akissarsianiit toqqaannartumik ilanngaaffigineqarsinnaanngillat taamaaqataanillu qiortakkanik peqarunnaartunut ilinniartut ineqarfiini najugaqartunut tamanna atuulluni. Aammattaaq aaqqissuussineq atorneqartoq tunngaviusumik paasissutissanik taaneqartut immiunnerinut atatillugu teknikkikkut killeqartitsisoqarluni. Tamatuma nanginneratut uparuarneqassaaq ineqarnermut akiliummik akiliisarnermik 2017-imi misissuinnermit takutinneqarmat ilinniartut ineqarfiini najugaqartunit arfineq pingasuusunut tallimat piffissaq eqqorlugu ineqarnermut akiliummik akiliineq ajortut, 25 %-ii ineqarnermut akiliummik akiliineq ajortut aamma qaammatit marluk missaannik piffissami akiligassatigut kinguaattoortoqartartoq akiligassanili akilinngisat agguaqatigiissillugit 1.800 kr.-iusut. 2017-imi ineqarnermut akiliummi kinguaattoorutit appasinnerpaat 165 kr.-iusimapput qaffasinnerpaarluni 8500 kr.-iusimalluni.

Tamatuma saniatigut nalunaarummiipput aserfallatsaaliineq, iluarsaassineq aamma ilinniartut ineqarfiini inissiamik atuineq pillugu malittarisassat kiisalu atuisinnaatitaanerup allanut tunniunneqarnera pillugu malittarisassat.

Aammattaaq ilinniartut ineqarfianni najugaqartup aamma ilinniartut ineqarfiinik aqutsisoqarfiup attartornermik isumaqatigiissummik taamaatitsisinnaanerit imaluunniit atorunnaarsitsisinnaanerit pillugu malittarisassat erseqqissut aalajangersarneqarsimallutik.

Peqatigisaanik nalunaarummiippoq sumiginnaaneq pissutigalugu ilinniartut ineqarfiinik aqutsisoqarfiup taamaatitsinissamut tunngaviusut ikinnerpaamik allakkatigut marlunnik mianersoqqusinnisaq pillugu aalajangersagaq.

Tamatuma saniatigut nalunaarummi atuuttumi takuneqarsinnaavoq ilinniartut ineqarfiinik aqutsisoqarfik attartornermik isumaqatigiissummik taamaatitsinermut atorunnaarsitsinermulluunniit atatillugu ilinniartut ineqarfiini najugaqaqqinnissaanut ilinniartut ineqarfianni najugaqartup sumiginnaasimasup najugaqarsinnaanermit mattunneqarallarnissaa isumagisinnaagaa. Taamaappat piffissaliussamut aalajangersariikkamut aalajangersarneqassaaq, ilinniartut ineqarfiani najugaqartup ilinniartut Ineqarfiinut aqutsisoqarfimmut isumannaagassani unitsissallugit piffissamiit qaammatit pingasut qaangiutsinnagit.

Kiisalu ilinniartut ineqarfii pillugit nalunaarummiillutik immikkut ittut malittarisassat ilinniartut ineqarfianni najugaqartup nuunneranut atatillugu isiginiarneqartussat kiisalu oqartussanut akisussaasunut naammagittaalliuuteqarsinnaaneq pillugu aalajangersakkat.

Aammattaaq oqaatigineqassaaq nalunaarummi atuuttumi taamaallaat pineqarmata Namminersorlutik Oqartussat ilinniartunut ineqarfii, naak inatsisitigut tunngavissiineq aamma kommunini ilinniartut ineqarfiini malittarisassaliornissaq periarfissaatinneqaraluartoq. Kommunilli 2006-imi ukiakkut nalunaarutigaat ilinniartut ineqarfii pillugit nalunaarummut

ilaarusunnatik. Tamatuma saniatigut oqaatigineqassaaq kommuninit pigineqartunik ilinniartut ineqarfiinik ikittuinnarnik taamaallaat peqarmat.

b) Siunnersuut

2.1 Nalinginnaasumik

Siunnersuummi pingaarnertut siunertaq tassaavoq suliassaqaarfimmi ullutsinnut naleqqunnerusunik inatsisiliornissaq. Aammattaaq siunnersuummut ilisarnaataalluni aaqqissugaanermigut imarisamigullu malittarisassanik misilittakkanillu atuuttunik annertuutigit tunngaveqarmat.

Tamatuma saniatigut siunnersuummi siunertaavoq allaffissornikkut malittarisassanut atuuttunut taartaasussanik ilinniartut ineqarfiinut inatsisitigut tunngavissamik qulakkeerinninnissaq. Peqatigisaanik siunertaasimavoq qulaani taaneqartumi isumasioqatigiinnermi nalunaarutigineqartunut kaammattuutitut naapertuuttunik suliassaqaarfimmi pisariittunik paasiuminartunillu malittarisassaliornissaq.

2.2 Atuuffia

Siunnersuutip ilinniartut avataaneersut suli salliutippai. Tamanna imatut erseqqissarneqarpoq siunnersuummi § 1, imm. 1-imi aalajangersarneqarluni Inatsisartut inatsisaat manna ilinniartut ineqarfiini utaqqiisaasumik attartornermut atorneqarpoq, ilinniarnerminnut atasumik ilinniagaqartunut illusimaffissamik pisariaqartitsisunut avataaneersunut tamanna pillugu qinnuteqarnikkut Namminersorlutik Oqartussanit atugassanngortinneqartut. Tamanna kommunit Namminersorlutillu Oqartussat akornanni suliassanik agguaassinermut naapertuuppoq, kommunit Namminersorlutillu Oqartussat ilinniartunut ineqarfiisa akornanni suliassat agguarneri Namminersorlutik Oqartussani kommuninilu nalinginnaasumik suliassat agguarneritut naapertuuppoq, taanna naapertorlugu nuna tamakkerlugu ilinniartuni soqutigisat Namminersorlutik Oqartussanit isumagineqarlutik, kommunillu nammineq iliniartuutiminnik salliutitsillutik.

Tassunga ilanngutissaaq ilinniartut nunaqavissut illoqarfimmi ilinniagaqarfiusumi attaveqaatit saniatigut aamma illoqarfimmi ilinniarfeqarfiusumi inissatigut periarfissanik ujartuinissamut pitsaaneruseqarneri.

Siunnersuummi § 1, imm. 2-mi ilinniartup avataaneersup nassuiaataa ilinniartut ineqarfii pillugit nalunaarummi § 2, imm. 4-mit ingerlatitseqqinneruvoq.

Peqatigisaanilli § 1, imm. 1-imi, imm. 3-mut innersuussisoqarpoq, tassani aalajangersarneqarluni Naalakkersuisut immikkorluinnaq pisoqartillugu, tassunga ilanngullugu inooqatigiinnikkut pissutsit pingaartumik eqqarsaatigalugit, aamma inissaqartitsinikkut tamanna akuerineqarsinnaappat, avataaneersuunngitsumik piffissamut killeqartumut ilinniartut ineqarfiini utaqqiisaasumik ineqartinneqarsinnaasut.

Tamatuma saniatigut siunnersuummi qinnuteqartunik arlaannaatigulluunniit tulleriaarisooqanngilaq, taamaalillunilu ilinniartitaaneq qanoq ittoq pineqartup aallartiffigisaa arlaatigut pingaaruteqarnani. Tamanna ilinniartut ineqarfii pillugit nalunaarummi § 2-mi malittarisassanut atuuttunut naleqqiullugu allannguineruvoq. Tamatumunnga tunngavilersuut tassaavoq ilinniartut ineqarfiini pisinnaatitaanermut tunngatillugu ilinniartitaaneri assigiinngitsut tamarmik assigiimmik pingaaruteqartutut isigineqartut. Taamaattorli siunnersuummi § 4, imm. 1, nr. 3-mut naleqqiullugu ilinniartut ineqarfiini inissiamik tunineqarnissamut piumasaaqaataluni Naalakkersuisut aalajangersimasumik najugaqarnissamik piumasaaqammit immikkut ittumik akuersisinnaasut, tak. imm. 1, nr. 2, pineqartup pissusiviusut malillugit Kalaallit Nunaanni najugaqavinnera uppersarneqarsinnaappat, naak Kalaallit Nunaata avataani pisortatigoortumik aalajangersimasumik najugaqaraluarluni. Siunnersuummi § 7-imi innersuussinissamut tulleriaarinissamullu piumasaaqatit pillugit malittarisassanik Naalakkersuisut aalajangersaanissamut pisinnaatitaapput.

Aammattaaq meeqqat aamma aappat/inooqatigisat ingiaqataasut immikkut malittarisassaqartinnerat siunnersuummi § 19-imut nuunneqarput. Tamanna inuit taakku ilinniartunut allanut unammilleqatigiittutut isigineqannginnerinik tunngaveqarpoq, tassa taakku ilinniartut ineqarfiini inissiamik pissarsisinnaanerit ilinniartup aalajangersimasup kingunerimmagu.

Tamatuma saniatigut tamanna pillugu kaammattuut tunuliaqutaralugu siunnersuummi § 2-mi aalajangersarneqarpoq ilinniartut ineqarfiini inissiamik initaartinneqarpeq ilinniarnerp sivismisusianut naapertuuttumik piffissamut pissasoq. Tamanna isumaqarpoq ilinniartut ineqarfianni najugaqartup ilinniarnep tamaat ilinniartut ineqarfianni inissiamik atuisinnaanini naatsorsuutigisinnaagaa, tassungalu aamma ilaallutik kinguaattoornerit, ilinniartut ineqarfianni inissiap piginnarnissaanut Inatsisartut inatsisaanni piumasaaqatit naammassineqartuarneri tunngavigalugu, tassunga ilanngullugu ilinniarnermik ingerlataqartuunissaq pillugu piumasaaqat.

Siunnersuummi § 1, imm. 1-imi erseqqissumik aalajangersarneqarpoq ilinniartut ineqarfianni inissiamik tunineqarnissamut illusimaffissamik pisariaqartitsisoqassasoq. Siunnersuummi § 5-imi aamma aalajangersarneqarpoq ilinniartoq illoqarfimmi ilinniarfeqarfiusumi inissiamik allamik atugassaqartoq imaluunniit aappaasoq inooqataasorluunniit sulisunut inissiamik atugassinneqarsimappat ilinniartut ineqarfianni inissiamik atugassinneqarnissamut imaluunniit taassuma atatiinnarnissaanut pisinnaatitaaffeqanngitsoq. Aamma taamaappoq sulisitsisoq ilinniarnermut atatillugu suliffimmiinnissamut isumaqatigiissummut atasumik ilinniartumut atugassanngortitamik inissiamik tunineqarpat, imaluunniit illusimaffissamik pisariaqartitsineq ilinniartup nammineq atugaanut naatsorsuutigineqartariaqarpat.

Tamanna inatsisit atuuttut illusimaffissamik pisariaqartitsivinnermik ingerlataqannginnerannut atatinneqassaaq. Malittarisassat atuuttut taamaalillutik ilinniartut

ineqarfianni najugaqartup ilinniartut ineqarfiini inissiami najugaqarsinnaanera peqatigisaanillu pineqartup illoqarfimmi ilinniarfeqarfiusumi tassani ilinniartut ineqarfianni najugaqartup attartortitaanik inissiamut akisussaalluni.

Inatsisartut inatsisaata maannamut Namminersorlutik Oqartussat ilinniartut ineqarfiini inissianik taamaallaat malittarisassaqaartitsivoq, kisiannili siunnersuummi § 3-mi periarfissiisoqarluni kommunalbestyrelsit isumasioreerlugit kommunit ingerlataannik ilinniartut ineqarfii pillugit malittarisassanik Naalakkersuisut aalajangersaasinnaallutik.

2.3 Ilinniartut ineqarfianni inissiamik tunineqarnissamut atatiinnarnissaanullu pinngitsoorani naammassisassat

Ilinniartut ineqarfianni inissiamik tunineqarnissamut atatiinnarnissaanullu pinngitsoorani naammassisassat siunnersuummi §§ 4-6-imi takuneqarsinnaapput.

Nutaatut siunnersuummi § 4, imm. 1, nr. 1 aamma 2-mi atassuteqarnermut piumasaqaatinik arlalinnik aalajangersaasoqarpoq, ilinniagaqarnerisutit pillugit Inatsisartut inatsisaanni aalajangersarneqartut atassuteqarnissaannut piumasaqaatinut naapertuuttut. § 4, imm. 1, nr. 3-mi aamma erseqqissarneqarpoq ilinniartitaanermi tapiiffigitinneqarsinnaatitaasumi imaluunniit ilinniartitaanermi ilinniagaqarnerisutit pillugit Inatsisartut inatsisaat naapertorlugu ilinniagaqarnerisuteqarfiusussat Naalakkersuisut aalajangiiffigisaanni ilinniartoq tiguneqarsimassasoq ilinniarnermillu ingerlatsissasoq.

Tamatuma saniatigut § 4, imm. 1, nr. 4-mi aalajangersarneqarpoq aamma piumasaqaataasoq ilinniartut ineqarfianni inissiamik siusinnerusukkat atuinermiit akiligassatigut akilinngisaqarsimassanngitsoq imaluunniit ilinniartut ineqarfianni inissiamik atuinermiit akiitsoqassanngitsoq, tassunga ilanngullugu sumiginnaanerup malitsigisaanik, tamanna akiliisarnissamut isumaqatigiisummi ilinniartoq eqqortitsinngippat.

Aammattaaq siunnersuummi § 4, imm. 2, 3 aamma 5-imi atassuteqarnissamut piumasaqaammut, najugaqarnissamut piumasaqaammut aamma ilinniarnermik ingerlataqartuunissamik piumasaqaammut tunngasut immikkut ittumik akuersisarnissamut aalajangersakkat ikkunneqarput.

Siunnersuummi § 4, imm. 4-mi aalajangersarneqarpoq ilinniartut ineqarfianni inissiamut pisinnaatitaaffik atorunnaassasoq, imm. 1-imi piumasaqaat ataaseq arlalilluunniit naammassineqarunnaarpata.

Pinngitsoorani naammassineqartussat taaneqartut saniatigut piumasaqaataavoq ilinniartoq inissiamik allamik akisussaaffeqassanngitsoq, tamannalu siunnersuummi § 5-imi erseqqinnerusumik malittarisassaqaartinneqarluni, Inatsisartut inatsisaatut atuuffianut tunngasuni immikkoortumi qulaaniittumi eqqartorneqartut.

Kiisalu siunnersuummi § 6-imi erseqqissarneqarluni aamma pinngitsoorani naammassineqassasoq ilinniartut ineqarfianni inissiamik tunineqarnissamut atatiinnarnissaanullu attuumassuteqartunik taassumalu akilerneqarneranut paasissutissanik tamanik ilinniartoq Naalakkersuisunut paasissutissiissasoq.

2.4 Aqutsineq najugaqartullu siunnersuisoqatigiivi

Sumiiffinni pisariaqartitsinernut pissutsinik ataqatigiittoqarnissaa ataqatigiissarisogaarnissaalu qulakkeernissaat siunertaralugu ilinniartut ineqarfiinik aqutsisoqarfiup aaqqissugaaneranut akisussaat erseqqissumik agguarneri malittarisassallu eqaannerusut aalajangersarnissaat siunnersuummi pingaarluinnartutut isigineqarsimapput. Tamanna naapertorlugu siunnersuummi § 8-mi nuna tamakkerlugu iliniartut ineqarfiinik aqutsiviup imaluunniit najukkani amerlanerusuni ilinniartut ineqarfiinik aqutsisoqarfinnik pilersitsisoqarnissaanut periarfissiisoqarpoq. Siunnersuummi aamma allaffissornerup allanut suliasanngortinnissaa siunertaralugu tunngavissamik erseqqissumik ikkussisoqarpoq.

Tassunga atatillugu ilisimatitsissutigineqarsinnaavoq Naalakkersuisut ullumikkut ilinniartut ineqarfiinik aqutsisoqarfinnik arfineq marlunnik peqarmata, ilinniartut ineqarfiini inissiat 1700-t sinnerlugit ataatsimut piginnaasaqartut. Ilinniartut ineqarfiini inissiat kalaallit nunaanni illoqarfinni ilinniarfeqarfiusuni naligiittumik agguarsimapput.

Siunnersuummi aamma § 9-mi ilinniartut ineqarfii pillugit malittarisassanik aqutsinermut suut ilaanerinek erseqqissaasoqarpoq, tassunga ilanngullugu najugaqartut soqutigisaasa isumagineqarnissaasa erseqqissarneri. Tamanna najugaqartut siunnersuisoqatigiivi pillugit siunnersuummi § 12-imi aalajangersakkamik taperneqarpoq, ilinniartut ineqarfiinut nalunaarummi § 10-mik ingerlatitseqqinnerusoq. Tassunga atatillugu siunnersuummi § 8, imm. 5-imi najugaqartut siunnersuisoqatigiivini immikkut sulinerup ilaatigut akissarsiaqarfiunissaa pillugu malittarisassanik aalajangersaanissamut tunngavissiisoqarpoq.

Siunnersuummi § 10, imm. 1-mi ilinniartut ineqarfiini ataasiakkaanut tamanut malittarisassanik Naalakkersuisut aalajangersaasinnaapput. Aalajangersagaq ilassusigaavoq pisinnaatitsissummik imm. 3-mi, taamaattumillu nalunaarusiornikkut ersarinnerusunik maleruagassiortoqarsinnaalluni, ileqqorissaarnissamut tunngasut sunik imaqqassanersut. Ilinniartut ineqarfiinut nalunaarummi § 6-imi malittarisassat atuuttut malillugit ilinniartut ineqarfiinik aqutsisoqarfiit ataasiakkaat tamarmik ilinniartut ineqarfiannut pineqartumut malittarisassanik aalajangersaassapput tamatumalu saniatigut ilinniartut ineqarfiat pillugit malittarisassanik aalajangersaasoqarsinnaalluni.

Malittarisassanik aalajangersaanissaq pillugu piumasaqaat taamaalilluni atorunnaarpoq. Tamanna malittarisassanik piviusumik taamaallaat peqarsimaneramik atatillugu isigineqassaaq, ileqqoreqqusat amerlanertigut najoqqutassiaallutik suliffeqarfimmut ilinniartut ineqarfiinut attuumassuteqarneq ajortut aalajangersimasumut atasuusut.

Siunnersuummi § 11-mi ilinniartut ineqarfiinik aqutsisoqarfiup ilumini utaqquisut allattorsimaffiinik ingerlataqarsinnaaneranut aamma utaqquisut allattorsimaffianni inissisimanissamut piunasaqatit tamanut saqqummiunnissaannut periarfissiisoq. Kingullertut taaneqartoq nutaajuvoq kisiannili ilinniartut ineqarfiinut nalunaarummi § 8-mik ingerlatitseqqinneq pineqarluni.

2.5 Attartornissamik isumaqatigiissuteqarneq aamma ineqarnermut akiliummik, atuineranut qularnaveeqqutinillu aalajangersaaneq akiliisarnerlu

Siunnersuummi § 13-imi aalajangersarneqarpoq attartornermut isumaqatigiissummik isumaqatigiittoqassasoq, taassuma ilusissaanut piunasaqaat, taanna qaqugukkut atsiorneqarsimassanersoq aamma malittarisassat tunniunneqarsimanissaat pillugu piunasaqaat.

Siunnersuummi § 17-imi ineqarnermut akiliut qaqugu akilerneqarsimassanersoq, aamma akiliineq qanoq pisinnaanersoq aamma ineqarnermut akiliut aamma atuineranut akiliut ilinniartup ilinniagaqarnersiutaanit ilanngaatigineqarnissaanut tunngavissaq pillugu aalajangersakkanik aalajangersaasoqarpoq. Tamanna annikitsumik allannguuteqartillugu ilinniartut ineqarfiinik nalunaarummi § 12-imik aamma § 15-imik ingerlatitseqqinneruvoq. Ileqquusullu periaatsit naapertorlugit aamma erseqqissarneqarpoq ineqarnermut akiliutissaq siumoortumik akilerneqartartussaasoq.

Siunnersuut nutaatut ilinniartut ineqarfianni najugaqartup ineqarnermut akiliinissaa aamma kiassarnermik, innaallagissamik, gassimik imermillu atuineranut akiliinissaa pillugu aalajangersakkamik § 15-imi imaqarpoq.

Siunnersuut aamma nutaatut § 16, imm. 1-imi ineqarnermut akiliutip aalajangersarneqarnerani pissutsit suut eqqarsaatigineqarnissaat pillugu aalajangersakkamik imaqarpoq.

Aammattaaq nutaatut § 16, imm. 2-mi ineqarnermut akiliut procenti aaqqiissutissaq aamma maannakkorpiaq aningaasarsiat pillugit Inatsisartut inatsisaat naapertorlugu ukiumoortumik procenti aaqqiissutissamik iluarsineqartassasoq aalajangersarneqarpoq.

Tamatuma saniatigut § 15, imm. 2-mi aalajangersarneqarpoq kiassarnermik, innaallagissamik, gassimik imermillu atuineranut akiliineq ilinniartut ineqarfianni najugaqartup piviusumik atuinera tunuliaqutaralugu pisassasoq aamma ilinniartut ineqarfianni inissiap pissusaa inissiamit taamatut angitigisumit nalinginnaasumik annertunerusumik atuinermik pisariaqartitsissappat atuinermi akiliummi naleqqiussinikkut appartitsisoqassasoq.

Kiisalu siunnersuummi § 14-imi aalajangersarneqarluni nutsernermi pisussaaffimminut qularnaveeqqutitut ilinniartut ineqarfianni najugaqartoq qularnaveeqqutinik akiliisassasoq. Taanna allannguuteqartillugu ilinniartut ineqarfiinut nalunaarummi § 13-imik

ingerlatitseqqinneruvoq, tassani aalajangersarneqarluni attartornermik isumaqatigiisummik isumaqatigiissuteqarnermi ilinniartut ineqarfianni najugaqartoq nutsernermi ilinniartut ineqarfianni najugaqartup pisussaaffiunut qularnaveeqqutit qaammammut ataatsimut ineqarnermut akiliummut naapertuuttumik qularnaveeqqutinik akiliissasoq.

Ineqarnermut akiliutip aalajangersarnera pillugu aalajangersakkami siunnersuutigineqartumi pingaarnertigut siunertaq tassaavoq ilinniartut ilaannut aningaasaqarnikkut sanngiitsunut nukittorsaanissamik periarfissamik pilersitsinissaq. Tamanna pissaaq ilinniartut ineqarfianni najugaqartumi taassumalu inoqutigisaani isertitatut pissutsit eqqarsaatigalugit.

Atuinnermut akiliinissaq eqqarsaatigalugu tamanna ilinniartut atuinnermut tunngatillugu aningaasartuutitut ilisimasaqarnerunissaannut kajumissaateqarnermik tunngaveqarpoq. Naliliisoqarpoq ullumikkut ilinniartumut ataatsimut naleqqutinngitsumik qaffasissumik atuisoqartartoq, tamannalu annerusumik ilinniartup atuinnerminut nammineq akiliisannginneranik tunngaveqarluni. Tamanna pillugu malittarisassanik aalajangersaanermi ilinniartut ineqarfiini inissiat ilai ilinniartut ineqarfiini inissianit allanit kiassassallugit akisunerunersut sillimaffigineqassaaq. Atuisup akiliisarnissaata eqqunneqarnerata aamma kingunerissavaa ilinniagaqarnerisutini akigititaasut taamaattoqassappat qaffanneqartariaqassasut, tassa ilinniagaqartut taamaangippat ullumikkumiit aningaasanik ikinnerusunik atugassaqalissammata.

Aalajangersakkalli pineqartut kingusinnerusukkat aatsaat piviusunngortinneqarumaarput, tak. siunnersuummi § 53, aalajangersakkanut innersuussisoqarluni. Tamanna suliassaqarfinni allani suliniutit eqqaanartut aallartinneqarsimaneritut atatillugu isigineqassaaq, tak. ataaniittoq. Malittarisassat piviusunngortinneqarneri, tassunga ilanngullugu aalajangersimasunik malittarisassaliorneq, suliniutitut taakkununga eqqaanartunut naleqqiullugu ataqatigiissarneqassammata taamaattumillu taakku inerneqarneri utaqqineqassallutik.

Tassunga ilanngutissaaq suliassap paasiuminaatsuunera, tassunga ilanngullugu soqatigisaqatigiinnik allanik qanimut suleqateqarnissamik pisariaqartitsineq, taamaattumik tulluarnerpaatut nalilerneqarluni malittarisassaliorneq taanna immikkoortut suliniutigineqassasoq maannakkut siunnersuutikkuunngitsoq. Tamanna taamaattumik naatsorsuutigineqarpoq Namminersorlutik Oqartussat inissiaataasa kommuninut tunniunneqarnissaasa pilersarusiornerinut atasumik immikkut sammineqassasoq. Taamaattorli pingaartut isigineqarluni malittarisassaliornissamut pingaarnertigut tunngaviusunut Inatsisartut isummernissaat, taamaattumik taakku siunnersuummut ilanngunneqarlutik. Peqatigisaanik siunnersuummi § 18-imi aalajangersakkamik ikkussisoqarpoq, taanna naapertorlugu ineqarnermut akiliutip naatsorsornissaa pillugu malittarisassanik aalajangersaaqullugit Naalakkersuisut peqquneqarlutik, tassunga ilanngullugit isertitatigut killilersuineq, qularnaveeqqusiineq, ineqarnermut akiliummik aamma kiassarnermik, innaallagissamik, gassimik imermillu atuinnermut akiliinissaq pillugit,

tassunga ilanngullugu atuinermi akiliinermi naleqqiussinikkut appartitsineq pillugu. Naggasiullugu § 53-imut innersuussisoqarpoq, tassani imm. 1-mi aalajangersarneqarluni §§ 15-ip, 16-ip aamma 18-ip taakkulu malitsigisaanik malittarisassat atulersinneqartut atuutilerfissaat piffissaq Naalackersuisunit aalajangersarneqarluni. Aammattaaq § 53, imm. 2-mi aalajangersarneqarluni ineqarnermut akiliutip angissusaa aamma qularnaveeqqusiinerup angissusaa § 15-ip § 16-ip atuutilernissaasa tungaannut aningaasanut inatsisikkut aalajangersarneqassasut. Kiisalu § 53, imm. 3-mi aalajangersarneqarluni § 15-ip atulersinnissaasa tungaannut kiassarnermik, innaallagissamik, gassimik imermillu atuinermut aamma akiliisoqassanngitsoq.

Taamaattumik siunnersuutip akuerineqarnera ineqarnermut akiliutip akilernissaanut naleqqiullugu ingerlaannartumik allannguisoqassanngilaq, taamaalilluni taanna aningaasanut inatsimmi malittarisassaqaartinneqassalluni, tamanna pillugu malittarisassanik aalajangersaasoqarnissaata tungaanut. Qularnaveeqqusiineq aamma, tamanna pillugu erseqqinnerusunik malittarisassanik aalajangersaasoqarnissaata tungaanut, aningaasanut inatsimmi aalajangersarneqassaaq, aamma kiassarnermik, innaallagissamik, gassimik imermillu atuinermut akiliisoqassanani, tamakku pillugit malittarisassat atuutilernissaasa tungaannut.

2.6 Ilinniartut ineqarfiini inissiap angissusaa qanoq issusialu

Siunnersuummi § 19, imm. 1-mi aalajangersarneqarpoq ilinniartut ineqarfianni inissiamik initaartitsinermi ilinniartut ineqarfianni najugaqartumut peqataasut inoqutigii amerlassusaat sillimaffigineqassasut, ilinniartup meera 18-it inorlugit ukiullit, aappaa inooqataaluunniit ilinniagaqarnersiutini tamanna pillugu malittarisassat naapertorlugit akiliunneqarlutik angalasinnaatitaappata. Tamanna ilinniartut ineqarfiinut nalunaarummi § 2, imm. 5-imik ingerlatitseqqinneruvoq, unali allaassutaalluni maannakkut erseqqissarneqarluni ilinniartut ineqarfianni inissiaq sorleq ilinniartumut neqeroorutigineqarnissaanut naleqqiullugu tamanna taamaallaat pingaaruteqarluni.

Peqatigisaanik malittarisassat atuuttut naapertorlugit siunnersuummi § 19, imm. 2-mi erseqqissarneqarpoq ilinniartut ineqarfianni inissiap aalajangersimasumik angissuseqarnissaanut pissuseqarnissaanullu, imaluunniit taanna pequtilersugaasimassanersoq imaluunniit pequtilersugaasimassanngitsoq pillugu ilinniartut ineqarfianni najugaqartoq piumasaqarsinnaanani.

Siunnersuummi § 20-mi qanoq ilinerani ilinniartut ineqarfianni inissiaq atugassanngortinneqassanersoq taannalu qanoq pissuseqassanersoq pillugu aalajangersakkamik aalajangersaasoqarpoq. § 21 naapertorlugu ilassutitut maleruagassiortoqaqqissinnaavoq ilinniartut ineqarfiata pitsaassusissaanut tunngasunik attartorerup aallartinnerani, tamatumanissaq peqqutinut, atortorissaarutinut, aammalu assersuutigalugu matuersaatit tunniunneqarnissaat pillugit, aammalu § 22-mi amigaatit pillugit malittarisassanik aalajangersaasoqarluni. Aalajangersakkat taakku annikitsunik

allannguuteqartillugit ilinniartut ineqarfiinut nalunaarummi § 17, imm. 3-5-imik ingerlatitseqqinnerupput.

2.7 Aserfallatsaaliineq iluarsaassinerlu

Peqatigisaanik siunnersuutip kingunerisaanik akuliunnertut iluseqartutut misigineqarsinnaasunik malittarisassanik arlalinnik inatsisinik tunngavissaqartitsisoqalerpoq. Tassunga assersuutigalugu ilaapput aamma ilinniartut ineqarfiinik aqutsisoqarfiup assersuutigalugu ilinniartut ineqarfianni inissiami ajoqusiisoqartillugu ilinniartut ineqarfianni inissiamik alakkaasinnaaneq. Aserfallatsaaliineq pillugu apeqqummut naleqqiullugu malittarisassani atuuttuni aaqqissuussineq ingerlateqqinneqarpoq, taanna naapertorlugu immikkoortut ataatsimoorfiusut aamma kuuffinnut, kiassarnermut, innaallagissamut, gassimut imermullu il.il. teknikkikkut ikkussukkanik aserfallatsaaliineq ilinniartut ineqarfiinik aqutsisoqarfiup pisussaaffigilerlugit.

Aammattaaq ilinniartut ineqarfianni inissiami ajoqusiinerit ingerlaannartumik ilinniartut ineqarfianni najugaqartumit ilinniartut ineqarfiinik aqutsisoqarfimmuut nalunaarutigineqartassallutik.

Taakku saniatigut ilinniartut ineqarfiinik nalunaarummi atuuttumi ilinniartut ineqarfianni inissiap tiguneqarnerani eqqiarneqarsimangippat illersorneqarsinnaasumillu pitsaassuseqanngippat ineqarnermut akiliummi naleqqiussisumik appartitsisoqarsinnaanera pillugu malittarisassaq siunnersuummit peerneqarpoq. Tamatumunnga pissutaavoq aalajangersakkap atorneqanngisaannarsimanera aamma aalajangersakkap inissiaqarnermut pissutsit ilaannut ilinniartut ineqarfiini inissianut naleqqiullugu tulluanngitsunut atassuteqarnera.

2.8 Ilinniartut ineqarfianni najugaqartup ilinniartut ineqarfianni inissiamik atuinera

Ilinniartut ineqarfianni najugaqartoq malittarisassat atuuttut malillugit attartornermut isumaqatigiissut malillugu allanut ilinniartut ineqarfianni inissiamik atuisanngilaq. Ilinniartut ineqarfianni najugaqartup taamaalilluni inissiaq attartortissanngilaa imaluunniit najugaqartitsinani ilinniartut ineqarfiinik aqutsisoqarfik akuersiteqqaarnagu. Ilinniartut ineqarfianni najugaqartoq aamma ilinniartut ineqarfianni inissiamik akuerineqqaarnani allanngueqqusaanngilaq aamma ilinniartut ineqarfianni malittarisassanik atuuttunik eqqortitsinissamut akisussaalluni, tamatumunnga assersuutigalugu ilinniartut ineqarfianni najugaqartup pulaartui.

Aamma matuersaat tammarnerni assersuutigalugu sapaatip akunnerata naanerini ilinniartut ineqarfianut isersinnaajunnaarneq pissutigalugu assersuutigalugu pigaartumik aggettitsinissamik pisariaqartitsisoqarnerani immikkut ittumik sullissinernut akiliinissaq pillugu apeqqummik malittarisassaliortumik aalajangersakkamik nutaamik ikkussuisoqarpoq.

2.9 Atuisinnaassutsip allanut tunniunneqarnera

Tassani peqarput atuisinnaatitaanerup allanut tunniunneqarneranut tunngasunik malittarisassanik atuuttunik ingerlatitseqqinneq. Taamaattorli aalajangersakkamik nutaamik ikkussisoqarpoq, taanna naapertorlugu ilinniartut ineqarfianni najugaqartoq, inoqutigiinnut ilaallutik meeqqat 18-it inorlugit ukiullit, aappaasoq imaluunniit inooqataasoq, ilinniagaqarnersiutit pillugit malittarisassani tamanna pillugu malittarisassat naapertorlugit akiliunneqarlutik angalasinnaatitaasut, ilinniartut ineqarfianni najugaqartup illoqarfiup ilinniarfeqarfiusut avataani sivikinnerpaamik qaammatini marlunni ilinniarnermut atatillugu suliffimmiinnerani imaluunniit atuarfimmiinnerani piffissani ilinniartut ineqarfianni inissiamik siunissami tigumminnissinnaalerlutik.

Ilinniartulli ineqarfianni inissiamik atuisinnaatitaaneq malittarisassani atuuttunisulli ilinniartut ineqarfianni najugaqartup aappaanut imaluunniit inooqataanut imaaliillaannaq suli tunniunneqarsinnaassanngilaq, tassa tamanna pillugu immikkut qinnuteqarnissamik tunngaveqassammat.

2.10 Taamaatitsineq atorunnaarsitsinerlu

Attartornermut isumaqatigiissut atorunnaassaaq, soorlu manna tikillugu malittarisassanut naleqqiullugu taamaattoq, taamaatitsinermi imaluunniit atorunnaarsitsinermi.

Ilinniartut ineqarfianni najugaqartup ilinniartut ineqarfianni najugaqarnissamut pinngitsoorani naammassineqartussat naammassiunnaarpagit ilinniartut ineqarfianni najugaqartumik taamaatitsinissamut ilinniartut ineqarfiinik aqutsisoqarfik pisussaavoq, tassunga ilanngullugu ilinniarneq naammassineqarpat imaluunniit unitsinneqarpat, taamaalilluni ilinniartut allat ilinniartut ineqarfianni inissiamik iluaquteqarsinnaallutik.

Atorunnaarsitsinermulli tunngaviussaaq ilaatigut annertussuseqartumik sumiginnaaneq. Aammattaaq nutaamik immikkoortiterineq ilanngunneqarpoq, taanna naapertorlugu attartornermut isumaqatigiissut taamaallaat ingerlaannartumik sunniuteqartumik atorunnaarsinneqarsinnaalluni, sumiginnaaneq pineqarpat, persuttaanerit imaluunniit ikiaroorartut tassunga ilaallutik.

Aammattaaq pisariillisaasoqarpoq taamaalilluni ilinniartut ineqarfianni najugaqartup sumiginnaanerata malitsigisaanik ilinniartut ineqarfiinik aqutsisoqarfiup taamaatitsineranut atatillugu siunissami taamaallaat ataasiaannarlugu mianersoqqusisoqarsinnaalluni.

Siunnersuutip aamma imaraa peqataaqqusaajunnaarneq pillugu malittarisassat allanngortinneqarneri, ikiaroorartut persuttaanerilluunniit akuutinneqarlutik sulianut naleqqiullugu taamaallaat maannakkut atorneqarnissaat siunersuutigineqarluni.

2.11 Ilinniartut ineqarfianni najugaqartup inissiamiit nuunnera

Ilinniartut ineqarfianni najugaqartup nuunneranut tunngatillugu aalajangersakkanik iluarsaassinermut atatillugu malittarisassanik pisariillisaasoqarpoq, tamatumunnga

pingaartumik pissutaalluni ilinniartup ilinniarfimmiiinnerata naanerata kinguninngua illoqarfimmik ilinniarfeqarfiusumik qimatsisarnera. Taamaattumik assersuutigalugu nuunnissaq sioqqullugu ilinniartut ineqarfianni inissiamik peqatigiilluni misissuisoqarnissaa pillugu piumasaqaateqarnissaq ajornakusoorluni.

Aammattaaq ilinniartut ineqarfianni najugaqartup qimataanik pigisanik peersinissaq immaqalu tunisaqarnissaq pillugu malittarisassanik aalajangersaasoqarluni.

2.12 Naammagittaalliuuteqarneq

Aammattaaq naammagittaalliuuteqarsinnaanermut naleqqiullugu erseqqissaasoqarpoq, tassa maannakkut, soorlu ilinniagaqarneriutinut aamma taamaattoqartoq, aalajangersaasoqarsimammat oqartussanit il.il. aalajangiiffigineqartut aalajangiinerit pillugit taamaallaat naammagittaallioroqarsinnaalluni.

2.13 Atortuulersitsineq

Siunnersuutip piffissami atulersinnissaa ulloq 1. august 2020-mut aalajangersarneqarpoq. Ineqarnermut akiliummut aamma atuinerit malittarisassanut tunngasut aalajangersakkat aatsaat piffissami kingusinnerusumi atulersinneqassasut siunnersuutigineqarpoq, tak. qulaani aallarniutaasumi tamanna pillugu allatat.

3. Aningaasaqarnikkut allaffissornikkullu pisortanut kingunerisassat

Immikkoortumi aallaqqaasiussami soorlu allanneqartoq siunnersuummi siullermik siunnerfigineqarput suliassaqarfimmi malittarisassanut atuuttunut naleqqiullugu iluarsaassinerit tulluarsaanerillu arlallit, atortunut pigineqartunut naleqqiullugu imaallutik pitsaanagerusumik atuisoqarnissaanik annertunerusumik isiginninnerusoqarluni. Siunnersuut taamaattumik aningaasaqarnikkut allaffissornikkulluunniit pisortanut kinguneqartitsinngilaq, pissutigalugu inatsisip atuuttup malitseriigaanik pisussaaffiusut sinnerlugit kommuninut imaluunniit pisortani oqartussanut allanut siunnersuut pisussaaffiliinngimmat.

4. Aningaasaqarnikkut allaffissornikkullu inuussutissarsiuteqartunut sunniutissai.

Siunnersuut inuussutissarsiortunut aningaasatigut kinguneqartussatut ilimagineqanngilaq.

5. Avatangiisinut, pinngortitamut inuillu peqqissusaannut kingunerisassat

Siunnersuut namminermit inuit peqqissusiannut naleqqiullugu annertunerusunik kinguneqartitsinngilaq. Ilinniartut ineqarfiinik ingerlaavartumik ineriartortitsinermi taamaattoq inuit peqqissusaannut tunngasunik allatigut suliniuteqartoqarsinnaavoq.

6. Innuttaasunut kingunerisassat

Siunnersuummi siunertaavoq malittarisassat pillugit pitsaanagerusumik ilinniartunut paasisaqartitsinissaq. Tamatuma saniatigut siunnersuutip siunertaraa ilinniartut ineqarfiinut tunngasutigut pisariillisaanissaq aamma ilinniartunut iluaqutaasumik pisuussutit pigineqareersut pitsaasumik iluaqutiginnissaasa qulakkeerneqarnissaa.

7. Kingunerisinnaasai annertuut allat

Siunnersuut pingaarutilinnik allanik kinguneqassasoq naatsorsuutigineqanngilaq.

8. Oqartussaasut kattuffiillu il.il. tusarniaavigineqarnerat

Siunnersuut piffissami 5. april 2019-imiit 10. maj 2019-imut www.naalackersuisut.gl -imi Naalackersuisut tusarniaanermi nittartagaani tusarniutigineqarsimavoq.

Tusarniaanermi atortut aamma tusarniaaffigineqartunut ukununga toqqaannartumik nassiunneqarsimapput: Naalackersuisut Siulittaasuata Naalackersuisoqarfia

Aningaasaqarnermut Naalackersuisoqarfik

Ineqarnermut Attaveqarnermullu Naalackersuisoqarfik

Pinngortitamut, Avatangiisinut Ilisimatusarnermullu Naalackersuisoqarfik

Peqqissutsimut Naalackersuisoqarfik

Aalisarnermut Piniarnermut Nunalerinermullu Naalackersuisoqarfik

Inuussutissarsiornermut Suliffeqarnermullu Naalackersuisoqarfik

Isumaginninnermut Inatsisinillu Atuutsitsinermit Naalackersuisoqarfik

Aatsitassanut Suliffeqarnermullu Naalackersuisoqarfik

Sulisitsisut (GE)

SIK

Kommune Kujalleq

Kommuneqarfik Sermersooq

Qeqqata kommunia

Kommune Qeqertalik

Avannataa Kommunია

NUSUKA

IMAK

AK

Nanu Børn

Meeqqat Inuunerissut

MIPI – Meeqqat Inuusuttuaqqallu pillugit ilisimasaqarfik

Inuit Pisinnaatitaaffii pillugit Siunnersuisoqatigiit

Inuit Pisinnaatitaaffiinut Institutti

Knud Rasmussenip Højskolia

Sulisartut Højskoliat

NPK

Avannaani Ilinniarnertuunngorniarfik

Qeqqani Ilinniarnertuunngorniarfik

Kalaallit Nunaanni Teknikimik Ilinniarkfik (KTI)

Campus Kujalleq

INUILI

Kalaallit Nunaanni Imarsiornermik Ilinniarkfik

NI-Nuuk
 Peqqinnissamut Ilinniarfik
 Ilisimatusarfik
 Perorsaanermik Ilinniarfik
 Savaatilinnigorniat Ilinniarfiat
 Eqqumiitsuliornermik Ilinniarfik
 ILI ILI
 Avalak
 ASG
 Siunnersuisartunik Ilinniarfik
 MIO

Tusarniaanerup naammassereernerani tusarniaavigineqartunit ukuninnga akissutit tiguneqarput:

Ineqarnermut Attaveqarnermullu Naalakkersuisoqarfik, Inuit Pisinnaatitaaffinut Institutti aamma Avannaata Kommuniyani Majoriaq, Sulisitsisut (GE), Naalakkersuisut Siulittaasuata Naalakkersuisoqarfia, Innarluutilinnut Illersuisoqarfik, Isumaginninnermut Inatsisinillu Atuutsitsinermit Naalakkersuisoqarfik, Meeqqat Illersuisuat aamma Kommune Kujalleq. Taakku saniatigut Ineqarnermut Attaveqarnermullu Naalakkersuisoqarfik, Inuit Pisinnaatitaaffinut Institutti aamma Avannaata Kommuniyani Majoriaq allapput siunnersuummut oqaaseqaateqarnatik.

Tusarniaanermut akissutit siunnersuummi ataasiakkaanik allanngortitsisariaqarnernik kinguneqarsimapput. Meeqqat Illersuisuannit tusarniaanermi akissut tunuliaqutaralugu siunnersuummi § 33-mut nassuiaatini ilassutigineqarpoq aalajangersakkamut aamma pissutaasoq inuup ajoqusersinnaanera ilinniartut ineqarfianni inissiami ilinniartullu inissiaqarfiani ajoqusiineq kisimi pineqarnani. Aammattaaq GE-p tusarniaanermi akissutaata nanginneratut kingumut kukkunersuisoqaqqissimavoq. Aammattaaq Naalakkersuisut Siulittaasuata Naalakkersuisoqarfiata tusarniaanermi akissutaata malitsigisaanik siunnersuummut nalinginnaasumik nassuiaatini immikkoortoq siulleq titarnerlu siulleq peerneqarlutik. Kiisalu aammattaaq oqaatigineqassaaq siunnersuutip inaarsarneqarnerani nalilerneqarsimammat pissusissamisuussasoq aalajangersakkat ilaasa allaffissornikkut aqunneqartuunissaat, taamaattumillu allannguuteqartitsisoqarluni § 10, imm. 2, aamma 3, § 19, imm. 2, § 20, imm. 2 aamma § 21-imi.

	Tusarniaa- vigineqar- toq	Nassuiaatit	Ilanngullu- git suliarine- qarput	Tunngavilersuineq
1	Ineqarner- mut Attaveqa-	Naalakkersuisoqarfiit siunnersuut pillugu oqaaseqaateqanngillat.	Naamik	Allannguinnissamut tunngavissiiingilaq.

	qatigiin- nermullu Naalakker- suisoqarfik			
2	Inuit Pisinnaatita affiinut Institutti	Institutti oqaaseqaateqanngilaq.	Naamik	Allannguissamut tunngavissiiingilaq.
3	GE	Sulisitsisut GE siunnersuutip imarisaanut oqaaseqaateqanngillat, kisianni uparuarlugu siunnersuut kukkunersiorlugu atuarneqartariaqartoq.	Aap	Siunnersuut kukkunersiorluni atuaqqinneqarsimavoq.
4	Naalakker- suisut Siulittaasua- ta Naalakker- suisoqarfia	Siunnersuutip piareersarneranut attuumassuteqanngin- nera pissutigalugu siunnersuummi nalinginnaasumik nassuiaatini immikkoortoq siulleq titarnerlu siulleq peerneqartariaqarput	Aap	Nalinginnaasumik nassuiaatini immikkoortoq pineqartoq oqaaseqaat naapertorlugu allanngortinneqarpoq, tassa nalinginnaasumik nassuiaatini immikkoortut pingajuanni tamarmiusumi siunnersuutip tunuliaqutaanut tunngasuummat.
5	Innarluuti- llit illersuiso- qarfiat	Kikkut tamarmik piginnaalersitsisumik ilinniagaqarnissamut periarfissaqarnissaasa qulakkeerusunneqarnera akuerineqarpoq taamaalilluni aamma inuit innarluutillit ikiuutitik ilinniartut ineqarfiini ikkussuinissaannut periarfissaq eqqarsaatigineqarluni, tak. § 33.	Naamik	Allannguissamut tunngavissiiingilaq.

5.1	Innarluuti- llit illersuiso- qarfiat	§ 33 isumaqarnarpoq allaffissornikkut teknikkikkullu annertuumik pisariusoq. Annilaangassutigaarput akuersisoqarnissaa pillugu qinnuteqarniarnermi allaffissorneq pisariusoq inuit innarluuteqartut qinnuteqarnissamut tunuarsimaartitsissasoq, suleriaatsip sivisunera paasiuminaanneralu pissutigalugu.	Naamik	Tassani pineqarpoq ilinniartut ineqarfii pillugit nalunaarummi atuuttumi § 30-imi "pisinnaanermik- aalajangersakkatut" taaneqartumik ingerlatitseqqinneq. Tassani pineqarpoq ilinniartut ineqarfianni najugaqartoq ikiuutunik il.il. ikkussuinikkut ilinniartut ineqarfianni inissiami allannguinnissamut akuersissummik ilinniartut ineqarfiinik aqutsisoqarfimmut qinnuteqarsinnaanerat. Suleriaaseq sivisusutut pisariusutullu nalilerneqanngilaq, tassa tassani taamaallaat ikkussugassat suut ikkussuuneqarusunnersut ilinniartut ineqarfiinik aqutsisoqarfimmut nassuiaanissaq pineqarmat. Aammattaaq annertunerusunik allannguneq ilinniartut ineqarfianni inissiami aamma ilinniartut ineqarfiata illutaanut annertuumik ajoqusiisinnaaneranut taamaalillunilu siunissami ilinniartut ineqarfianni najugaqartussanut ajoqusiisinnaaneranut innersuussisoqarluni.
-----	---	---	--------	---

5.2	Innarluuti- llit illersuiso- qarfiat	Nuunnerup kingorna inissiap aallaqqaamm isikkuatut pilerseqqinnissaa ilinniartut ineqarfianni najugaqartup isumaginninnissaa teknikkikkut sapernartutut aningsaatigullu oqimaatsutut isikkoqarpoq.	Naamik	Tassani pineqarpoq ilinniartut ineqarfiinik aqutsisoqarfik aalajangersimasumik naliliinerup kingorna ilinniartut ineqarfiani inissiamik annertunerusumik allannguisoqarnissaa akuersisoqarnissaa piumasaqarsinnaalluni inissiap aallaqqaamm isikkuatut pilerseqqinneqassasoq aammalu kommunalbestyrelsip akuliunneratigut ikiuutit ikkussuunneqarnerat sioqqullugu ilinniartut ineqarfiani inissiap utertinnissaa aningsaartuutitut qularnaveeqqusiisoqarluni. Kommunip akuliunnera pillugu apeqqut isumaginninnermi malittarisassatigut malittarisassaqaartinneqar- poq. Pilerseqqinneqarnissaa piumasaqaat aamma utaqqiisaasumik illusimatitsinerup pineqarnera, aamma ilinniartut ineqarfianni inissiap piffissap ungasinngitsup iluani ilinniartut ineqarfianni najugaqartumut nutaanut atugassanngortinneqarnis-
-----	---	---	--------	--

				saa, qularnanngitsumik assinganik pisariaqartitsinngitsoq, tassunga ikkussukkat akornutaasinnaaneri tunuliaqutaralugu isigineqassaaq.
5.3	Innarluuti- llit illersuiso- qarfiat	Ilinniartut ineqarfianni inissiap tulluarsarnissaanut periarfissap pigiinnarnissaa siunnersuutigineqarpoq, aallaqqaammullu isikkuanut pilerseqqinnissaanut piumasaaqat peerneqarluni	Naamik	Tamanna ilinniartut ineqarfiani najugaqartunut allanut ilinniartut ineqarfiani inissiamik tiguisissamut naleqqutissanngilaq. Aammattaaq tusarniaanermi akissummut nr. 5.1-imut aamma 5.2-mut oqaaseqaatinut innersuussisoqarpoq.
5.4	Innarluuti- llit illersuisoqar fiat	Nutaanik sanaartornermi ilinniartut ineqarfiisa ikinnerpaamik 10 %-ii inunnut innarluutilinnut atugassanngortinneqar- nissaat inatsisitigut Naalakkersuisunit qulakkeerneqassasoq siunnersuutigineqarpoq. Taamaaliornikkut inuit innarluutillit inooqataanermi ilanngutitinneqarnerat ilinniartutullu inuunermi peqataasinnaanerat qulakkeerneqarsinnaa- voq.	Naamik	Oqaaseqaatip imarisaa 100 %-imik naammassineqarsimavoq, tassa sanaartornermi malittarisassanit atuuttunit takuneqarsinnaammat nutaamik sanaartornerit imatut illut innarluutilinnit atorneqarsinnaasunngorlu- git ilusilerneqassasut.
6	Isumagin- ninnermut Inatsisinillu Atuutitsi-	Ilinniartut ineqarfiini ineqarnermut akiliutip aalajangersarnissaanut piumasaaqatit pillugit	Naamik	Oqaaseqaatit siunnersuummik allannguissamut pissutissaqalersitsinngillat.

	nermut Naalakker- suisoqarfik	aalajangersakkanik aalajangersaasoqarnera pitsaasuvoq. Aammattaaq tulluarluni ilinniartut ineqarfianni ineqarnermut akiliut akigititatut tulluarsarnissaannut procenti malillugu iluarsineqartassasoq.		
6.1	Isumagin- ninnermut Inatsisinillu Atuutitsi- nermut Naalakker- suisoqarfik	Ineqarnermut akiliutip naatsorsornissaanut najoqqutassaq erseqqissoq aalajangersarneqalerpat ilinniartut ineqarfiini ineqarnermut akiliut appassissoq isiginiarneqassasoq kaammattuutigineqar- poq. Ineqarnermut akiliut maannakkut appassissumiittoq pisariaqartumit sivisunerusumik ilinniarnissamut ilinniartunut kajumissaarivoq. Peqatigisaanillu naleqqunnani innuttaasut allat nuussanik isertitaqartut nalinginnaasumik ineqarnermut akiliummik akiliisassasut, ilinniartut akikinnerujussuarmik ineqarnermut akiliisarlutik.	Naamik	Nassuiaat ineqarnermut akiliutip aalajangersarnissaanut malittarisassanut, tak. § 18, atassuteqarpoq, aatsaat piffissami kingunerusukkut piviusunngortinneqartus- sat, tak. § 53. Tassanngali oqaatigineqassalluni aamma ilinniartut ineqarfianni najugaqartup isertitaani pissutsit aamma ilinniartut ineqarfianni inissiap qanoq ittuunera naatsorsuinnermut ilaatinneqarumaarmata. Peqatigisaanik oqaatigineqassaaq ilinniartut ineqarfiat utaqqiisaasumik illusimaffiummat. Taamaalilluni piffissani ilinniarnermik ingerlatsiviusumi ineqarnermut akiliutit pitsaasumik qaffassusillit iluaqutigineqarsinnaallu- tik.
6.2	Isumagin- ninnermut Inatsisinillu	Ilinniartitaanermut, Kultureqarnermut Ilageeqarnermullu	Naamik	Nassuiaatit ineqarnermut akiliutip aalajangersarnissaanut

	<p>Atuutitsi- nermut Naalakker- suisoqarfik</p>	<p>Naalakkersuisoqarfiup sillimaffigisariaqarpaa assersuutigalugu ilanggaateqarnikkut sulineq akilersinnaasariaqassa- soq. Ineqarnermut akiliutit isertitanit iluarsineqartarnera taamaalilluni akissarsiaqarluni sulinnginnissamut kajumissaatitut atorneqassanngilaq.</p>		<p>malittarisassanut, tak. § 18, atassuteqartinneqarput, aatsaat piffissami kingunerusukkut piviusunngortinneqartus- sat, tak. § 53. Tassunga oqaatigineqassaaq ineqarnermut akiliummik akiliinerup qaffasissusia aallaaviatigut ilinniartup ilinniarnini pissutigalugu ulloq naallugu suliffeqarsinnaannginnera- nut atassuteqarmat. Ilinniartut ineqarfianni ineqarnermut akiliut assersuutigalugu ilinniagaqarnersiutinut assersuunneqarnerani siunertaavoq piffissami ilinniarfiusumi suliffeqarnani ilinniartut ilinniarnerninik aallussinissaanik qulakkeerinninniarpoq.</p>
6.3	<p>Isumagin- ninnermut Inatsisinillu Atuutitsi- nermut Naalakker- suisoqarfik</p>	<p>Ilinniartitaanermut, Kultureqarnermut Ilageeqarnermullu Naalakkersuisoqarfik § 4, imm. 1, nr. 4-mut immikkut akuersinissamut periarfissamik ikkussisariaqarpoq, ilinniagaqartoq allatigut inissiamik qulakkeerinnissatillugu siusissukkut akiitsoqalinnginnissaq siunertaralugu.</p>	Naamik	<p>Aalajangersagaq immikkut akuersinissamut malittarisassamik imaqarpoq, taamaattoqartillugu ilinniagaqartoq ilinniartut ineqarfiinik aqutsisoqarfimmi akiliisarnissamik isumaqatigiissuteqassallu- ni taannalu eqquutsissallugu. Tamatuma saniatigut aalajangersagaq annertuumik akiligassatigut kinguaattoorfiusunik</p>

				ajornartorsiutinut taaneqartunut siunnersuummi nassuiaatit tunuliaqutaralugit isigineqassaaq.
6.4	Isumagin- ninnermut Inatsisinillu Atuutitsi- nermut Naalakker- suisoqarfik	Siunnersuummi §§ 14- ip, 15-ip aamma 18-ip aamma taakku naapertorlugit malittarisassat atulersinneqartut piffissami atuutilerfissaannut tunngasunik ikaarsaarnermi aaqqissuussisoqarnissaa siunniunneqarnera akuerineqarpoq, tak. § 53.	Naamik	Oqaaseqaatit siunnersuummik allannguissamut pissutissaqalersitsinngillat.
6.5	Isumagin- ninnermut Inatsisinillu Atuutitsi- nermut Naalakker- suisoqarfik	Ineqarnermut akiliutip aalajangersarnissaanut piumasaqaatit nutaat malitsigisaatut ilinniartut ineqarfiini inissiani ineqarnermut akiliutit qaffasinnerunerisa kingunerisinnaavaa ineqarnermut tapiissutinut aningaasartuutit qaffasinnerulerneru. Inatsisissatut siunnersuummut nalinginnaasutut nassuiaatinut taanna ilanngunneqassaaq. Tamatuma saniatigut inatsisissatut siunnersuutip kingunerisinnaallugu ineqarnermut tapiissutit	Naamik	Taanna apeqqut aatsaat §§ 15-ip aamma 16-ip atulersinneranut atatillugu isummerfigineqartussaas- saaq. Tassunga oqaatigineqassaaq ineqarnermut tapiissutit pillugit malittarisassat ineqarnermut akiliutip iluarsineqarneranut ilaatinneqassanersut siunnersuummi isummertoqanngimmat. Nalinginnaasumik nassuiaatinit takuneqarsinnaavoq aalajangersakkat taaneqartut immikkoortuni allani suliniutit eqqaanartut pissutigalugit

		<p>pillugit inatsisini allanguisoqarsinnaa- voq, tamannalu aamma nalinginnaasumik nassuiaatinit takuneqarsinnaasaria- qarluni.</p>		<p>kingusinnerusukkut aatsaat piviusunngortinneqarumaa rtut. Tamanna isumaqarpoq malittarisassat piviusunngortinneri, tassunga ilanngullugu aalajangersimasunik malittarisassaqartitsineq, suliniutinut eqqaanartunut taakkununga naleqqiullugu ataqatigiissitsinissaq utaqqineqartariaqartoq.</p> <p>Peqatigisaanillu nassuiaatinit aamma takuneqarsinnaalluni taamatut malittarisassaliorneq suliniutitut immikkoortutut isigineqassasoq siunnersuummut matumunnga ilaanani tamannalu Namminersorlutik Oqartussat inissiaataasa kommuninut tunniunneqarnissaannik pilarsarusiornermut atatillugu immikkut sammineqarnissaa naatsorsuutigineqassalluni.</p>
6.6.	<p>Isumagin- ninnermut Inatsisinillu Atuutitsi- nermut Naalakker- suisoqarfik</p>	<p>Aammattaq nassuiaatini nalinginnaasuni ilinniartut ineqarfiit pillugit inatsisip taassuma nutaap aamma ineqarnermut tapiissutit pillugit inatsisip akornanni</p>	Naamik	<p>6.5-imi nassuiaatinut oqaaseqaatinut qulaaniittunut innersuussisoqarpoq.</p>

		ataqatigiittoqarnera pillugu immikkoortoq annikitsoq ilanngunneqarluni.		
6.7	Isumagin-ninnermut Inatsisinillu Atuutitsi-nermut Naalakker-suisoqarfik	Tamatuma saniatigut inatsisissatut siunnersuutip kingunerisaatut ineqarnermut tapiissutit pillugit inatsisini allannguuteqartoqassalluni, tamanna aamma nassuiaatini nalinginnaasuni takuneqarsinnaasariaqarluni.	Naamik	6.5-imi nassuiaatinut oqaaseqaatinut qulaaniittunut innersuussisoqarpoq.
7	Meeqqat Illersuisuat	Inunnut ataasiakkaanut inuiaqatigiinnullu tamarmiusunut iluaqutaasussamik piginnaasaqalersitsisumik ilinniarnissamat qulakkeerinninniarnermut atatillugu Nunatsinni ilinniartut ineqarfiinut tunngasut aalajangiisuunerannik nassuerutiginninneq aallaavigalugu siunnersuusiortoqarnera Meeqqat Illersuisuata naammagisimaarinninini oqaatigaa.	Naamik	Siunnersuummik allannguissamat tunngavissiiingilaq.
7.1	Meeqqat Illersuisuat	18-it inorlugit ukiullit ilinniartut qanoq siunnersuummut ilaatinneqarpat?	Naamik	18-it inorlugit ukiullit ilinniagaqartut ilinniartut 18-it sinnerlugit ukiullit assigalugit assigiinnik pisinnaatitaaffeqarput. Innersuussinissamat tulleriarinissamullu piumasaqaatinik

				<p>aalajangersaaneq pillugu siunnersuummi § 7-imut allatigut nassuiaatinit takuneqarsinnaavoq ilinniartunut immikkoortunut aalajangersimasunut, tassunga ilanngullugit ilinniagaqartut 18-it inorlugit ukiullit, ilinniartut ineqarfiini inissianik aalajangersimasunik tunineqarnissaannut aalajangersagaq atorneqarsinnaasoq. Tamanna assersuutigalugu tassaasinnaavoq ilinniartut ineqarfiini inissiat immikkut nakkutigineqartut.</p>
7.2	Meeqqat Illersuisuat	<p>§ 16-imi tassungalu nassuiaammi inoqutigiinni marlunnik pilersuisoqarnera taamaattussatut tiguneqarsinnaanera aarlerinarsinnaavoq.</p>	Naamik	<p>Ataatsimit amerlanerusunik pilersuisoqarnera pillugu aalajangersakkami naatsorsuutigineqanngilaq. Imm. 1-imi nr. 3 "tassunga ilanngullugu inoqatigiinni isertitatigut pissutsit" taamaattumik imatut paasineqassanngilaq aalajangersakkamik pilersuisut arlallit tunngavigineqartut.</p>
7.3.	Meeqqat Illersuisuat	<p>Ilinniartut ineqarfianni najugaqartup inoqutit ilagisaasa amerlassusaat akiliunneqarluni angalanissamut pisinnaatitaanermut qanoq ataqatigiinnera siunnersuummi § 19-imi</p>	Naamik	<p>Siunnersuummi § 19-imi ilinniagaqarnerasiutit pillugit malittarisassanut innersuussisoqarpoq. § 19-imut nassuiaatinit takuneqarsinnaavoq tamanna pillugu malittarisassat</p>

		nassuiaatiniluunniit erseqqissumik allaaserineqarsimanngilaq.		erseqqinnerusut ilinniagaqarnersiutit pillugit Namminersorlutik Oqartussat nalunaarutaat nr. 9, 19. juli 2017-imeersumit takuneqarsinnaasut. Aalajangersakkamut aalajangersimasumut naleqqiullugu nalunaarummi § 37-mut innersuussisoqassaaq, tassani meeqqanut aappaasunullu imaluunniit inooqataasunut akiliunneqarluni angalanerit pillugit malittarisassat erseqqissut aalajangersarneqarlutik.
7.4	Meeqqat Illersuisuat	Siunnersuummi § 33-mut nassuiaatit aalajangersagaq aamma inuup ajoqusersinnaaneraniq pissuteqarnera pillugu ilassummik imaqartariaqarpoq ilinniartut ineqarfianni inissiami aamma ilinniartut ineqarfiata illutaata ajoquserneqarnissaat kisimi pineqarnani.	Aap	Oqaaseqaat ilanngunneqarpoq, tassa aalajangersagaq aamma inuup ajoqusersinnaaneranut atatillugu isigineqassammat.
7.5	Meeqqat Illersuisuat	Siunnersuummi § 40-mut naleqqiullugu meerartaarnermut atatillugu sulinngiffeqarallarnerup nalaani naartusumut suut atugassaasut aaqqiinerit allat suuneri pillugit	Naamik	Tassunga oqaatigineqassaaq ilinniartut ineqarfiini inissiat ilinniartunut avataaneersunut atugassanngortinneqarmata. Ilinniagaqarnersiutit pillugit Namminersorlutik Oqartussat

		paasissutissiisoqarnis- saanik ujartuisoqarpoq.		nalunaarutaanni nr. 9, 19. juli 2017-imeersumi § 38- mit takuneqarsinnaavoq ilinniagaqartoq naartunermut atatillugu sulinnigiffeqarallassapat illoqarfigisami naartunermut inatsisip ingerlanneqarnissaa siunertaralugu illoqarfigisaanut akiliunneqarluni angalanissaa akuersissutigineqassasoq. Tamatuma saniatigut aalajangersakkamit takuneqarsinnaavoq naartunermut atatillugu sulinnigiffeqarallarnep naanerata kingorna illoqarfimmut ilinniarfiusumut utimut ilinniartoq aamma angalatinneqassasoq.
7.6	Meeqqat illersuisuat	Meeqqat Illersuisuat siunnersuummut tapersersuivoq.	Naamik	Oqaaseqaat siunnersuummik allannguissamut pissutissaqalersitsinngilaq.
8	Kommune Kujalleq	Malittarisassanut atuuttunut tunngatillugu siunnersuummi nassuiaatinut nalinginnaasunut naleqqiullugu, tak. ilinniartut ineqarfii pillugit Namminersornerullutik Oqartussat nalunaarutaat nr. 18, 1. november 2007- imeersoq, ilinniartut ineqarfiinut tunngasuni	Naamik	Tassunga oqaatigineqassaaq Inatsisartut inissianik attartorneq pillugu inatsisartut peqqussutaanni nr. 2, 12. maj 2005- imeersumi imm. 1, nr. 3 naapertorlugu § 3, imm. 3- mi UPA 2005-imi piginnaatitsinermik aalajangersakkamik aalajangersaammata. Aalajangersakkamit takuneqarsinnaavoq

		<p>malittarisassanik aalajangersaanissamut attartorneq pillugu peqqussummi tunngavissaqartoq kommunimit qularutigineqarpoq. Nalunaarut atuuttoq taamaattumik Namminersorlutik Oqartussat ilinniartut ineqarfiinik piginnittuunerisa malitsigisaanik inissiinermik isiginninnertut taamaallaat tunngaviusinnaapput.</p>	<p>Naalakkersuisut Kalaallit Nunaanni Kommunit Kattuffiat isumasioreerlugu malittarisassanik erseqqinnerusunik aalajangersaasinnaasut, tassunga ilanngullugu ilinniarnermut atasumik Namminersornerullutik Oqartussani aamma kommunit ilinniartunut atugassanngortinneqartu- nut inissianut tunngasut piumasaqaatit naammassisassallu.</p> <p>Aalajangersagaq UPA 2015-imi attartorneq pillugu peqqussutip aappassaaneerneqarnera- nut atatillugu allannguutissatut siunnersuutikkut ikkunneqarpoq. Tassunga atatillugu allannguutissatut siunnersuummut nassuiaatinut atatillugu tamatum kingunerissagaa "Naalakkersuisut Kalaallit Nunaanni Kommunit Kattuffiat isumasioreerlugu inissiat pillugit malittarisassanik aalajangersaasinnaasut, tassunga ilanngullugu ilinniarnermut atasumik ilinniartunut atugassanngortinneqartuni ilinniartut ineqarfiini ineeqqat inissiallu. Naalakkersuisut ilaatigut</p>
--	--	---	--

				<p>inissianik taamatut ittunik innersuussineq, attartortitsineq, attartornermi iluarsiiisoqarnissaanik kalerriinissaq, iluarsaassinerit, attartorneqartunik atuineq, attartorneq, taamaatitsineq, atorunnaarsitsineq, nuunneq, qularnaveeqqusiinermik akiliineq, innaallagiasaq, imeq kiassarnerlu il.il. pillugit malittarisassanik aalajangersaasinnaallutik". Taamaattumik ilinniartut ineqarfii pillugit nalunaarummut atuuttumut tunngavisoq piginnaatitsineq pillugu qularutissaqanngilaq.</p>
8.1.	Kommune Kujalleq	<p>Kommuni isumaqanngilaq attartorneq pillugu peqqussummik tunngaveqarluni kommunit ilinniartut ineqarfiini inissiat pillugit nalunaarummi malittarisassanik aalajangersaasoqarsinna asoq tamannalu aamma inissiisarnermik isiginninnermi tunngaveqarsinnaanngit soq.</p>	Naamik	<p>Tusarniaanermi akissummut nr. 8-mut qulaani oqaaseqaammut allanneqartumut innersuussisoqarpoq. Aammattaaq oqaatigineqassalluni kommunit pigisaat ilinniartut ineqarfii pillugit malittarisassanik aalajangersaasoqanngimmat. Ilinniartut ineqarfii pillugit nalunaarummi atuuttumi Namminersorlutik Oqartussat pigisaat ilinniartut ineqarfii kisiisami malittarisassaliorfigineqass asut taamanikkut</p>

				Naalackersuisuusimasut aalajangersimapput. Tamanna pivoq tamanna pillugu taamanikkut KANUKOKAp aperinerani akissuteqarmat nalunaarummut ilaanissaq tulluurtut isigineqanngitsoq.
8.2	Kommune Kujalleq	Ilinniartut ineqarfiinut tunngasuni inatsisitigut iluarsiiisoqarniarluni Naalackersuisut suliniuteqarnerat kommunimit tikilluaqquneqarpoq.	Naamik	Oqaaseqaat siunnersuummik allannguissamut pissutissaqalersitsinngilaq.
8.3	Kommune Kujalleq	Inatsisip taamaallaat Namminersorlutik Oqartussat pigisaat ilinniartut ineqarfiinik malittarisassaliornera kommunimit naammagisimaarneqarpoq.	Naamik	Oqaaseqaat siunnersuummik allannguissamut pissutissaqalersitsinngilaq.
8.4	Kommune Kujalleq	Kommunimit siunnersuutigineqarusuppoq Namminersorlutik Oqartussat pigisaat ilinniartut ineqarfiini sinneqartut pigineqarsinnaasut kommuninut atugassanngortinneqarqarsinnaassasut.	Naamik	Siunnersuummit takuneqarsinnaavoq ilinniartut ineqarfiini piginnaasat taamaallaat ilinniagaqartunit atorneqassasut. Tamatuma saniatigut siunnersuummi § 1, imm. 3-mit takuneqarsinnaavoq immikkorluinnaq pisoqartillugu, tassunga ilanngullugu inooqatigiinnikkut pissutsit pingaartumik eqqarsaatigalugit, aamma inissaqartitsinikkut tamanna akuerineqarsinnaappat,

				avataaneersuunngitsumik piffissamut killeqartumut ilinniartut ineqarfiini utaqqiisaasumik ineqartinneqarsinnaasoq. Tamatuma assingaa immikkorluinnaq pisoqartillugu illoqarfimmi ilinniarfeqarfiusumi nunaqavissut ilinniartut illusimatinneqarsinnaasut.
8.5	Kommune Kujalleq	Kommuni isumaqanngilaq § 3 ingerlateqqinneqartariaqartoq. Kommunit pigisaannik ilinniartut ineqarfii pillugit nalunaarutikkut malittarisassaliortoqarsinnaaneranut aalajangersagaq ammaassivoq tamannalu kommunip tungaaniit noqqaasoqarnani pisinnaanera kommunip tunngaviatigut eqqarsarnartuutillugu. Kommunit pigisaannik ilinniartut ineqarfii pillugit malittarisassat kommunit ilanngutitinnerannik tunngaveqartuunissaa nassuiaatinit takuneqarsinnaagaluartoq kommuniniit noqqaasoqarneratigut aalajangersakkap taamaallaat atorineqarsinnaaneranut tamanna	Naamik	Piginnaatitsineranut aalajangersagaq atuuttoq, ulloq 1. juli 2005-imi atulersinneqartoq taamaaqataanik imaqartoq ukiunit 14-imi aalajangersakkat atuussimaneranit atorineqarsimanngilaq. Aamma aalajangersakkap oqaasertaanit takuneqarsinnaavoq aalajangersakkap atorineqarnissaanut tunngaviusoq kommunit ilanngutitinneqarnissaat.

		qularnaveeqqusiiertut kommunimit isigineqanngilaq.		
8.6	Kommune Kujalleq	§ 3-mut nassuiaatini "Namminersorlutik Oqartussat ilinniartunut inissiaataat pillugit malittarisassatut annertutigisumik kommunini ilinniartunut ineqarfiit malittarisassaqaartinneqa ssasut" allanneqarnera kommunimit isumaqatigineqanngilaq. Taamaattumik siunnersuutigineqarpoq aalajangersagaq peerneqassasoq imaluunniit oqaasertai allanngortinneqarlutik, taamaalilluni kommunini ilinniartunut ineqarfinnik qitiusumiit malittarisassaqaartitsineq kommunit noqqaanerisigut taamaallaat pisinnaassasoq aamma inatsit annertusineqarluni kommunini ilinniartut ineqarfiini inissiat tamakkiisumik ilaannakuusumilluunniit ilaatinneqalerlutik.	Naamik	§ 3-mi erseqqissumik malittarisassaliorinnaa- nermut ilaatinneqanngilaq Inatsisartut Naalakkersuisunut piginnaatitsinnaaneran- nut naleqqiullugu nalornissuteqarnissaq. Tassunga ilanngutissaaq nalunaarutikkut immikkut malittarisassaliorneq kommuni pissutsit pissutaasinnaasut ataasiakkaat eqqarsaatigisassat atorlugit ilusilersorneqarsinnaassa- soq.
8.7	Kommune Kujalleq	§ 5-ip § 40-mut assersuunneranut naleqqiullugu kommuni isumaqarpoq sulisunut inissiamut pisinnaatitaaffiup	Naamik	Oqaaseqaat siunnersuummi pingaarnertut immikkoortut arlaannut naleqqiullugu

		<p>aamma ilinniagaqarneq aqutigalugu inissiamut pisinnaatitaaffiup akornanni ataqatigiissitsineq eqqarsarnartuusooq, tassa kikkut inissiamut innersuussinissamut pisussaaffeqarnerat pillugu sulisitsisut aamma ilinniartut ineqarfiinut innersuussisartut oqartussat akornanni tulluanngitsumik oqallinnermik kinguneqarsinnaammat.</p> <p>Pisumi tassani inissiaq qanoq kissaatiginerlugu atorfeqartup ilinniagaqartullu nammineq toqqarsinnaasariaqar- paat. Tamatuma saniatigut sulisunut inissianut utaqqisoqarnerata malitsigisaanik atorfeqartup utaqqiisaasumik illusimatinneqarnerani pissutsinut aalajangersakkami sillimasoqarunarnani.</p>		<p>paatsoormik tunngaveqarunarpooq.</p> <p>Taamaalilluni siunnersuummi pingaaruteqarlunnartuu- voq illusimaffissamik pisariaqartitsisoqarnissaa.</p> <p>Taamaalilluni inissiamut allamut periarfissaqaraanni, tassunga ilanngullugu assersuutigalugu sulisunut inissiaq, taamaaqataanik pitsaasumik inissisimanngitsumut ilinniartumut allamut ilinniartut ineqarfiani inissiamik pisinnaatitaaffik nuunneqassaaq.</p> <p>Inuiaqatigiit taamaalillutik ilinniartut ineqarfiani inissiamik amigaateqarneq pissutigalugu ilinniartut ilinniarnerminnik unitsitsiinnarnissaannut akissaqanngillat, ilinniartut allat sulisunut inissiamut periarfissaqartut sulisunut inissiamut taarsiullugu iliniartup periarfissaanut ilinniartut ineqarfiani inissiamik najugaqarnissaq suli toqqarusummassuk.</p>
8.8	Kommune Kujalleq	<p>§ 8, imm. 3-mut naleqqiullugu tamanna pillugu tamakkiisumik ilaannakuusumilluunniit Naalakkersuisut allakkatigut</p>	Naamik	<p>Aalajangersakkamit takuneqarsinnaavoq tamanna taamaallaat pisinnaasoq tamanna pillugu allakkatigut isumaqatigiissuteqarnik-</p>

		<p>isumaqatigiissuteqarnik kut ilinniartut ineqarfii pillugit aqutsinermik ilaatigut kommunalbestyrelsinit isumagisassanngortinne qarsinnaaneranut naleqqiullugu kommunit tunngavigineqarpoq kommunit pineqartut taamaattoqartillugu suliaq pillugu aningaasatigut taarsiiffigineqassasut.</p>		<p>kut, apeqqutit attuumassuteqartut tamarmik, tassunga ilanngullugu aningaasaqarnermi pissutsit, ilaatinneqarnissaat tunngavigineqarluni.</p>
8.9	Kommune Kujalleq	<p>Inunnut innarluutilinnut ikiorsiisarneq pillugu inatsisissatut siunnersuummut, maannakkut Inatsisartut suliarisaannut naleqqiullugu § 33 ersernerluttoq kommuni isumaqarpoq. Inatsisissatut siunnersuut taanna ilaatigut § 45-mik imaqarpoq, taanna naapertorlugu ikiorsiinerit suut kommunalbestyrelsinit neqeroorutigineqassa- nersut imaluunniit neqeroorutigineqarsin- naanersut pillugit Naalakkersuisut malittarisassanik erseqqinnerusunik aalajangersaasinnaallu- tik, tak. aalajangersakkami nr. 5.</p>	Naamik	<p>Siunnersuut § 33-mi taamaallaat pineqarpoq ilinniartut ineqarfiinut tunngasut taassumalu kingunerisaanik ilinniartut ineqarfianni najugaqartoq, immikkut atortunik pisariaqartitsisoq, tamanna pillugu ilinniartut ineqarfiinik aqutsisoqarfimmiit siumoortumik akuersissummik pissarsereernermigut tamakkuninnga ikkussuisinnaatitaavoq.</p> <p>Inatsisissatut siunnersuummi tassani § 45-mi nassuiaatini innersuussiffigineqartumi pineqarpoq piginnaatitsinissamut aalajangersagaq, taanna malillugu ikiorsiinerit suut kommunalbestyrelsinit ikiorsiissutigineqarnissaat</p>

				<p>pillugu nalunaarutikkut Naalackersuisut aalajangersakkanik erseqqinnerusunik aalajangersaasinnaallutik. § 45-p siunnersuummi § 33-mut naleqqiullugu attuumassuteqarsinnaanera inatsisissatut siunnersuummi § 45-p atorneqarnissaa pillugu aalajangiisoqartinnagu qulaajarneqarsinnaanngilaq.</p>
9	Aningaasaqarnermut Naalackersuisoqarfik	Siunnersuummut oqaaseqaateqanngilaq.	Naamik	Siunnersuummik allannguinissamut tunngavissinngilaq.
10	SIK	Nalunngilarput tamanna pillugu periarfissat marluinnaasut, tassalu init mikinerit kisermaanit atorneqartussat 850 kronillit, kiisalu init anginerit ilaqutariinnut atugassiat kisermaat akiliutaasa marloriaataannik akeqarput. Init ilaat qimaannarneqarsimasarput qalipanneqaratik, ilaallu allatigut aserfallatsaaliugaasimas aratik, ilaat mikisuararsuupput ilaallu anginerungaarlutik.	Naamik	Tamatumunnga oqaatigineqaannaassaaq siunnersuutip siunnerfigerpiarmagu atugassarititaasunik siammassinnerusunik nalilersuisarnermi tunngavilinnik allaaveqarnissaaq ineqarnermut akiliummik aalajangersaasarnermi. Tamatumunnga atatillugu siunnersuummi § 16, imm. 1-imut innersuussisoqassaaq, tassani nalunaarneqarmat pissutsit suut isiginiarneqartussaani, ineqarnermut akiliummik aalajangersaasarnermi.
10.1	SIK	Kapitali 8 § 27 ineqartup akisussaaffii ersarissut ineqarfinni tamani ineqartunit tama-	Naamik	§ 27-p nalunaarpaa ilinniartut ineqarfianni najugaqartup ilinniartut ineqarfiat inigisani isumanna-

		<p>nit takuneqarsinnaanngorlugit ersarissumik allassimanissaat inassutigaarput. Tamakkua aalajangersakkat malinneqarnerinik nakkuti-lliisussatut kapitali 4-mi allaqqasut, tassalu ineqartut siunnersuisoqatigiivisa saaffigarsinnaasaat allattoqarfimmi akisussaasut aamma allassimanissaat inassutigaarput.</p>		<p>tsumik isumagisarissagaa, taarsiissuteqartussatullu akisussaasuulluni mianersuaalliornikkut ajoqusikkanut, nammineq imaluunniit inoqutimi ilaasa allat ilinniartut ineqarfiannut isersinnaatissimasami piliaannut. Taamaasilluni taamaallaat pineqarpoq ileqqorissaarnissamut allassimaffik, taarsiissuteqartussaataitanermut akisussaassuseq taarsiissuteqartarnermut malittarisassani nalinginnaasuni allassimammata. Taamaasillunilu ineqartut siunnersuisoqatigiivi taakkuunngillat malittarisassat malinneqarnissaannut akisussaasuunngillat.</p>
--	--	---	--	---

Inatsisissatut siunnersuummi aalajangersakkanut ataasiakkaanut nassuiaatit

§ 1-imut

Imm. 1-imut

Aalajangersakkami Inatsisartut inatsisaata atuuffia aalajangersarparaa. Tamanna isumaqarpoq siunnersuummi aalajangersakkat alla aalajangersagaq naapertorlugu nassuiarneqassasut.

Aalajangersagaq ilinniartut ineqarfii pillugit nalunaarummi atuuttumi § 1-ip aamma § 2, imm. 1-ip aamma 2-p ataatsimuulersillugit allanneqarpoq.

Aalajangersakkami Inatsisartut inatsisaanni pingaarnertut salliutinneqartut allanneqarput, tak. nassuiaatini nalinginnaasuni Namminersorlutik Oqartussat aamma kommunit akornanni suliassat agguataarnerinut tunngasut.

Aalajangersakkamit takuneqarsinnaavoq utaqqiisaasumik attartorneq pineqartoq, tamannalu ilinniarnep ingerlanera, piffissami ilimagisami naammassineqartussaq tunngavigalugu ilinniartut ineqarfianni inissiap taamaallaat akuerineqarneranut atatillugu isigineqassaaq. Peqatigisaanik tamanna aamma assingaa ilinniarnep naammassineqarnerani imaluunniit unitsinneqarnerani ilinniartup ilinniartut ineqarfianni inissiaq qimassagaa taamaalillunilu iliniartoq nutaaq inissaqalersillugu.

Aammattaq aalajangersakkamit paasineqarsinnaalluni nalinginnaasumik attartornermik inatsimmut naleqqiullugu nalinginnaasumik attartornermi pissutsit pineqanngitsut.

Imm. 2-mut

Aalajangersakkami Inatsisartut inatsisaanni siunnerfigineqartut nassuiarneqarput. Tassunga atatillugu pineqarpoq ilinniartut ineqarfii pillugit nalunaarummi atuuttumi § 2, imm. 4-mik malittarisassap taamaaqataanik ingerlatitseqqinneq.

Aammattaq maluginiarneqassaaq aalajangersakkamik atuuttumik nassuiaat tassaasimasoq ilinniartut avataaneersut ilinniartitaanermi ilinniartitaanermut toqqaannartumik nuunnerinut atatillugu nunaqavissutut isigineqassanngitsut. Tamatuma assingaa iliniartoq avataaneersoq, assersuutigalugu ilinnialernissamut piareersarfiusumik ilinniarnep naammassisaqarnissaq siunertaralugu illoqarfimmi ilinniarfeqarfiusumi ilinniartut ineqarfianni inissiamik initaartinneqartoq ilinniartitaanep naammassineqarnerata kinguinngua illoqarfimmi tassani batcheloritut ilinniarnep nangitsisoq ikaarsaarnep nunaqavissutut isigineqassanngitsaq. Tamanna taamaalilluni atuutissaaq iliniartoq iliniarnissamut piareersaataasumik ilinniarnep nalaani illoqarfimmi ilinniarfeqarfiusumi inuit nalunaarsorsimaffianni allanneqarsimasumik najugaqarsimagaluartoq assersuutigalugu ukiuni pingasuni. Nassuiaammut tassunga naleqqiullugu allanguinissaq aalajangersakkami siunertaanngilaq.

Imm. 3-mut

Aalajangersagaq ilinniartut ineqarfii pillugit nalunaarummi atuuttumi § 2, imm. 3-mut naapertuuppoq. Tassani pineqarpoq ilinniartut ineqarfianni inissiamik pissarsisinnaanermut amerlanertigut avataaneertussaanermut naleqqiullugu ilaatitsinnginnermut aalajangersagaq. Aalajangersakkamit takuneqarsinnaavoq taassuma atornerqarnissaanut pinngitsoorani naammassineqartussat marluk naammassineqarnissaannik tunngaveqartoq. Ilinniartut ineqarfianni pineqartut inissaqartitsisoqassaaq peqatigisaanillu iliniartoq assersuutigalugu inooqatigiinnikkut pisoqarsimaneranik uppersaassalluni. Tassani assersuutigalugu pineqarsinnaavoq tassangaannartumik inissaarussimaneq ilaqutariit avinnerisa malitsigisaannik imaluunniit pissutsit immikkoorluinnartuusut pissutigalugit ilinniartup sunnuteqarfigisinnaanngisai. Peqatigisaanik maluginiarneqassaaq aalajangersagaq

taamaallaat utaqqiisaasumik atorpeqarsinnaammat aamma piffissamillu apeqqut tassunga atatillugu aalajangersimasumik naliliiffigineqassalluni. Tamatuma assingaa piffissaq killeqartoq sipporneqassanngitsoq.

§ 2-mut

Aalajangersagaq nutaajuvoq aamma ilinniartut ineqarfianni inissiaq taamaallaat ilinniartumut ukiut ataasiakkaarlugit atugassanngortinneqartarnera pillugu ilinniartut ineqarfiinut nalunaarummi § 2, imm. 1-imi malittarisassamut taarsiunneqarluni.

Aalajangersakkami aamma allanneqarpoq ilinniartut ineqarfinni inissiap aalajangersimasuunngitsumik iluseqartinnera allanneqarpoq piffissami tamarmiusumut ilinniartut ineqarfianni inissiamik aalajangersimasumik initaartinneqarnissamut pisinnaatitaaneq pillugu ilimagisaqarnissamik pilersitsinngitsoornissaq siunertaralugu.

Peqatigisaanik aalajangersakkamit takuneqarsinnaavoq assersuutigalugu ilinniartitaanermi tapiiffigineqartussaataitaasumi ilinniarnermik ingerlataqarnissamik naammassisaqarnikkut tamanna pillugu pinngitsoorani naammassineqartussat allat naammassineqarsimatillugit ilinniartut ineqarfianni inissiamik taamaallaat initaartitsisoqarsinnaasoq, tak. kapitali 2-mi tamanna pillugu pinngitsoorani naammassineqartussat.

§ 3-mut

Tassani pineqarpoq piginnaatitsinermik aalajangersagaq annertuutigut inissianik attartorneq pillugu inatsisartut pequssutaanni nr., 12. maj 2005-imeersumi § 3, imm. 3-mi atuuttumut naapertuuttoq. Aalajangersagaq atuuttoq atorpeqarsimangilaq, tak. siunnersuummi nalinginnaasumik nassuiaatini kommunini ilinniartut ineqarfiisigut malittarisassaliornerit pillugit allatat.

Aalajangersakkap atulersinneqarnissaa pillugu maannakkut pilersaaruteqanngilaq, tassanilu kommunalbestyrelsit ilanngutitinnissaannik tunngaveqassalluni. Kommunalbestyrelsit manna tikillugu taamatut malittarisassaqaqtitsinissamik kissaateqarlutik nalunaaruteqarsimangillat.

Piginnaatitsinerup atorpeqarnerani Inatsisartut inatsisaata atuuffia aamma kommunit ilinniartunut ineqarfiutaat ilaatilerlugit annertusineqartussaassaaq. Allatut oqaatigalugu siunnersuummi Namminersorlutik Oqartussat ilinniartunut inissiaataat pillugit malittarisassatut annertutigisumik kommunini ilinniartunut ineqarfiit malittarisassaqaqtinneqassallutik.

§ 4-mut

Imm. 1-imut

Aalajangersakkami pinngitsoorani naammassineqartussat sisamat aalajangersarneqarput, ilinniartut ineqarfianni inissiamut eqqarsaatigineqarnissamut naammassineqartussat.

Aalajangersagaq nutaajugaluartoq ullumikkut atuuttunik pinngitsoorani naammassineqartussanik ingerlatitseqqinneq pineqarpoq, tamannalu ilinniartut ineqarfii pillugit nalunaarummi atuuttumi ilinniartut ineqarfiinut nalunaarummi ilinniagaqarnersiutit pillugit malittarisassanut innersuussisoqarluni. Siunnersuummi § 4, imm. 1-imi inatsisinut allanut innersuussisoqarpoq, tassa aalajangersagaq tunngavinni immikkoortuni pinngitsoorani naammassineqartussanik aalajangersaasoqarmat.

Nr. 1-imut

Aalajangersakkami imm. 1, nr. 1 taamaalilluni ilinniagaqarnersiutit pillugit Inatsisartut inatsisaanni nr. 12, 22. november 2011-meersumi § 2, imm. 1, nr. 1-imut naapertuuppoq. Tassani pineqarpoq atassuteqarnermut piumasaqaatitut taaneqartut. Nunani tamalaani isumaqatigiissutit pillugit apeqqummut naleqqiullugu nunani tamalaani isumaqatigiissutip Danmarkimut sunniuteqarnera naammassanngilaq, tassa pingaarluinnartumik isumaqatigiissutip Kalaallit Nunaannut sunniuteqarnissaa.

Nr. 2-mut

Aalajangersakkami nr. 2 ilinniagaqarnersiutit pillugit inatsimmi § 3, imm. 1-imut naapertuuppoq, tassani takuneqarsinnaalluni Kalaallit Nunaanni ilinniartitaanermut ilinniagaqarnersiutinut ilaatigut tunngaviummat Kalaallit Nunaanni aalajangersimasumik najugaqarnissaq. Taamaaqataani ilinniartut ineqarfianni inissiamut naleqqiullugu taamaalilluni aalajangersagaq atuulluni.

Ilinniartuq taamaalilluni inuit nalunaarsorsimanerat pillugu inatsimmi malittarisassat malillugit uppersarsinnaassavaa pineqartoq Kalaallit Nunaanni najugaqarluni. Tamatuma kingunerisaatut ilinniartuq Kalaallit Nunaanni najukkamini aalajangersimasumiinngippat ilinniartut ineqarfianni inissiamut pisinnaatitaaneq atorunnaassaaq.

Nr. 3-mut

Aalajangersagaq nr. 3 ilinniagaqarnersiutit pillugit Inatsisartut inatsisaanni § 2, imm. 1, nr. 2-mut tamarmiusumik naapertuuppoq. Aalajangersagaq tunngaviusumik pinngitsoorani naammassisassanik pingasunik imaqarpoq tassaasut ilinniartitaanermi tiguneqarsimanissamut piumasaqaat, ilinniartitaanerup Naalakkersuisunit ilinniagaqarnersiuteqarfiusinnaasutut akuerineqarsimanissaa peqatigisaanillu ilinniarnermik ingerlataqartuunissaq.

Soorlu aamma ilinniagaqarnersiutinik tigusaqartarnissamut tunngaviusoq ilinniartup ilinniarnermik ingerlataqartuunissaa, ilinniartuq aamma ilinniartut ineqarfianni inissiamut pisinnaatitaanissamut pisussaaffiullu atatiinnarnissaanut ilinniarnermik ingerlataqartuussaaq. Ilinniarnermik ingerlataqartuunissamut piumasaqaat allatigut aamma ilinniartut ineqarfiinut

nalunaarummi atuuttumi § 3, imm. 1-imit takuneqarsinnaavoq. Taamaalilluni paasineqassalluni ilinniarneq illersorneqarsinnaasumik ingerlanneqartoq, tassunga ilanngullugu ilinniartuq misilitsinnernut soraarummeernernullu tamanut peqataasartoq, suliassani tunniuttarlutit kiisalu takkunnissaq pillugu malittarisassanik eqqortitsisarluni.

Ilinniarnermik ingerlataqartuunissamut piumasaqaammik malinninnginnerup inatsisitigut sunniutaa tassaavoq ilinniartut ineqarfianni inissiamut pisinnaatitaanerup annaaneqarnera. Ilinniagaqarnersiutinut akuersissuteqarnermut naleqqiullugu soorlu taamaattoqartoq inuiaqatigiit iliniartut ineqarfianni inissiami iluaqutaasumik inissiatigut initaartitsinissamut tunngaviusoq ilinniartup illuatigut ilinniarnermik ingerlataqartuunini uppersarsarsinnaassagaa tamatumalu inerneratut ilinniarnermi ilaatigut siumut ingerlalluni.

Taamaaqataanik ilinniartitaanerup tapiiffigineqartuunissaa pillugu apeqqummut naleqqiullugu atuulluni. Soorlu ilinniagaqarnersiutinik pisartagaqarnissamut tunngaviusumik pinngitsoorani naammassineqartussaasoq ilinniartitaaneq tapiiffigineqarsinnaasoq pineqartoq, ilinniartut ineqarfianni inissiamut pissarsisinnaanermut naleqqiullugu pinngitsoorani naammassineqartussat taakku assingi atuupput. Tamanna ilinniartut ineqarfii aamma ilinniagaqarnersiutit pillugit malittarisassat akornanni ataqatigiittoqarneranut naapertuuppoq. Tassunga oqaatigineqassaaq ilinniartitaanerup Kalaallit Nunaanni atorineqarsinnaanersoq aallaavigalugu ilinniartitaanerup tapiiffigineqarsinnaanera pillugu apeqqut saqqummiunneqartarmat, tassunga ilanngullugu ilinniartitaaneq kalaallit nunaanni suliffeqarfinit ujjartorneqartunik imaqarnersoq.

Peqatigisaanik aalajangersakkamit allami takuneqarsinnaavoq nalinginnaasumik tapiiffigineqarsinnaanngitsunut ilinniartitaanernut aamma piginnaatitsisoqarsinnaammat, immikkorluinnaq pissutsit tunuliaqutaralugit aamma aalajangersimasumik naliliineq aallaavigalugu tapiiffigineqarsinnaanerinik Naalakkersuisut aalajangiisinnaallutik. Taamatut tapiissuteqarneq ilinniagaqarnersiutit pillugit Inatsisartut inatsisaanni § 12 naapertorlugu taamaattoqartillugu tunniunneqarsinnaapput.

Nr. 4-mut

Aalajangersakkami nr. 4 ilinniartut ineqarfianni najugaqartup ilinniartut ineqarfiinik aqutsisoqarfimmut isumannaagassani atorunnaarsinneraniit piffissamiit qaammatinik pingasunik sivilunerunngitsumik piffissami siumoortumik aalajangersarneqartumi ilinniartut ineqarfianni najugaqartup, sumiginnaasqartillugu, ilaatinnginnissaa pillugu nalunaarummi atuuttumi § 45, imm. 2-mik ilaannakkuusumik ingerlatitseqqinnertut isigineqarsinnaavoq.

Aalajangersagarli manna tunniussinissamut piumasaqaatit ilaattut oqaasertalerneqarpoq. Peqatigisaanik aalajangersakkamit takuneqarsinnaavoq pineqartoq akiliinissamut isumaqatigiisummik eqqortitsippat assersuutigalugu ineqarnermut akiliummik akiliisimanani pineqartoq akiligassatigut kinguaattoorsimagaluartoq ilinniartuq suli ilinniartut ineqarfianni inissiamut pisinnaatitaassasoq.

Imm. 2-mut

Tassani pineqarpoq aalajangersagaq nutaaq imm. 1, nr. 1-imi atassuteqarnissamut piunasaqaammit immikkut akuersisoqarnissaanut tunngavissamik pilersitsisoq.

Aalajangersagaq Qaffasinnerusumik ilinniartitaanerit pillugit Inatsisartut inatsisaanni nr. 14, 12. juni 2019-imeersumi § 36-imut ataqatigiissinneqassaaq. Aalajangersakkami takuneqarsinnaavoq, ilinniartinnit ingerlaqqiffiusuni kalaallit ilinniartut kandidatitut ilinniarnermi nunani allani ilinniartinnit najugaqarsinnaanerit.

Tamanna nunani allani ilinniarfeqarfimmik isumaqatigiissuteqarnissamik tunngaveqassaaq immaqalu illusimatitsinnermut apeqqummut tunngatillugu ingerlataqartunit attuumassuteqartunik allanik aamma. Tassunga atatillugu tulluurtut nalilerneqarpoq Namminersorlutik Oqartussat paarlattuanik ilinniarfeqarfinnit pineqartuni ilinniartunut tikeraartunik illusimatitsinissamut periarfissanik neqerooruteqarsinnaanerit. Naatsorsuutigineqarpoq inissat killeqartut pineqassasut, kalaallit ilinniartut Kalaallit Nunaanni ingerlaqqiffiusumi ilinniarnernut atasumik nunani allani semesterimik ingerlatsisut amerlaqataannut naapertuuttut. Qummut piffissatigut killiliussaq allatigut qaangerneqassanngilaq.

Imm. 3-mut

Aalajangersagaq nutaajuvoq assersuutigalugulu kalaallimut ilinniartumut assersuutigalugu Danmarkimi ilinniarnernut atasumik Kalaallit Nunaanni semesterimik ingerlataqarneranut naleqqiullugu atornerneqarsinnaassalluni.

Imm. 4-mut

Aalajangersagaq nutaajuvoq siunertaralugulu tunniussinissamut piunasaqaatit atuuttut aamma ilinniartitaanerup nalaani naammassineqarnissaasa qulakkeerneqarnissaat taamaalillunilu piffissamut tamarmut ilinniartut ineqarfianni inissiamut oqartussaaffigineqartumut. Assersuutigalugu ilinniarnernut ingerlannerani ilinniartitaanerit Namminersorlutik Oqartussanit tapiiffigineqarsinnaasut nalilinnisaannut nuuttoqarpat, assersuutigalugu piffissap ilaannaani ilinniartitaaneq, ilinniartitaaneq Kalaallit Nunaannut attuumassuteqanngitsoq pineqartillugu, imaluunniit ilinniartuq illusimaffissamik pisariaqartitsiunnaarpat ilinniartut ineqarfianni inissiamut pisinnaatitaaffik aamma atatiinnerneqarsinnaassanngilaq.

Imm. 5-imut

Aalajangersagaq ilaannakuusumik ilinniartut ineqarfii pillugit nalunaarummi atuuttumi § 3, imm. 3-mik ingerlatitseqqinneruvoq aamma tassani pineqarluni imm. 1, nr. 3-mi ilinniarnermik ingerlataqartuuneq pillugu piunasaqaatimmi immikkut akuersisoqarnissaanut immikkorluinnaq atukkanut periarfissaqarneq.

Tassani assersuutigalugu pineqarsinnaavoq ilinniartitaanermi ingerlaqqiffiusumi ilinniartut ineqarfianni najugaqartoq, ilinniarnernik qaammatit aqqaneq marluk sinnerlugit kinguaattoortoq taamaalillunilu ilinniagaqarnersiutit pillugit Namminersorlutik Oqartussat nalunaarutaanni nr. 9, 19. juli 2017-imeersumi § 10, imm. 3, oqaaseqatigiit siulliit naapertorlugit ilinniarnermik ingerlataqartuusutut isigineqarunnaartoq.

Aalajangersagaq aamma pissutsinut ukununga naleqqiullugu atorneqarsinnaassaaq, ilinniartuq ilinniartitaanermi pilersaarummi aalajangersarneqartunut misilitsinnernut soraarummeernernullu naammassisaqarsimanngippat, suliassanik pisariaqartunik tunniussisimanngippat imaluunniit takkuttussaanermut malittarisassanut tunngatillugu akuerisaasut sinnerlugit sumiginnaasimappat. Pisuni taakkunani aalajangersagaq atorneqassaaq, uppersarneqarpat ilinniarnermik ingerlataqartuunnginneq ilinniartut ineqarfianni najugaqartup pissusianut tunngatinneqarsinnaanngippat, tassa assersuutigalugu napparsimanermik uppersarneqarsinnaasumik tunngaveqarpat, imaluunniit ilinniarfeqarfiup uppersarpagu pineqartoq piviusumik ilinniarnermik ingerlataqartuusoq.

§ 5-imut

Aalajangersagaq nutaajuvoq nutaatullu aalajangersarlugu ilinniarnermut atatillugu illusimaffissamik piviusumik pisariaqartitsisoqartoq.

Taamaalilluni illoqarfimmi ilinniarfeqarfiusumi inissiamut inissaqaraanni ilinniartut ineqarfianni inissiamut naatsorsuutigineqarsinnaanani. Aalajangersakkap assersuutigalugu ilinniartut ineqarfianni najugaqartoq ilinniartut ineqarfianni inissiami najugaqartoq peqatigisaanillu assersuutigalugu ilinniartut ineqarfianni najugaqartup allamut attartortitaanik illoqarfimmi ilinniarfeqarfiusumi inissiamik piginnittuulluni. Pisuni taamatut ittuni illusimaffissamik pisariaqartitsineq ilinniartup nammineq pissusiatut naatsorsuutigineqassaaq.

Taamaaqataanik atuutissaaq atorfininnermi pissutsit tunngavigalugit ilinniartut ineqarfianni najugaqartoq, tassunga ilanngullugu lærlingini pissutsit, illoqarfimmi ilinniarfeqarfiusumi inissiamik atugassaqartinneqarluni.

§ 6-imut

Imm. 1-imut

Aalajangersagaq nutaajuvoq aamma ilinniartut ineqarfianni inissiamik tunineqarnissamut aamma ilinniartut ineqarfianni inissiap atatiinnarnissaanut attuumassuteqartunik paasissutissatut eqqarsaatigalugit ajunngitsumik nalunaaruteqartussaataaneq. Taamatut paasissutissiisussaataaneq ilinniartut ineqarfianni inissiaq pillugu qinnuteqarnermut atatillugu atuuppoq, aamma ilinniartut ineqarfianni najugaqartup ilinniartut ineqarfianni inissiami najugaqarnerani. Akiliineq pillugu apeqqut pingaartumik piffissamut naleqqiullugu

attuumassuteqassaaq, isertitat tunngavigalugit ineqarnermut akiliut pillugu malittarisassanik aalajangersaasoqalerpat.

Paasissutissat pineqartut ilusaat pissutigalugu taakku inatsisip oqaasertaani allanneqassapput nassuiaatiniunngitsoq.

Illoqarfiup ilinniarfeqarfiusup avataani najugaqarneq pillugu apeqqummut naleqqiullugu tamanna sivikinnerpaamik qaammatini marlunni peqannginnermi ilinniartut ineqarfianni inissiap ilinniartut ineqarfiinik aqutsisoqarfimmut atugassanngortinnissaanut pisussaaffik pillugu siunnersuummi § 36, imm. 1-imut atatillugu isigineqassaaq.

Inissiamik pisariaqartitsinermit naleqqiullugu tamanna isumaqarpoq ilinniartut ineqarfianni najugaqartoq inissiamut allamut akisussaannersoq, inissiamut allamut periarfissaqarnersoq imaluunniit allatigut illusimaffissami pisariaqartitsinnginnersoq pillugu ilinniartut ineqarfianni najugaqartup paasissutissiinissamut pisinnaatitaaffeqartoq, tak § 5-imi piumasaaq.

Paasissutissat pisut naapertorlugit aamma ilinniartitaanermik kipititsinermit, ilinniarnermik ingerlataqartuunnginneq il.il. tunngasuupput.

Aalajangersakkamit aamma takuneqarsinnaavoq paasissutissiinissamut isiginninngitsoorneq attartornermik isumaqatigiisummik taamaatitsisinnaasoq.

Imm. 2-mut

Aalajangersakkami pineqarpoq imm. 1-imi taaneqartunik paasissutissat allanngorneri pillugit ilisimatitsinissamut pisussaaffik. Piviusumik paasissutissat ilinniartut ineqarfiinik aqutsisoqarfimmut pineqartumut nassiunneqartussaapput.

§ 7-imut

Aalajangersagaq nutaajuvoq tassaniillunilu piginnaatitsinermit aalajangersagaq.

Aalajangersagaq nalunaarutikkut ilinniartut ineqarfiini inissianut tullerriaarineq pillugu aamma innersuussineq pillugu malittarisassanik aalajangersaasoqarsinnaaneraniq periarfissiivoq.

Aalajangersakkap taassuma atorneqarnissaa pillugu maannakkut pilersaaruteqanngilaq. Aalajangersagaq naatsorsuutigineqarpoq maannakkut ilinniartut ineqarfiisigut annertuumik allanngortoqarpat aamma atorneqalissasoq. Ilinniartut ineqarfiini inissiat amerlassusaat piffissap ingerlanerani malunnaatilimmik amerlippata ilinniartut allat tullerriaarnissaat pillugu eqqarsaasersuuteqartoqarsinnaassaaq, tassunga ilanngullugu nunaqavissutut taaneqartut ilinniartut.

Taamaaqataanik innersuussineq pillugu malittarisassanik aalajangersaanissaq pillugu eqqarsaasersuutitut naleqqiullugu atuuppoq, annerusumik assersuutigalugu ilinniartut ineqarfii aalajangersimasut suut ilinniartunut aalajangersimasumut tunniunneqartussat malittarisassaliorsinnaaneq, tassunga assersuutigalugu ilanngullugu ilinniartut 18-it inorlugit ukiullit. Tamanna ullumikkut innersuussinerup ingerlatsivimmi ingerlataqarnermut atatillugu ingerlanneqartarneranut assersuunneqassaaq.

§ 8-mut

Imm. 1-imut

Aalajangersakkamit takuneqarsinnaavoq aallaaviatigut ilinniartut ineqarfii pillugit Naalakkersuisut aqutsisuusut aamma ilinniartut ineqarfiinut malittarisassat naapertorlugit ilinniartut ineqarfiini najugaqartut attortinnerinut taamaatitsisarnernullu akisussaasut. Malittarisassat ingerlatsinikkut Ilinniartitaanermut, Kultureqarnermut Ilageeqarnermullu Naalakkersuisoqarfiup maannakkut akisussaaffianiipput.

Malittarisassat piviusumik ilinniartut ineqarfiinik ingerlatsivimmit aqunneqarumaarput.

Ilinniartut ineqarfiinut nalunaarummi § 4, imm. 2 naapertorlugi Nuummi ilinniartut ineqarfiit ataatsimoorlutik Ilinniartut ineqarfiinik aqutsisoqarfiup ataatsimut allaffianit (KAF) aqunneqarput GU-p ilinniartut ineqarfiutai minillugit. Kollegiat allat kollegianik aqutsisunit allanit kollegianik aqutsisunit toqqartorneqartumik aqunneqarput. Ilinniartut ineqarfiinik aqutsisut tassaasinnaapput aqutsisut imaluunniit ilinniarfinni ilinniartut ineqarfiini inissiat attuumassuteqarfigisaanni sulisut.

KAF tassaavoq Ilinniartitaanermut, Kultureqarnermut Ilageeqarnermullu Naalakkersuisoqarfiup ataani immikkoortortaq.

Imm. 2-mut

Aalajangersakkami ilinniartut ineqarfii pillugit malittarisassanik aqutsineq Namminersorlutik Oqartussani oqartussanut suliffeqarfinnullu allanut tamakkiisumik ilaannakuusumilluunniit Naalakkersuisut suliassanngortitsisinnaaneranut erseqqissumik tunngavissiivoq. Tamanna annertuutigut taamaareerpoq, tassa assersuutigalugu qitiusumik ilinniarfiit aamma ilinniarnertuunngorniarfiit ilinniartut ineqarfii pillugit malittarisassanik aqutsimmata.

Imm. 3-mut

Aalajangersagaq pissutigalugu ilinniartut ineqarfii pillugit malittarisassanik aqutsinerup Namminersorlutik Oqartussat avataanni immikkoortortanut tamakkiisumi ilaannakuusumilluunniit suliakkiisoqarsinnaalerpoq. Tamanna assersuutigalugu tassaasinnaavoq kommunini imaluunniit namminersortuni immikkoortortat assersuutigalugu suliffeqarfik namminersortoq. Aalajangersagaq pisariillisaanissamut eqqarsaatigisat

aallaavigalugit atorneqarsinnaavoq, taanna naapertorlugu assersuutigalugu inissianik attartortitsisarnermi inuussutissarsiutigalugu ingerlataqartoq atorneqarsinnaalluni.

Allakkatigut isumaqatigiissuteqartoqarsimanissaanik piunasaqaatip kinguneraa isumaqatigiissutip annertussusiata sapinngisamik erseqqissuutinneqarnissaa, tassunga ilanngullugu piginnaatitaaffiit sorliit suliakkiutigineqarsimanerannut kimullu suliakkiutigineqarsimanerannut tunngatillugu. Allatigut suliakkiinermut tunngaviuvoq ilinniartut ineqarfii najugaqartut malittarisassat pineqartup akisussaasuanit allaffeqarfimmit aqunneqarneranut naleqqiullugu taamaalillutik ajornerusunik inatsisitigut inissisimalinnginnissaat. Tassunga atatillugu akisussaaffimmi oqartussaasut pisussaapput taamatut suliakkiussinermut tunngaviit atuuttut aallaavigalugit suliassat naammaginarumik ingerlanneqarneranik nakkutiginnittussaapput.

Imm. 4-mut

Aalajangersakkami pineqarput imm. 1-3-mi taaneqartut immikkoortortat ilinniartut ineqarfii pillugit malittarisassanik aqutsinermut annertuumik pingaaruteqartunik paasissutissanik pissarsiniarnissaannut periarfissaq aamma taamatut paasissutissanik atugassanngortillugit ingerlatitseqqinnissaq. Innersuussineq aamma Naalakkersuisunoorpat tak. imm. 1-imut innersuussineq, assersuutigalugu allaffeqarfiit Naalakkersuisut ataaniittut arlaat soorlu naalakkersuisoqarfik, paasissutissanik kommunit allaffiinit paarlaasseqatigiissinnaaneranik isumaqarpoq. Aalajangersakkami taamaalilluni ilinniartut ineqarfii pillugit aqutsinerup tamakkiisumik ilaannakuusumilluunniit suliassanngortinnissaanut sillimasoqarpoq, tak. imm. 2 aamma 3.

Aalajangersakkami nr. 1-imi siunertaavoq ilinniartut ineqarfii pillugit aqutsinermut atugassanik paasissutissanik oqartussat aqutsisuusut namminersortulluunniit kikkulluunniit pissarsiniarsinnaanerisa qulakkeerneqarnera.

Paasissutissanik ilinniartut ineqarfii pillugit malittarisassanik aqutsinermut pingaarutilinnik ingerlatitseqqinneq oqartussaasunut immikkoortortanullu namminersortunut aatsaat pisinnaavoq oqartussaasunut il.il. allanut ingerlatitseqqinnermut tunngasut tamakku pillugit ingerlatsinermi inatsisit malillugit aalajangiiffigineqartariaqarpata. Tamatumunnga atatillugu taamaallaat sulianik sularinninnermut aalajangersimasumut atugassanik paasissutissanik pissarsisoqarlunilu ingerlatitseqqittoqarsinnaavoq.

Paasissutissat annertuumik pingaaruteqarnissaat pillugu piunasaqaatip kinguneraa paasissutissat ilinniartut ineqarfii pillugit malittarisassanik aqutsinermut ima pingaaruteqartiginissaat assersuutigalugu ilinniartut ineqarfinni inissiamik qinnuteqaat, imaluunniit ilinniartut ineqarfianni najugaqartup ilinniartut ineqarfianni inissiamik peqaannarissaa pillugu apeqqut paasissutissat pineqartut ilaatinngit sularineqarsinnaanani. Paasissutissani assersuutigalugu pineqarsinnaavoq ilinniarnermi ingerlataqartuuneq, tassunga

ilanngullugu misilitsinnermi soraarummeernermilu angusat, takkutinnitsoornerit, illoqarfiup ilinniarteqarfiusup avataani ilinniagaqarneq, akiligassatigut kinguaattoorneq il.il.

Aalajangersakkami nr. 2-mi aalajangersarneqarpoq oqartussaasut allallu 1-3-mi allassimasut ilinniartut ineqarfii pillugit malittarisassanik aqutsisuusut ilinniartuq pillugu paasissutissanik ilinniagaqarnersiutit pillugit malittarisassanik aqutsinnermut pingaarutilinnik imminnut ingerlatitseqqissinnaanissaat. Paasissutissanik atugassinneqarneq assersuutigalugu imatut pisinnaavoq malittarisassanik aqutsisuusq, assersuutigalugu Ilinniartitaanermut, Kultureqarnermut Ilageeqarnermullu Naalackersuisoqarfiup paasissutissaasiviani nammineq aallersinnaanera. Nr. 1 peqatigalugu taamatut aalajangersakkami siunertaavoq paasissutissanik ilinniartut ineqarfii pillugit malittarisassanik aqutsinnermut annertuumik pingaaruteqartunik pissarsiniarnissamut, atugassinneqarnissamut ingerlatitseqqinnissamullu tunngavissamik erseqqissumik pilersitsinissaq. Annertuujunissaanik piumasaaqat pillugu apeqqummut naleqqiullugu aalajangersakkami nr. 1-imut tunngatillugu qulaaniittumi allanneqartunut innersuussisoqassaaq, Tamatuma assingaa ilinniartut ineqarfii pillugit malittarisassanik aqutsineq suliamut aalajangersimasumut naleqqiullugu paasissutissat pineqartut pigitinnagit ingerlanneqarsinnaanngitsoq.

Imm. 5-imut

Tassani pineqarpoq aalajangersagaq nutaaq tassaasoq piginnaatitsinnermut aalajangersagaq.

Aalajangersakkami siunertaavoq ilaatigut qinnuteqartitsisarneq qinnuteqarnissamullu killiliussineq pillugu malittarisassanik aalajangersaanissamut tunngavissiisoqarnissaata qularnaarneqarnissaa. Tassunga atatillugu qinnuteqarnermi suleriaaseq assersuutigalugu NemID atorlugu elektroniskimik ingerlassinnaanera pillugu malittarisassanik aalajangersaasoqarsinnaavoq, tak. digitalimik pisortat allagaat pillugit Inatsisartut inatsisaat.

Aalajangersakkami peqatigisaanik paasissutissani pissarsiniarnissamut ingerlatitseqqinnissamullu periarfissaqarneq pillugu malittarisassanik aalajangersaanissamut periarfissaqarneq. Tamanna ilaatigut pisinnaavoq pisut suut tunngavigalugit imm. 4-mi pisut taaneqartut ingerlateqqinneqarsinnaanerini erseqqinnerusumik malittarisassaliornissaq siunertaralugu.

Kiisalu aalajangersagaq aamma suliffeqarfimmut tunnganerusunik malittarisassanik aalajangersaanermut atorneqarsinnaavoq, tassani assersuutigalugu ilinniartut ineqarfii pillugit malittarisassanik aqutsineq qitiusumiit ingerlanneqarnissaa imaluunniit immikkoortortami ataatsimut katersorneqassanersut.

Piginnaatitsinerup atorneqarnissaa pillugu maannakkut pilersaaruteqanngilaq.

Imm. 6-imut

Aalajangersagaq nutaajuvoq aamma inatsisitigut namminersortunut immikkoortunut suliakkiussineq pillugu nalinginnaasumik ingerlatsivitsigut malittarisassat malillugit suut atuuttuunerinik katersuinerulluni. Suliassanngortitsineq, immikkoortortamut namminersortumut aalajangiinissamut piginnaanermik tunniussinermik imaqartoq taamaalilluni kingunerissavaa immikkoortorta q sulianik suliarinninnermik inatsimmi malittarisassanut ilaalissasoq. Allatigut inuk pillugu paasissutissanik passussineq pillugu malittarisassat aamma ator neqassallutik. Tamannali aalajangersakkami allanneqanngilaq, tassa malittarisassanit atuuttunit takuneqarsinnaammat taakkununnga aamma suliffeqarfiit namminersortut ilaasut.

§ 9-mut

Imm. 1-imut

Aalajangersagaq nutaajuvoq aamma ilinniartut ineqarfii pillugit malittarisassanik aqutsinermut suut ilaanersut allanneqarlutik.

Aqutsinerup erseqqinnerusumik annertussusianut pissusaanullu tunngaviussaaq ilinniartut ineqarfii qanoq ittut pineqarnersut, tassunga ilanngullugu iliniartut ineqarfiini immikkoortut qassit aqutsinermut ilaatinneqarnersut.

Imm. 2-mut

Aalajangersakkami ilinniartut ineqarfiinik aqutsisoqarfimmut piginnaasat isumalluutillu pigineqartut sapinngisamik pitsaanerpaamik atuinissaannut pisussaaffiliivoq. Tassani pineqarsinnaavoq sulinermik aqqissuussinerit suleriaatsinillu tulluurtunik qulakkeerinnineq, tassunga ilanngullugu isumalluutinik atuinermut naleqqiullugu.

Imm. 3-mut

Aalajangersakkami siunertaavoq ilinniartut ineqarfii pillugit malittarisassanik aqutsineq ilinniartut ineqarfiini najugaqartut soqutigisaat isiginiarlugit pissasoq sianigeqquneqarpoq. Tassani assersuutigalugu pineqarsinnaavoq piffissap soraarummeerfiusup qaangiunnissaanut pilertortumik nipiliorfiusumik iluarsaassisoqannginnissaa. Tamanna aamma najugaqartut siunnersuisoqatigiivisigut piviusunngortinneqarsinnaavoq, eqqarsaatigisassat taakku isumaginissaannut sakkuusinnaallutik.

§ 10-mut

Imm. 1-imut

Aalajangersagaq ilinniartut ineqarfii pillugit nalunaarummi atuuttumi § 6, imm. 2. oqaaseqatigiinnut siullernut naapertuuppoq.

Malittarisassat tassaapput ineqarfiup iluani malittarisassat, ilinniartut ineqarfiannik aalajangersimasumik atuinermut atasut. Assersuutigalugu qitiusumik ilinniartut ineqarfiinik

aqutsisoqarfik ilinniartut ineqarfiinut arlalinnut tamanulluunniit malittarisassanik ataatsimoorussanik aalajangersaanissaanut akornusiisoqanngilaq.

Nalinginnaasumik nassuiaatini soorlu eqqaaneqartuq aalajangersakkap assigiinnarpaa siunissami malittarisassanik ineqarfimmi taamaallaat malittarisassaliortoqassasoq, akermanilli nalunaarummi atuuttumi ileqqoreqqusut taaneqartut inatsisinit peerneqassallutik. Tassunga atatillugu piumasaqaataavoq malittarisassat tamanut saqqummiunneqassasut, taamaalilluni malittarisassat suut atuunnersut qularutigineqarnani.

Aalajangersagaq atatinneqassaaq § 6, imm. 2, oqaaseqatigiit aappaannik maanna nalunaarummi atuuttumiittunik ingerlatitseqqinnertut. Ileqqorissaarnissamut malittarisassat taamaasillutik tunngasuusinnaapput eqqiaasarnermut, uumasuuteqarsinnaanermut, takkuttarnissamut pisussaaffeqarnermut, nipiliunnginnissamut, pulaartoqarsinnaanermut, imigassanik aalakoornartulinnik atuisinnaanermut atuisinnaannginnermulluunniit, aannajaarniutinik paasisaqartarnernut, tamatumani aamma ileqqorissaarnissamut malittarisassanik unioqqutitsisoqartillugu mianersoqqussuteqartarnermut imaluunniit anisitaasarnermut.

Taamaalilluni silaannarissaaneq, atisat illup iluani panersigassanngorlugit nivinngarneqassanngitsut, ulluni imaluunniit piffissani aalajangersimasuni nipiliorfiusumik iluarsaassisoqassanngitsaq il.il. pillugit malittarisassanik aalajangersaasoqarsinnaavoq. Malittarisassanik sanioqqussinermut inatsisitigut sunniutit allanneqarnerinut naleqqiullugu oqaatigineqassaaq inatsisitigut sunniutit siunnersuummit takuneqarsinnaasunit allanik ilaneqarsinnaanngimmata.

Imm. 2-mut

Aalajangersagaq nutaajuvoq aamma immikkoortortat suut malittarisassanik aalajangersaasinnaanersut allanneqarluni.

Soorunami suliaassanik suliaakkiinermut atatillugu immikkoortortat ataasiakkaat malittarisassanik aalajangersaanissamut periarfissaqassammata. Taamaalilluni sumiiffinni immikkut pisariaqartitsinerit sillimaffigineqarsinnaallutik. Malittarisassalli taamatut ittu taakkununga piumasaqaatinik naammassinnissaasa qulakkeerneqarnissaat Naalakkersuisut akisussaaffigaat, taamaattumik taakku Naalakkersuisunit akuerineqartussaallutik.

Imm. 3-mut

Tassani pineqarpoq aalajangersagaq pisinnaatitsissutaasoq. Pisinnaatitsissut atornerqarsinnaavoq nalunaarusiornikkut aalajangersagaliornernut, pissutsit qanoq ittu ileqqorissaarnissamut malittarisassani aalajangersarneqarsinnaanersut, tamatumani aamma ilinniartut ineqarfianni najugaqartunut ileqqorissaarnissamut malittarisassat qanoq nalunaarutigineqartassanersut. Soorlu ersittoq aammattaaq nalunaarusiornikkut malittarisassaliortoqarsinnaavoq ileqqorissaarnissamut malittarisassanik unioqqutitsinermi

qanoq pineqaatissiisoqartassanersoq pillugu, tamatumani lu aamma ilaasinnaallutik pineqaatissiisutaasut pillugit piffissalersuinerit.

§ 11-mut

Imm. 1-imut

Aalajangersagaq ilinniartut ineqarfiinut nalunaarummi atuuttumi § 8-mik ingerlatitseqqinneruvoq tassani illunilu utaqqisut allattorsimaffianik eqqussinissamut periarfissaq. Tassani paasineqarpoq ilinniartut ineqarfiisa akornanni nuuttarnernut atugassat immikkut allattorsimaffik.

Imm. 2-mut

Aalajangersagaq nutaajuvoq paasiuminartoqarnissaanillu kissaateqarnermik tunngaveqarluni, taamaattumik utaqqisut allattorsimaffimmi inissisimanermut piumasaqaatit tamanut saqqummiunneqassallutik.

§ 12-imut

Tassani pineqarpoq ilinniartut ineqarfii pillugit nalunaarummi atuuttumi § 10, imm. 1-imik ingerlatitseqqinneq.

Ilinniartut ineqarfiinik aqutsisoqarfik ilinniartut ineqarfiinut ataasiakkaanut oqartussatut akisussaasutut najugaqartut siunnersuisoqatigiivini pilersitsisoqarsimaneranik naliliisussaavoq. Tamanna pillugu ilinniartut ineqarfianni najugaqartut amerlanerussuteqartut erseqqissumik kissaateqarpata tamanna malinneqartariaqassaaq. Tamatuma saniatigut aalajangersakkami najugaqartut siunnersuisoqatigiivisa sunik suliaasaqarnerisut allaneqarpoq. Tassunga atatillugu ilisimatitsissutigineqarsinnaavoq ullumikkut ilinniartut ineqarfiisa ilaanni najugaqartut siunnersuisoqatigiivini pilersitsisoqareersimammat.

Najugaqartut siunnersuisoqatigiivini sulineq aallaaviatigut akissarsiaqarfiunngilaq, kisiannili siunnersuummi § 8, imm. 5 naapertorlugu najugaqartut siunnersuisoqatigiivini immikkut suliaqarnerit akissarsiaqarfiunissaat pillugu malittarisassanik aalajangersaanissamut periarfissiiuvoq.

§ 13

Imm. 1-imut

Aalajangersakkami pineqarpoq attartornermi isumaqatigiisummik isumaqatigiisuteqarnissaq. Aalajangersagaq annertuutigut ilinniartut ineqarfii pillugit nalunaarummi atuuttumi § 12, imm. 1, oqaaseqatigiinnut siullernut ilaatigullu oqaaseqatigiit pingajuannut naapertuuppoq. Nalunaarummi ineqarnermut akiliutip attartornermik isumaqatigiisummit takuneqarsinnaanissaa pillugu § 12, imm. 1, oqaaseqatigiit aappaanni

malittarisassat peerneqarpoq. Tamatumunnga pissutaavoq siunnersuummi § 18 tunngavigalugu tamatuma aalajangersarnissaanut naatsorsuinermi malittarisassat tunuliaqutigalugit ineqarnermut akiliutip aalajangersartarnissaa, taamatullu aalajangersaasoqarnissaata tungaanut ineqarnermut akiliut aningaasanut inatsisikkut aalajangersarneqartassalluni, tak. siunnersuummi § 53, imm. 2.

Pequtit pillugit takussutissiaq anilluni nutsernermut naleqqiullugu attuumassuteqarpoq, ilusissaanillu piumasaqaammut pissutaalluni paasissutissat il.il. attuumassuteqartut tamarmik qulakkeerneqarnissaanik peqatigisaanillu assigiimmik suleriaaseqarnissap qulakkeerneqarnissaata eqqarsaatigineqarneri.

Imm. 2-mut

Attartornermi isumaqatigiissutip kingusinnerpaamik qaqugu atsiorsimanissaa aalajangersakkami malittarisassaliorneqarpoq. Aalajangersakkami siunertaavoq ilinniartut ineqarfianni najugaqartup ilinniartut ineqarfianni inissiamik tigusinerani piffissami kingusinnerpaamik isumaqatigiissutip isumaqatigiissutigineqarsimanissaata qulakkeerneqarnissaa.

Imm. 3-mut

Aalajangersagaq nalunaarummi atuuttumi § 12 imm. 2-mut naapertuuppoq. Siunissamili malittarisassat assilineqarneri kisimik tunniunneqartussaassapput ileqqoreqqusat assilineri pinnagit, taakku inatsimmit peerneqarnissaat siunnersuutaammat. Aalajangersakkami siunertaavoq ilinniartut ineqarfianni najugaqartup malittarisassanik ilisimasaqarnissaa qulakkeerniarneqarpoq taamaalilluni ilinniartut ineqarfianni najugaqarnissanut atuuttut piumasaqaatit sapinngisamik siusissukkut ilisimaneqalerlutik.

§ 14-imut

Aalajangersagaq annikitsumik allannguuteqartillugu ilinniartut ineqarfii pillugit nalunaarummi atuuttumi § 13-imik ingerlatitseqqinneruvoq, tassani pineqarluni qularnaveeqqusiinermik akiliineq.

Tassani pineqarpoq oqaasertaliussap annikitsumik allanngortinnera, tassa aalajangersakkami assersuutigalugu qaammammut ataatsimut ineqarnermut akiliummut naapertuuttumik qularnaveeqqusiinerup aningaasatigut killiliisoqanngimmat, soorlu ilinniartut ineqarfiinut nalunaarummi atuuttumi taamaattoq. Ineqarnermut akiliutip annertussusaa allanngorarsinnaammat immaqalu siunissami ineqarnermut tapiissutissani appasissorujussuusinnaalluni, qularnaveeqqusiinerup qanoq annertussuseqarnissaa siumoortumik annertussusilerneqannginnissaa tulluurtutut nalilerneqarpoq. Tassunga oqaatigineqassaaq § 18 malillugu qularnaveeqqusiineq pillugu malittarisassanik erseqqinnerusunik aalajangersaasoqarsinnaammat.

§ 15-imut

Aalajangersakkami pineqarpoq ineqarnermut akiliummik akiliineq. Peqatigisaanik aalajangersakkamit takuneqarsinnaavoq kiassarnermik, innaallagissamik, gassimik imermillu atuinermut aamma akiliisoqartassasoq.

Aalajangersakkamit takuneqarsinnaavoq ineqarnermut akiliut aamma atuineq angissutsit immikkoortuusut marluk taamaalillunilu atuineq manna tikillugu ineqarnermut akiliummik akiliinerup ilaatut isigineqassanngitsoq.

Ineqarnermut akiliutip aalajangersarnissaanut naleqqiullugu siunertaavoq ineqarnermut akiliutip aalajangersarnissaanut naatsorsuinermi piumasaqaatinik aalajangersaasoqassasoq, tak. § 18. Taakku § 16, imm. 1-imi taaneqartut eqqarsaatigisassat tunuliaqutaralugit aalajangersarneqassapput.

Aamma nalinginnaasumik tamanna pillugu nassuiaatinut allanneqartunut innersuussisoqarpoq.

Imm. 2-mut

Aalajangersagaq nutaajuvoq aamma atuinermik naatsorsuinermit atassuteqarluni.

Aalajangersakkami oqaaseqatigiinni siullermi piviusumik atuineq paasineqassaaq atuineq assersuutigalugu innaallagissamut kiassarnermullu uuttuutini atuarneqarsinnaasoq atuinertut paasineqarsinnaasoq taannalu ilinniartut ineqarfianni ingerlatsinermi nalunaarsorneqarsinnaalluni. Piviusumik atuineq taamaalilluni ilinniartut ineqarfianni najugaqartup atuisarneranut pissusaannullu atassuteqarpoq taakkunanilu pissutsinik sunnerneqarluni. Ataasiakkaat atuinerat naatsorsorneqarsinnaanngippat immikkoortortami tassani ilinniartut ineqarfianni najugaqartumut atasimi agguaqatigiissitsinermik naatsorsuineq tunuliaqutaralugu piviusumik atuineq naatsorsorneqarsinnaassaaq. Tamanna pillugu malittarisassanik erseqqinnerusunik aalajangersaasoqarnissaa naatsorsuutigineqarpoq.

Aalajangersakkami oqaaseqatigiit aappaanni siunertaavoq assersuutigalugu ilinniartut ineqarfiata oqorsarluarsimannginnera tunngavigalugu allanut naleqqiullugu qaffasissumik atuinermut akiliisarnissamut qulakkeerineq.

Siunnersuummi § 52-imit peqatigisaanik takuneqarsinnaavoq aalajangersagaq aatsaat piffissami kingusinnersumi atulersinneqassasoq naatsorsuutigineqartoq. Siunnersuummi tamanna pillugu nalinginnaasumik nassuiaatini allanneqarsimasunut allatigut innersuussisoqarpoq.

§ 16-imut

Imm. 1-imut

Aalajangersagaq nutaajuvoq aamma ineqarnermut akiliutip aalajangersarnerani eqqarsaatigisassat suut ilanngunneqassanersut aalajangersarneqarluni.

Soorlu aalajangersakkamit takuneqarsinnaasoq siullermik ilinniartut ineqarfianni inissiap angissusaa eqqarsaatigineqassaaq. Tamatuma qularnanngitsumik kingunerissavaa inissiaq angineruppat aallaaviatigut ineqarnermut akiliummik annertunerusumik akiliisoqassasoq.

Ilinniartut ineqarfianni najugaqartup taassumalu inoqutigiivisa isertitaannut pissutsit pillugit apeqqummut naleqqiullugu ilaatigut inoqutigiit tamakkiisumik isertitaat tunuliaqutaralugu ineqarnermut akiliut aalajangersarneqassasoq. Isertitanik naleqqussarneqartumik ineqarnermut akiliummik eqquassinissamut tunuliaqutaasoq pillugu nassuiaatini nalinginnaasuni nassuiaatigineqartut eqqarsaasersuutit aalajangersakkami aallaavigineqarput. Inoqutigiit isertitaat annertuneruppata taava ineqarnermut akiliut qaffasinnerussasoq naatsorsuutigineqassasoq aallaaviatigut aallaaviusussaasoq.

Ilinniartut ineqarfianni inissiaq pequtilersoreerlugu atugassanngortinneqassanersooq pillugu apeqqut eqqarsaatigalugu tassani naatsorsuutigineqarpoq ilinniartut ineqarfianni inissiamit pequtilersugaanngitsumut naleqqiullugu pequtilersugaasumut annertunerusumik akiliisoqartassasoq, tassa inissiap pequtilersugaasup kingunerimmagu ilinniartut ineqarfianni najugaqartooq inissiap pequtilersornissaanut nammineq aningaasartuuteqassanngimmat.

Imm. 2-mut

Aalajangersagaq nutaajuvoq aamma Inatsisartut inatsisaannut aalajangersagaq taaneqartooq naapertorlugu ineqarnermut akiliummik ingerlaavartumik iluarsiiisoqartassammat. Aalajangersakkami siunniunneqarpoq ineqarnermut akiliutip nalinga piffissap ingerlanerani milliartunnginnissaata qulakkeerneqarnissaa.

§ 17-imut

Imm. 1-imut

Aalajangersagaq annertuutigut ilinniartut ineqarfii pillugit nalunaarummi atuuttumi § 15. imm. 1-imik issuaaneruvoq tassanilu pineqarluni ineqarnermut akiliutip akilerneranut piffissaq. Imm. 4-mut aalajangersakkami innersuussinermi pineqarpoq Namminersorlutik Oqartussaniit ilinniagaqarnersiutinik pisartagaqartunut ilinniartut ineqarfianni najugaqartunut naleqqiullugu ingerlaannartumik ilanngaassisarnissamut periarfissaq.

Imm. 2-mut

Aalajangersagaq annertuutigut ilinniartut ineqarfii pillugit nalunaarummi atuuttumi § 15. imm. 2-mik issuaaneruvoq tassanilu pineqarluni ineqarnermut akiliutip qaqugu kingusinnerpaamik akilernissaa piffissaq.

Imm. 3-mut

Aalajangersagaq ilinniartut ineqarfii pillugit nalunaarummi atuuttumi § 15. imm. 3-mik ingerlatitseqqinneruvoq tassanilu pineqarluni ilinniartut ineqarfiinik aqutsisoqarfiup akiliiffissamik paasissutissiinissamut pisussaaffia. Imm. 4-mut aalajangersakkami innersuussinermi pineqarpoq Namminersorlutik Oqartussaniit ilinniagaqarnersiutinik pisartagaqartunut ilinniartut ineqarfianni najugaqartunut naleqqiullugu ingerlaannartumik ilanngaassisarnissamut periarfissaq.

Imm. 4-mut

Tassani pineqarpoq ilinniartut ineqarfii pillugit nalunaarummi atuuttumi § 15, imm. 4-mik ingerlatitseqqinneq, tassanilu aalajangersakkami pineqarluni ineqarnermut akiliutip aamma atuinermut akiliutip ilinniartut ineqarfianni najugaqartup ilinniagaqarnersiutitut pisartagaanit ilanngaassinissamut ilinniartut ineqarfiinik aqutsisoqarfiup periarfissaqarnera. Akiliisarnerit pisariillisarnissaat Naalakkersuisunit tulluurtut isigineqarpat aamma assersuutigalugu piffissaq eqqorlugu akiliisarnerup qulakkeerneqarnissaa siunertaralugu aalajangersakkap atorneqarnissaa Naalakkersuisunit aalajangiiffigineqarsinnaavoq. Atuinermut akiliinermut naleqqiullugu tunngavigineqartussaavoq siunnersuummi § 15-ip atulersinnissaa, tak tamanna pillugu siunnersuummi § 53-imut innersuussineq.

§ 18-imut

Aalajangersagaq nutaajuvoq tassanilu pineqarluni nalunaarummik atulersitsinissamut Naalakkersuisunit pisussaaffik piginnaatitsissut, tassani aalajangersakkami immikkoortut taaneqartut malittarisassaliornerit erseqqinnerusumik aalajangersarneqarlutik.

Isertitanik naleqqussarneqartumik ineqarnermut akiliummut aamma atuinermi il.il. akiliinermut naleqqiullugu siunnersuummi siunniussa, tak. § 15 aamma 16, taamaalilluni aalajangersakkami immikkoortunik taaneqartunik erseqqinnerusumik malittarisassaliortumik nalunaarummik aatsaat atulersitsisoqarpat piviusunnngortinneqarsinnaapput.

Ineqarnermut akiliutip erseqqinnerusumik aalajangersarnera aamma atuinermik akiliisarnerup eqqunneqarnera aamma ilinniagaqarnersiutinut atatillugu isumagineqartariaqarpoq. Ineqarnermut akiliut ukiumoortumik iluarsineqartassanersoq taamaattoqassappallu suna tunngavigineqassanersoq pillugu apeqqummut naleqqiullugu siunnersuummi § 16, imm. 2-mut innersuussisoqarpoq. Taamaalilluni isertitat naatsorsornerinik nassuiaanerit ilisimaneqareersut aallaavigalugit sulisoqartariaqassaaq akigititallu procenti aaqqiissutissaq naapertorlugu iluarsivigineqartassalluni, tak. procenti aaqqiissutissaq aamma maannakkorpiaq aningaasarsiat pillugit Inatsisartut inatsisaat.

Soorlu qulaani § 15, imm. 2-mut nassuiaatini taaneqartoq atuineq eqqarsaatigalugu anguniagaavoq piviusumik atuinermut naleqqiullugu innaallagissamut, kiassarnermut il.il. atuinermut siunissami aallaaviatigut akiliisoqartassasoq. Tamanna pillugu maleruagassanik aalajangersaanissami ilinniartut ineqarfiinut allanut sanilliullugu ilinniartut ineqarfii ilaat kiassarnissaat akisunerulersinnaammat eqqarsaatigisariaqarpoq, atuisullu akiliuteqartarnissaasa atulerneratigut ilinniartunut tapiissutitut akigititat aamma qaffattariaqarnissaat eqqarsaatigalugit.

Peqatigisaanillu tunngavigineqassalluni § 18-imi piginnaatitsissutip atorneratigut erseqqinnerusumik malittarisassaliorneq soqutigisaqaqatigiit attuumassuteqartut suleqatigeqqissaarlugit pisussaammat, tassunga ilanngullugit Aningaasaqarnermut Naalakkersuisoqarfik, Isumaginninnermut Inatsisinillu atuutsitsinermut Naalakkersuisoqarfik kiisalu Ineqarnermut Attaveqarnermullu Naalakkersuisoqarfik, taakkunaniillutik inatsisinut akisussaaffiit sulinermut pingaaruteqartut.

Peqatigisaanik oqaatigineqassaaq piginnaatitsinerup atorneqarnissaanut piffissaliussamik erseqqissumik aalajangiinissaq suli ajornarmat.

§ 19-imut

Imm. 1-imut

Aalajangersakkami pineqarpoq ilinniartut ineqarfii pillugit nalunaarummi atuuttumi § 2, imm. 5-isulli apeqqutip assinga.

Inuit taaneqartut tulleriariffiusunut ilaangikkaluartut taamaattumillu ilinniartunut allanut unammilleqatigiinnermi inissisimangikkaluartut ilinniartut ineqarfianni inissiamik aalajangersimasumik initaartitsinermut atatillugu ilaqquttat ilaatinneqartut pillugit apeqqummut isummernissanut tulluurtut isigineqarsimavoq. Ilinniagaqarnersiutit pillugit malittarisassani akiliunneqarluni angalasinnaanermut periarfissamut innersuussinermut ilaavoq nalinginnaasumik aalajangersimasumik sivilisussuseqartumik ilinniarfimmi najugaqarnissaq pineqartarmat. "Ilinniagaqarnersiutit pillugit malittarisassani" paasineqarpoq ilinniagaqarnersiutit pillugit Namminersorlutik Oqartussat nalunaarutaanni nr. 9, 19. juli 2017-imeersumi malittarisassat, ilinniagaqarnersiutit pillugit Inatsisartut inatsisaat nr. 12, 22. november 2011-meersumi tunngaveqartumik atulersinneqartoq.

Imm. 2-mut

Ilinniartut ineqarfianni inissiamik aalajangersimasumik angissuseqartumik pissuseqartumillu piomasaqarsinnaanginneq pillugu malittarisassamut atuutereersumut aalajangersagaq katersuivoq, tak. aamma nassuiaatini nalinginnaasumi tamanna pillugu allataq. Aammattaaq imm. 1-imut innersuussinermut tamanna atuulluni, tassani taamaallaat ersersinneqarluni piginnaasat pigineqareersut aallaavigalugit ilaqquttat ilaatinneqartut sillimaffigineqassasut.

Peqatigisaanik tamatuma assingaa ilinniartut ineqarfianni najugaqartup ataatsip ilinniarnermi ingerlanera tamaat ilinniartut ineqarfianni inissiami tassani najugaqaannarnissani aamma naatsorsuutigisinnaanngikkaa, tak. aamma § 35.

Tamanna oqaatigineqartutut ilinniartut ineqarfiinik tatisimanninnermik tunngaveqarpoq, siumoortumik initaartinneqarnissamut malittarisassanik pitsaasunik aalajangersaanissaq ajornartillugu.

Aalajangersakkap aamma kingunerisaanik ilinniartut ineqarfianni nammineq ineerassamik pissarsinissamik tunngaviatigut aamma piumasaqartoqarsinnaanngilaq, tassa ilinniartut ineqarfianni najugaqartoq ilinniartut ineqarfianni inissiamik pineqartup ilinniartut ineqarfianni najugaqartunik allanik avitassanik innersuunneqarsinnaammat.

Ilinniartut ineqarfianni inissiaq qanoq ittoq neqeroorutigineqarsinnaanera pillugu apeqqut taamaattumik ingerlatsivimmik suliaqartuniippoq. Ingerlatsinermi inatsisit nalinginnaasut aallaavigalugit innersuussineq naatsorsuutigineqarpoq sapinngisamik tulluurtumik isumagineqassasoq, tassunga ilanngullugu inissiat avinneqartussat pillugit apeqqummut naleqqiullugu, assersuutigalugu ukiunut suaassusermullu naleqqiullugu agguaassinerup pinissaa.

§ 20, imm. 2-mut innersuussineq isumaqarpoq ilinniartut ineqarfinni najugaqartoq piumasaqarsinnaasooq ilinniartut ineqarfianni inissiap tiguneqarnerani eqqiaarneqarsimassasoq illersorneqarsinnaasumillu pitsaassuseqassasoq.

§ 21-imut innersuussineq isigineqassaaq atasutut nalunaarusiornikkut malittarisassiorsinnaanermut, taamaalillunilu ilinniartut ineqarfianni najugaqartup naatsorsuutigisinnaalissallugu ilinniartut ineqarfiata aalajangersimasumik pitsaassuseqarnissaa, imaluunniit aalajangersimasunik atortulersugaanissaa.

§ 20-mut

Imm. 1-imut

Aalajangersagaq ilinniartut ineqarfii pillugit nalunaarummi atuuttumi § 17 imm. 1-imik ilaatigut ingerlatitseqqiineruvoq.

Aalajangersakkami piffissaq ilinniartut ineqarfianni najugaqartup ilinniartut ineqarfianni inissiamik tigusinissaa pillugu malittarisassaliorpoq.

Imm. 2-mut

Aalajangersagaq ilinniartut ineqarfii pillugit nalunaarummi atuuttumi § 17, imm. 2-mik ilaatigullu § 17, imm. 1-imik ingerlatitseqqinneruvoq. Aalajangersakkami nalunaarneqarpoq

ilinniartut ineqarfianni najugaqartup ilinniartut ineqarfianni inissiamik piffissami tigusinerani ilinniartut ineqarfianni inissiaq qanoq pitsaassuseqassanersoq.

Aalajangersagaq ilassuserneqarsinnaavoq malittarisassanik § 21 naapertorlugu aalajangersarneqartunik.

§ 21-mut

Aalajangersagaq nutaajuvoq. Tassani pineqartoq aalajangersagaq pisinnaatitsissutaasoq, taannalu tunngavigalugu Naalakkersuisut nalunaarusiornikkut aqussinnaavaat ilinniartut ineqarfiisa ineqarfimmik attartornerup aallartinnerani pitsaassusissaat.

Pisinnaatitsissullu assersuutigalugu atorneqarsinnaavoq malittarisassanik aalajangersaanermut, ilinniartut ineqarfiata eqqiarneqarsimasuunissaanik aammalu kumannik uumasuaqqanillu allanik soqannginnissaanik, qilaat aamma iikkat qalipanneqarsimanissaannik, natillu lakkerneqarsimanissaannik maleruagassiornernut. Pissutsillu qanoq ittuuneri apeqqutaatillugit aamma maleruagassiortoqarsinnaavoq ilinniartut ineqarfianni igalaat, skaviit matui aamma matut innarlerneqarsimasannginnissaannik. Aalajangersagaq aamma atorneqarsinnaavoq maleruagassiornermut matuersaaserfiit atorsinnaasuunissaannut, aamma ilinniartut ineqarfianni innaallagissamut atortulersuutit ajoquteqannginnissaanut. Kiisalu aamma aalajangersagaq atorneqarsinnaavoq aqutsinermut qanoq pequsersuisimanissamik atortulersuisimanissamillu ilinniartut ineqarfianni, assersuutigalugu errorsiviit assigisaallu eqqarsaatigalugit.

2015-imi ilinniartut ineqarfii pillugit ataatsimiinnermut atatillugu kaammattuutigineqarpoq inoqutigii amerlassusaat inuit 18-it sinnerlugit ukiullit kiisalu meeqaat atuartut amerlassusaannut naapertuuttumik matuersaatinik tunniussisoqartariaqartoq. Pisinnaatitsissullu aamma pissutsit pineqartut pillugit aqutsinermi atorneqarsinnaavoq.

§ 22-mut

Imm. 1-imut

Aalajangersagaq ilaannakuusumik ilinniartut ineqarfii pillugit nalunaarummi atuuttumi § 17, imm. 4-mik ingerlatitseqqinneruvoq tassanilu pineqarluni ilinniartut ineqarfianni inissiami amigaataasinnaasunut tunngatillugu maalaaruteqarnissamut naleqqiullugu ilinniartut ineqarfianni najugaqartup iliuuseqarnissamut pisussaaffia.

Nalunaarummi atuuttumi aalajangersakkap assinga ilinniartut ineqarfiinik aqutsisoqarfik eqqunngitsumik iliuuseqarsimappat piffissaliussap atuussinnaannginnera pillugu ilassummik aalajangersagaq tapertaqarpoq. Tamannali oqaasertaliussami nutaami ilanngunneqanngilaq,

tassa tunngavigineqarmat ingerlatsivik eqqunngitsumik iliuseqassanngitsoq. Tamatuma saniatigut niuerfimmi atukkatigut nalinginnaasumik isumaqatigiissuteqarneq pineqarnani.

Aalajangersakkami oqaaseqatigiit aappaanni pineqarput amigaatit takusaaanngitsut, tamatumali saniatigut aamma ilaasinnaalluni ilinniartut ineqarfianni najugaqartoq arlaannik peqquteqarluni piffissami kingusinnerusumi ilinniartut ineqarfianni inissiamut aatsaat iserterluni.

Imm. 2-mut

Aalajangersagaq ilinniartut ineqarfii pillugit nalunaarummi atuuttumi § 17 imm. 5-imik ingerlatitseqqiineruvoq.

Aalajangersakkap assingaa piffissami attartorfiusumi sapaatit akunnerini siulliit marluk iluanni ilinniartut ineqarfianni najugaqartup ilinniartut ineqarfiinik aqutsisoqarfimmut uparuarsimasaanut ilinniartut ineqarfianni inissiami amigaatinut naleqqiullugu ilinniartut ineqarfiinik aqutsisoqarfik akisussaatisinnaanngitsoq.

§ 23-mut

Imm. 1-imut

Aalajangersagaq ilinniartut ineqarfii pillugit nalunaarummi atuuttumi § 18, imm. 1-imik issuaaneruvoq tassanilu pineqarluni ataatsimoorfiusutut taaneqartut soorlu ataatsimiittarfimmut, errorsisarfimmut, cykkilit inaannut il.il. naleqqiullugu ilinniartut ineqarfiinik aqutsisoqarfiup aserfallatsaaliinissamut pisussaaffia.

Imm. 2-mut

Aalajangersagaq ilinniartut ineqarfii pillugit nalunaarummi atuuttumi § 18, imm. 2-mik issuaaneruvoq.

Aalajangersagaq nalinginnaasumik attartortitsinermik ingerlataqarnerup iluani nalinginnaasumik tunngaviusunut naapertuuppoq, illumik attartortitamik piginnittoq illumi attartortitami teknikikut ikkussukat, innaallagissamik ikittaaatit il.il. illersorneqarsinnaasumik aserfallatsaaliornissaannut pisussaaffeqarluni.

Imm. 3-mut.

Aalajangersakkami qanoq akulikitsigisumik nutarterineq imaluunniit iluarsaassineq pisassanersoq pillugu apeqqut pineqarpoq.

§ 24-mut

Imm. 1-imut

Aalajangersagaq ilinniartut ineqarfii pillugit nalunaarummi atuuttumi § 21, imm. 1, oqaaseqatigiinnik siullernik ilaannakuusumik issuaaneruvoq aamma iliniartut ineqarfianni inissiami ajoqusiinerit pillugu ilinniartut ineqarfianni najugaqartoq ilinniartut ineqarfiinik aqutsisoqarfimmut nalunaaruteqarnissamut pisussaaffeqarluni. Aalajangersakkami atuuttumi ajoqusiinerit kinguartinneqarsinnaanngitsut ajoqusiinerillu allat akornanni immikkoortitsisoqarpoq. Taamatut immikkoortitsineq uani peerneqarpoq, tamatumalu kingorna ajoqusiinerit tamarmik pingaaruteqarlutik taamaattumillu ingerlaannartumik nalunaarutigineqassallutik.

Nalunaaruteqartussaataaneq tassunga atatillugu ilinniartut ineqarfianni najugaqartup nammineq ilinniartut ineqarfianni inissiaanut killeqartinneqarpoq, kisiannili nalinginnaanerumik nalunaaruteqartussaataaneq, ilinniartut ineqarfiannut atassuteqartoq § 29-mi malittarisassaqartinneqarluni.

§ 25-mut

Imm. 1-imut

Aalajangersagaq ilinniartut ineqarfii pillugit nalunaarummi atuuttumi § 21, imm. 2-mik issuaaneruvoq tassanilu pineqarluni ilinniartut ineqarfiinik aqutsisoqarfiup ilinniartut ineqarfianni inissiamut isersinnaanera.

Aalajangersakkap kingunerisaanik aalajangersakkami taaneqartunik pisuni ilinniartut ineqarfianni najugaqartoq ilinniartut ineqarfiinik aqutsisoqarfiup ilinniartut ineqarfianni inissiamut isertinnissaanut pisussaaffeqarpoq.

Ilinniartut ineqarfiinik aqutsisoqarfiup isernissaanut itigartitsinissamut suna naammaginatut tunngaviusinnaanersoq aalajangersimasuni nalilernerqartariaqarpoq, pisulli naapertorlugit tassunga ilaasinnaalluni assersuutigalugu napparsimaneq. Tassunga atatillugu peqputaasoq ilinniartut ineqarfiinik aqutsisoqarfiup isernissamut pisariaqartitsinera qanoq nukinginnarluinnartuuneranut ataqatigiissinneqartariaqarpoq. Assersuutigalugu imermik ajoqusertoqarsimaneranik paasisaqarnermi, ingerlaannartumik akuliuttoqarnissaanik pisariaqartitsisoqarluni, isernissamut nukinginnarluinnartumik isernissarli pisariaqarpat pissuseq akерlianik imm. 3, oqaaseqatigiit aappaanut ilaasussaassaaq.

Nr. 1-imut

Aalajangersakkami nr. 1-imut assersuutigalugu ilaasinnaavoq ilinniartut ineqarfianni najugaqartoq akuerineqarnani inisimasoqarnera imaluunniit iliniartut ineqarfianni inissiamik tamakkiisumik ilaannakuusumilluunniit attartortitsisimaneranik tunngavissaqartumik pasitsaassaarneq.

Nr. 2-mut

Aalajangersakkami nr. 2 assersuutigalugu atorneqarsinnaassaaq ilinniartut ineqarfiinik aqutsisoqarfiup assersuutigalugu pisarneq naapertorlugu misissuinnermut atatillugu ilinniartut ineqarfianni najugaqartut inissiaannik ataasiakkaanik misissuinissamik pisariaqartitsinerani.

Nr. 3-mut

Nr. 3-mi pineqarpoq nalinginnaasumik taamaalillunilu nukinginnarluinnangitsut iluarsaassinerit, tak. imm. 3, oqaaseqatigiit aappaat.

Nr. 4-mut

Aalajangersakkami nr. 4-mi amerlanertigut ilinniartut ineqarfianni inissiap sivitsunngitsumi attartoqqinneqartussanngorpat, ilinniartut ineqarfianni najugaqartup inissiamit nuuttussanngornera pissutigalugu.

Imm. 2-mut

Aalajangersagaq ilinniartut ineqarfii pillugit nalunaarummi atuuttumi § 22, imm. 3-mik ingerlatitseqqinneruvoq tassanilu pineqarluni assersuutigalugu nakkutilliinnermut atatillugu ilinniartut ineqarfiinik aqutsisoqarfimmit paasineqarluni attartorneqartup paarineqarnissaanut pisussaaffimminik ilinniartut ineqarfianni najugaqartoq piaaralugu imaluunniit ingasattumik sumiginnaanikkut pisussaaffimminik sumiginnaasimasoq. Aalajangersagaq ilinniartut ineqarfianni najugaqartup pitsaasumik illersorneqarsinnaasumillu ilinniartut ineqarfianni inissiamik passunnissaanut nalinginnaasumik pisussaaffeqarneranut atatillugu isigineqassaaq.

Ilinniartut ineqarfiinik aqutsisoqarfik assersuutigalugu ilinniartut ineqarfianni inissiamik iluarsaassinnermut atatillugu paasisaqarpat piffissami sivisuumi eqqiarneqartarsimannginnera pissutigalugu ipertoorujunngorsimasoq ajoquserneqarsinnaalluni ilinniartut ineqarfianni inissiap sukumiisumik eqqiarneqarnissaanik ilinniartut ineqarfianni najugaqartoq ilinniartut ineqarfiinik aqutsisoqarfimmi qinnuigineqarsinnaavoq. Taamaaqataanni atuutissaaq assersuutigalugu igalaani ajoqusersimanerit paasineqarpata, qarsorsartartoq igalaamut qajannaarut atornagu igalaat ammatillugit silaannarissaasoqarsimanera imaluunniit kamippaat silami atortakkat illup iluani atorneqarneri pissutigalugit natermi ajoqusersimanerup paasineqarnera pissutigalugu.

Imm. 3-mut

Aalajangersagaq ilinniartut ineqarfii pillugit nalunaarummi atuuttumi § 21, imm. 4-mik ingerlatitseqqinneruvoq ilinniartut ineqarfianni najugaqartup inissiaqarfiani ilinniartut ineqarfiinik aqutsisoqarfiup sulinermik aallartitsisinnaanera tassani pineqarluni. Tassani pineqarsinnaavoq igaffiup uffarfiulluunniit nutarterneqarnera, matut igalaallu taarserneqarneri, taamaalilluni sukumiinerup aallartinneqarnissaanut nukinginnartumik pisariaqartitsisoqarnani, akerlianillu aalajangersakkami oqaaseqatigiit aappaanni pineqarluni ilinniartut ineqarfiinik aqutsisoqarfiup ingerlaannartumik isumagineqarnissaannik iluarsaassinerit nukinginnarluinnartut.

Imm. 4-mut

Aalajangersagaq ilinniartut ineqarfii pillugit nalunaarummi atuuttumi § 21, imm. 5-imik ingerlatitseqqinneruvoq ilinniartut ineqarfiinik aqutsisoqarfiup sulineranut atatillugu pisariaqanngitsumik ajoqusiinermut akornusersuinernulluunniit naleqqiullugu iliniartut ineqarfianni najugaqartumik illersuinissamik kissaateqarnermik tunngaveqartoq. Aalajangersakkami oqaaseqatigiit aappaanni pineqarpoq sulinerup annertunerusumik naammassineqarnerata kingorna aamma naggataarutaasumik kingornatigut annikitsunik iluarsaassisoqartussaattillugu. Tassani assersuutigalugu pineqarsinnaapput ilinniartut ineqarfiinik aqutsisoqarfiup kiassaatioqqanik assigisaanilluunniit peersisimanera iikkamilu annertuunik putoqalersimalluni kingornatigut iluarsaanneqartussat.

Tassunga atatillugu pineqarpoq aalajangersagaq nalinginnaasooq sulinerit assigiinngitsut tamarmik pineqarsinnaallutik.

§ 26-mut

Aalajangersagaq ilinniartut ineqarfii pillugit nalunaarummi atuuttumi § 23-mik ingerlatitseqqinneruvoq tassanilu pineqarluni malittarisassanik eqqortitsinissamut pisussaaffik. Aalajangersakkamut taamaalilluni ilaavoq ilinniartut ineqarfianni najugaqartup pulaartuisa ilinniartut ineqarfimmiinneranni ilinniartut ineqarfianni najugaqartup akisussaana, tak. assersuutigalugu § 27, imm. 1 ataaniittoq.

§ 27-mut

Imm. 1-imut

Aalajangersagaq ilinniartut ineqarfii pillugit nalunaarummi atuuttumi § 24-mik issuaaneruvoq tassanilu pineqarluni ilinniartut ineqarfianni najugaqartup taarsiinissamut akisussaana, tassunga ilanngullugit ajoqusiinernut ilinniartut ineqarfianni najugaqartup pulaartuisa illersorneqarsinnaanngitsumik ilinniartut ineqarfianni pissusilersornerinut naleqqiullugu. Tassunga atatillugu aalajangersagaq malittarisassani najoqqutassatut isigineqarsinnaavoq, tassa taamatut taarsiinissamut akisussaaneq aamma nalinginnaasumik taarsiinissamut malittarisassanit takuneqarsinnaammat.

§ 28-mut

Imm. 1-imut

Aalajangersagaq nutaajuvoq siunertaralugulu nalinginnaasumik suliffiup avataani ilinniartut ineqarfianni najugaqartoq isersinnaajunnaarsimanerani taamaattumillu pineqartup isernissaanut sulisunik aggersaasoqarluni imaluunniit paarnaarsaasiortumik atorfissaqartitsisoqalernerani aningaasartuutit matussusernissaannut erseqqissumik tunngavissamik pilersitsinissaq.

Aalajangersagaq 2015-imi ilinniartut ineqarfiit pillugit ataatsimiinnermi tamanna pillugu siunnersuuteqarnerup kingunerisaanik ilanngunneqarpoq. Tassunga atatillugu aamma allanngarpoq amerlanertigut tamanna ajornartorsiutaasartoq unnukkuu atuuttartoq, pingaartumik sapaatit akunnerisa naaneranni.

Imm. 2-mut

Aalajangersagaq nutaajuvoq aammattaarlu 2015-imi ilinniartut ineqarfii pillugit ataatsimiinnermi tamanna pillugu siunnersuuteqarnerup malitsigisaanik ilanngunneqarluni, tassani immikkut allanik matuersaatinik pissarsinermut aningaasartuutit akilerneqarnissaannut tunngavissamik erseqqissumik pissarsisoqarnissaanik kissaateqartoqarluni.

§ 29-mut

Aalajangersagaq ilinniartut ineqarfii pillugit nalunaarummi atuuttumi § 25-mik ingerlatitseqqinneruvoq.

Tassani pineqarput ilinniartut ineqarfianni najugaqartup nammineq inissiaanut tunngangitsunut ajoqusiinernut naleqqiullugu nalunaaruteqartussaataaneq, tassunga tunngatillugu takujuk § 24, kisianni aamma ineqarfimmi immikkoortuni allani. Aalajangersagaq taanna malillugu nalunaaruteqartussaataanermi taamaalilluni assersuutigalugu ataatsimoorfiusuni ajoqusiinerit, ilinniartut ineqarfianni najugaqartumit alaatsinaanneqartussat. Tamanna ilinniartut ineqarfianni illusimatitsinerup immikkut inissiaqarfiuneranut atatillugu isigineqassaaq, tassaniilluni ilinniartut ineqarfiannut taamatut akisussaaneq, tassunga ilanngullugit ilinniartut ineqarfianni najugaqartut allat. Nalunaaruteqartussaataanermi apeqqutaanngilaq kina ajoqusiinersoq imaluunniit qanoq ajoqusiisoqarnersoq.

§ 30-mut

Aalajangersagaq ilinniartut ineqarfii pillugit nalunaarummi atuuttumi § 27-mik ingerlatitseqqinneruvoq.

Nr. 1-imut

Aalajangersakkami nr. 1-imi pineqarput pulaartut unnuisut imaluunniit pulaartut ima akulikitsigisumik ilinniartut ineqarfianni inissiamiittarlutik pineqartup piviusumik nuussimasutut isikkoqarluni.

Nr. 2-mut

Aalajangersakkami nr. 2 attartortitsinermut nalinginnaasumik tunngasuussaaq. Tassunga atatillugu pingaaruteqanngilaq ilinniartut ineqarfianni inissiap ilinniartut ineqarfiinik aqutsisoqarfimmi akuersisoqarnani ilinniartut ineqarfianni najugaqartunut allanut tunniunneqarnersoq. Aamma taamaappoq ilinniartut ineqarfianni inissiamik atuinermut

akiliuummik akiliisoqarsimannginnera uppersarneqaraluarpalluunniit. Aalajangersakkami aamma ilinniartut ineqarfianni najugaqartoq inissiamik iliniartut ineqarfianni najugaqartumik allamik taarsiippat.

Assersuutit taaneqartut tamakkiisuunngillat, tassa aalajangersakkami ilinniartut ineqarfianni inissiamik eqqunngitsumik atuineq pineqarmat. Taamaalilluni aamma assersuutigalugu nujaleriffimmik, ulluunerani paarsisarnermik imaluunniit tuniniaasarnermik il.il. ilinniartut ineqarfianni inissiamiit inuussutissarsiutigalugu ingerlatsisoqassanngilaq.

§ 31-mut

Aalajangersagaq tamarmiulluni nalunaarummi atuuttumi § 27-mut naapertuuppoq tassanilu pineqarluni ilinniartut ineqarfianni najugaqartoq qanoq annertutigisumik ilinniartut ineqarfianni inissiami allannguisinnaanera pillugu apeqqut.

Nr. 1-imut

Allannguinissamut killeqartumik periarfissaqarneq utaqqiisaasumik illusimatitsinerup pineqarneranut atatillugu isigineqartariaqarpoq, aamma ilinniartut ineqarfianni inissiaq piffissap sivikitsup iluani ilinniartut ineqarfianni najugaqartumut nutaamut atugassanngortinneqartussaammat. Tamatuma saniatigut naatsorsuutigineqarpoq allannguinernik annertunerusunik aallartitsineq ilinniartut ineqarfianni inissiami aamma ilinniartut ineqarfiata illutaanut annertuumik ajoqusiinnaasoq taamaalillunilu siunissami ilinniartut ineqarfianni najugaqartussanut ajoqusiilluni.

Nr. 2-mut

Nr. 2 aamma malittarisassanik atuuttunik ingerlatitseqqinneruvoq pingaartumillu eqqiluisaarnissamik tunngaveqarluni assersuutigalugu ilinniartut ineqarfianni najugaqartut sapigaqartut eqqarsaatigineqarlutik.

Nr. 3-mut

Aalajangersakkami nr. 3-mut naleqqiullugu sakkut pillugit inatsimmi atuuttumi § 6-imit takuneqarsinnaavoq politimesterip assersuutigalugu sakkunik peqarnissamut akuersissummik nalunaaruteqarneranut atatillugu aamma toqqortarinissaannut periarfissaanerinullu tunngasunik akuersissummi piumasaqaatinik aalajangersaasinnaasoq, isumannaatsuunissaq eqqarsaatigalugu piumasarineqartussatut naatsorsuutigineqarsinnaasunik.

§ 32-mut

Imm. 1-imut

Aalajangersagaq ilinniartut ineqarfii pillugit nalunaarummi atuuttumi § 28-mik ingerlatitseqqinneruvoq kinguneralugulu ilinniartut ineqarfianni najugaqartoq nammineq

akilikkaminik illinniartut ineqarfianni inissiami assigiinngitsunik ikkussuisinnaanera, tamatumunnga ikkussuiffissat piareersarneqarsimanngippata.

Aalajangersakkami assersuutitut taaneqartut tamakkiisuunngillat, tassa taakkununnga aamma ilaasinnaammat assersuutigalugu errorsivik, panersiivik imaluunniit erruissut.

Imm. 2-mut

Aalajangersakkami takuneqarsinnaavoq ilinniartut ineqarfiinik aqutsisoqarfik ilinniartut ineqarfianni najugaqartup kissaataanut akerliusinnaasoq, ilinniartut ineqarfiinik aqutsisoqarfiup uppersarpagu assersuutigalugu ilinniartut ineqarfiata aqqissugaanera piginnaasaalu innaallagissamik pilersornera kuuffialu eqqarsaatigalugit ikkussugassanut kissaatigineqartut naammassanngitsut.

Ilinniartut ineqarfianni najugaqartoq allatigut pisuni tamani ikkussuinerit isumaginissaat sioqqullugu akuersissummik ilinniartut ineqarfiinut aqutsisoqarfimmut qinnuteqartassaaq. Tamatumunnga pissutaavoq ilinniartut ineqarfiannut tamarmiusumut iliniartut ineqarfiinik aqutsisoqarfiup soqutigisanik isumaginnittuunera, tassunga ilanngullugu ilinniartut ineqarfianni najugaqartumut pineqartumut sanilit kiisalu ilinniartut ineqarfianni najugaqartut allat.

§ 33-mut

Aalajangersagaq ilinniartut ineqarfii pillugit nalunaarummi atuuttumi § 30-mik issuaaneruvoq aamma ilinniartut ineqarfianni najugaqartunut immikkut pisariaqartitsisunut atassuteqarluni.

Aalajangersakkap kingunerisaanik ilinniartut ineqarfianni najugaqartoq, immikkut atortunik pisariaqartitsisoq, tamanna pillugu ilinniartut ineqarfiinik aqutsisoqarfimmiit siumoortumik akuersissummik pissarsereermigut tamakkuninnga ikkussuisinnaatitaavoq.

Aalajangersakkami oqaaseqatigiinni siullerni assersuutit taaneqartut tamakkiisuunngillat, kisiannili atortut ilinniartut ineqarfianni najugaqartumut pineqartumut immikkut pisariaqartinneqartuussallutik.

Aalajangersakkami oqaaseqatigiit aappaata assingaa oqaaseqatigiinni siullerni akuersissummut ilinniartut ineqarfiinik aqutsisoqarfiup piumasarisinnaallugu kommunalbestyrelsip akuliunneratigut atortut ikkussuunnissaat sioqqullugu pissutsimut ilinniartut ineqarfianni inissiap utertinneqarneranut aningaasartuutinut qularnaveeqqusiisoqassasoq.

Pilerseqqinneqarnissaanut piumasaqaat aamma utaqqiisaasumik illusimatitsinerup pineqarnera, aamma ilinniartut ineqarfianni inissiap piffissap ungasinngitsup iluani ilinniartut ineqarfianni najugaqartumut nutaanut atugassanngortinneqarnissaa, qularnanngitsumik

assinganik pisariaqartitsinngitsoq, tassunga ikkussukkat akornutaasinnaaneri tunuliaqutaralugu isigineqassaaq.

Ilinniartut ineqarfiinik aqutsisoqarfiup siumoortumik akuersissuteqarnissaa pillugu piunasaqaammut pissutaavoq § 30-mut nassuiaammi naatsorsuutigineqartoq allannguinerinik annertunerusunik aallartitsineq ilinniartut ineqarfianni inissiami, inunnut aamma ilinniartut ineqarfiata illutaanut annertuumik ajoqusiinnaasoq taamaalillunilu siunissami ilinniartut ineqarfianni najugaqartussanut ajoqusiilluni.

Allatigut nalinginnaasumik taarsiinissamut malittarisassat malillugit ilinniartut ineqarfianni najugaqartup ikkussugaanik peqquteqartumik ajoqusiinernut ilinniartut ineqarfianni najugaqartoq taarsiisussaataitaavoq. Allatigut aamma ilinniartut ineqarfiinut nalunaarummi atuuttumi § 31-mi erseqqissumik takuneqarsinnaavoq. Inatsisilli oqaasertaanut matumunnga ilanngunneqarnissaata pisariaqartuusoq nalilerneqarnani, tassa tamanna nalinginnaasumik taarsiinissamut malittarisassanit takuneqarsinnaareemat.

§ 34-mut

Imm. 1-imut

Aalajangersagaq ilinniartut ineqarfii pillugit nalunaarummi atuuttumi § 32, imm. 1-imik ingerlatitseqqinneruvoq tassanilu pineqarluni nuunneq ilinniartut ineqarfiinik aqutsisoqarfimmik isumaqatigiissut malillugu ilinniartut ineqarfianni najugaqartup pisussaaffiinut qulakkeernissaa.

Aalajangersakkami allatigut ilinniartut ineqarfianni najugaqartup taamaatitsinera pineqanngilaq, tassunga § 38 takujuk, kisiannili najugaqartoq qaqugu ilinniartut ineqarfianni inissiamiit piviusumik nuussanersoq pillugu apeqqut pineqarluni.

Aalajangersagaq pissutsinut arlalinnut atassuteqarpoq, tassunga ilanngullugit ilinniartut ineqarfianni inissiamik misissuinissamik pisariaqartitsineq. § 42, imm. 1, nr. 4-imi pineqarpoq ilinniartut ineqarfiinik aqutsisoqarfimmik isumaqatigiissuteqarnani ilinniartut ineqarfianni najugaqartup piffissaanngitsukkut nuunnerani attartormik isumaqatigiissummik ilinniartut ineqarfiinik aqutsisoqarfiup atorunnaarsitsisinaanera.

Imm. 2-mut

Aalajangersagaq ilinniartut ineqarfii pillugit nalunaarummi atuuttumi § 32, imm. 2-mik ingerlatitseqqinneruvoq tassanilu pineqarluni imm. 1 malillugu pisussaaffimmik sumiginnaanerup kingunerisinnaasai.

§ 35-mut

Aalajangersagaq ilinniartut ineqarfii pillugit nalunaarummi atuuttumi § 33-mik issuaaneruvoq tassanilu pineqarluni tamanna pisariaqartinneqarpat ilinniartut ineqarfianni najugaqartup nuutinnissaanut ilinniartut ineqarfiinik aqutsisoqarfiup periarfissaqarnera.

Assersuutigineqartut tamakkiisuunngillat. Taamaattorli namminiinnarsortumik nuunnerussanngilaq, tassa nuunneq piviusorsiorlut piumasaqaatit aallaavigalugit tunngavilersorneqassammat.

Aalajangersagaq allatigut ilinniartut ineqarfianni inissiap utaqqiisaasumik illusimaffiunera pillugu tunngaviusumut assersuunneqassaaq, aamma ilinniartut ineqarfiisigut tatisimanninneq pissutigalugu pitsaanerpaamik isumalluutitigut atuinissaq siunertaralugu tullerriaartuarnissaq isumagineqartussaammat. Taamaattumik inatsimmi ilinniarnep ingerlanera tamaat ilinniartut ineqarfianni inissiami ataatsimi ilinniartut ineqarfianni najugaqartup periarfissaqarnera pillugu isumalluarnissamik malittarisassanik aamma saqqummiussisoqanngilaq.

§ 36-mut

Imm. 1-imut

Aalajangersakkami oqaaseqatigiit siulliit ilinniartut ineqarfii pillugit nalunaarummi atuuttumi § 34, imm. 3, oqaaseqatigiinnik siullernik issuaanerupput. Aalajangersagaq ilinniartut ineqarfiini tatisimanninnermik tunngaveqarpoq, piginnaasamik qaqugukkulluunniit takkuttussamik iluaquteqarnissaq ajornarluni.

Aalajangersagarli oqaaseqatigiit aappaannik nutaamik ilaneqarsimavoq. Taassuma assingaa oqaaseqatigiinni siullerni malittarisassaq atorneqassanngitsaq, ilinniartut ineqarfianni najugaqartoq ilinniagaqarnerisutit pillugit malittarisassat tunuliaqutaralugit meeqqanik 18-it inorlugit ukiulinnik, aappamik inooqatigisamilluunniit ilaqarnissamik periarfissiippata peqatigisaanillu taakku siunnersuummi § 19, imm. 1 naapertorlugu ilinniartut ineqarfianni najugaqartoq peqatigalugu illusimatinneqarlutik.

Oqilisaassinissamut malittarisassamut nutaamut pissutaavoq ilaqqut ilaatinneqartut ilinniartut ineqarfianni najugaqartup peqanngikkallarnerani aamma nutsertussaappata ilaqtariit taamatut ittut ajornarluinnartumik inissisimalersinnaanerat.

Imm. 2-mut

Aalajangersagaq ilinniartut ineqarfii pillugit nalunaarummi atuuttumi § 3, oqaaseqatigiit aappaannik ingerlatitseqqinneruvoq aamma ilinniartut ineqarfianni najugaqartup

peqannginnerani ilinniartut ineqarfiinik aqutsisoqarfiup ilinniartut ineqarfianni inissiamik attartortitsisinnaaneranut atatillugu isigineqassaaq. Aalajangersagaq aamma ilinniartut ineqarfiinik aqutsisoqarfiup allamut atortitaanut ilinniartup inissiamut akiliinissaata naammaginaruunnginneranut oqariartuutaavoq.

Imm. 3-mut

Aalajangersagaq nutaajuvoq aamma sulinermi unamminartoq saaffigalugu, tassaasoq ilinniartut ineqarfianni najugaqartup pigisaanik passussineq, tassunga ilanngullugu piffissami ilinniartut ineqarfianni najugaqartup imm. 1 malillugu inissiamik ilinniartut ineqarfiinik aqutsisoqarfimmut atugassiigallarneranut atatillugu pequtit. Tassunga atatillugu suleriaatsimik ullumikkut annertuumik pingaartumik ilinniartut ineqarfiini inissiami pequtilersugaanngitsunut naleqqiullugu atorneqartumik katersuineq pineqarluni. Tassani paasineqarpoq ilinniartut ineqarfianni inissiap assersuutigalugu pequtinik atortunillu atortulersorsimanginnera ilinniartup illoqarfimmi ilinniarfeqarfiusumi najugaqarnerani piffissami ilinniartut ineqarfianni inissiamiissinnaanera ajornarunnaarluni, taamaalillunilu ilinniartup peqanngikkallarnerani ilinniartut ineqarfianni najugaqartumit allamit atorneqarsinnaalluni.

§ 37-mut

Imm. 1-imut

Aalajangersagaq ilinniartut ineqarfii pillugit nalunaarummi atuuttumi § 35, imm. 1-imik issuaaneruvoq. Aalajangersagaq ilinniartitaanermi ilinniarnermik ingerlataqartumut ilinniartumut ilinniartut ineqarfianni inissiat taamaallaat atugassanngortinneqartarnissaat pillugu ilinniartut ineqarfii pillugit malittarisassani tunngaveqarnerannut naapertuuppoq. Inooqatigisat aappallu taamaalilluni inatsimmi tulleriarinermut ilaanngillat, tamannalu ilinniartut ineqarfiini inissat amigaataaneritut atatillugu isigineqassalluni.

Imm. 2-mut

Aalajangersagaq imm. 1-imut tapertaavoq, tassani takuneqarsinnaalluni inooqatigisaaq aappaasorluunniit tamanna pillugu nammineq qinnuteqartoqarnera tunuliaqutaralugu atuisinnaatitaanermik tiguisinnaasoq. Tamatumani tunngavigineqassaaq pineqartup nammineq aamma avataaneersuunera aamma ilinniartitaanermi tapiiffigineqartussaasumi ilinniarnermik ingerlataqartuunera.

§ 38-mut

Imm. 1-imut

Aalajangersagaq ilinniartut ineqarfii pillugit nalunaarummi atuuttumi § 36, imm. 1-imik issuaaneruvoq tassanilu pineqarluni ilinniartut ineqarfianni najugaqartup taamaatitsinera, tassunga ilanngullugu taamaatitsinissaq pillugu kalerriinermik tunniussineq. Peqatigisaanik aalajangersakkamut ilaavoq ilinniartut ineqarfianni najugaqartumut iluaqutaasumik

attartornermi isumaqatigiisummi sivikinnerusumik kalerriinissamik aalajangersaasinnaaneq. Tassunga atatillugu ilinniartut ineqarfianni najugaqartoq attartornermiit sukkanerusumik anisinnaavoq, ilinniartut ineqarfianni najugaqartoq ilinniartut ineqarfianni inissiamik atugaqarnissamut tassangaannartumik pisariaqartitsiunnaarpat.

Taamaatitsinissamut periarfissaq taamaallaat ilinniartut ineqarfianni najugaqartumut tunngasuvoq assersuutigalugulu ilaqqat ilaasuunatik, aamma ilinniartut ineqarfianni najugaqartup taamaatitsinissamut periarfissaa atuutissalluni, ilinniartut ineqarfianni inissiaq assersuutigalugu ilinniartut ineqarfianni najugaqartumut taassumalu inooqatigisaanut aappaanulluunniit ataatsimut inissiaagaluarpuunniit.

Taamaatitsinerup allanneqarsimanissaa pillugu piunarsaqatip assingaa taamaatitsineq aamma elektroniskimik nassiunneqarsinnaasoq.

Imm. 2-mut

Aalajangersagaq ilinniartut ineqarfii pillugit nalunaarummi atuuttumi § 36, imm. 2, oqaaseqatigiinnik siullernik issuaaneruvoq. Aalajangersakkap kingunerisaanik piffissap taamaatitsinissamut kalerriinerup naanissaata tungaanut ilinniartut ineqarfiani inissiamut atassuteqartunik aningaasartuutit ilinniartut ineqarfiani najugaqartoq akiliissaaq, tak. imm. 1.

Imm. 3-mut

Aalajangersagaq ilinniartut ineqarfiinut nalunaarummi atuuttumi § 36, imm. 2, oqaaseqatigiit aappaannik aamma pingajuannik issuaaneruvoq aamma imm. 2-mi allaaserineqartunut attuumassuteqarluni. Tamatumani pineqarpoq pisoq ilinniartut ineqarfianni najugaqartup piffissaq isumaqatigiisutaasoq sioqqullugu nuulluni aniffigisaa.

Ilinniartut ineqarfianni inissiap inueruttup sapinngisamik sukkanerpaamik attartorteqqinneratigut ilinniartut ineqarfianni najugaqartup aningaasartuutaanik killeqartitsiniarnissamut ilinniartut ineqarfiinik aqutsisoqarfik aalajangersagakkut pisussaatinneqarpoq. Ineqarnermut akiliut, piffissami taamaatitsinissamik ilimasaarinerup naanissaa sioqqullugu attartortitseqqinnikkut attartornikkut ilinniartut ineqarfiinik aqutsisoqarfiup isertitaa ilinniartut ineqarfianni najugaqartumut nuuttumut ilinniartut ineqarfiinik aqutsisoqarfiup piunarsaqataanit ilanngaatinneqassapput.

Ilinniartut ineqarfianni najugaqartoq assersuutigalugu qularnaveeqqusiinermi qaammammut ataatsimut ineqarnermut akiliummik akiliisimappat ilinniartut ineqarfianni najugaqartup qularnaveeqqusiisimanini utertissavai, pineqartup qularnaveeqqusiinerata matussusersimasassaani qaammammi ilinniartut ineqarfianni najugaqartup nuunnerata kinguninnguatigut inissiaq ilinniartut ineqarfiinik aqutsisoqarfimmit attartorteqqinneqarpat. Tamannali qularnaveeqqutit taakku aningaasartuutit allat matussusernissaannut atorineqanngippata tamanna aatsaat atuutissaaq, tak. § 46, imm. 2.

Aalajangersakkap aamma assingaa suliami pisunik aalajangersimasumik naliliinerup kingorna ilinniartut ineqarfiinik aqutsisoqarfiup piffissami taamaatitsiffiusumi inissiamik attartortitseqqittussaasimagaluarpat, kisiannili taamaaliorsimanani, iliniartut ineqarfianni najugaqartoq nuuttoq taamaaqataanik ilinniartut ineqarfiinik aqutsisoqarfimmiit aningaasartuutini taarsertissavai.

§ 39-mut

Aalajangersagaq ilinniartut ineqarfii pillugit nalunaarummi atuuttumi § 37-mik annertunerusumik ingerlatitseqqinneruvoq tassanilu pineqarluni ilinniartut ineqarfianni inissiap pissusaa pissutigalugu attartormik isumaqatigiisummik ilinniartut ineqarfianni najugaqartup atorunnaarsitsisinaanera. Aalajangersagaq assersuutigalugu ilinniartut ineqarfianni inissiaq ipertuppat imaluunniit teknikikkut ikkussukkat atorsinnaangippata atorneqarsinnaassaaq.

Peqatigisaanik amigaatit annertuujususaaneriniq piumasaqaateqartoqarpoq, tamannalu aalajangersimasumik nalilerneqassalluni, pingaartumik amigaatit ilinniartut ineqarfianni inissiamik ilinniartut ineqarfianni najugaqartup atuinissaanik qanoq annertutigisumik ajorseriarnera pillugu apeqqut aallaavigalugu.

Aammattaaq aalajangersakkamit takuneqarsinnaavoq atorunnaarsitsinissamut pisinnaatitaaffiup atorneqarnissaanut tunngaviussammat amigaatit ilinniartut ineqarfianni najugaqartumit uparuarneqarneranniit ingerlaannartumik ilinniartut ineqarfiinik aqutsisoqarfiup iluarsiiinarsimanginnera. Tassani aamma pineqarsinnaavoq piffissap naammaginarup iluani iluarsiiisoqarsinnaanginneranik ilinniartut ineqarfiinik aqutsisoqarfiup paasititsisimanera.

§ 40-mut

Imm. 1-imut

Aalajangersagaq ilinniartut ineqarfii pillugit nalunaarummi atuuttumi § 38, imm. 1-imik issuaaneruvoq. Taamaattorli ilanngunneqarluni ilinniartut ineqarfiinik aqutsisoqarfik aamma ilinniartut ineqarfianni inissiamik najugaqarnissamut ilinniartut ineqarfianni najugaqartoq piumasaqaatinik naammassinnikkunnaarpat ilinniartut ineqarfianni najugaqartup taamaatinnaanut pisussaaffeqarpoq. Tamanna isumaqarpoq ilinniartut ineqarfiinik aqutsisoqarfiup ilinniartut ineqarfianni najugaqartoq taamaatissinnaagaa, ilinniartut ineqarfianni najugaqartoq assersuutigalugu arlaatigut illoqarfimmi ilinniarfeqarfiusumi inissiamik oqartussaaffeqalerpat, tassunga ilanngullugu sulisunut inissiaq.

Aalajangersakkap ilinniartut ineqarfiinik aqutsisoqarfiup pisussaaffiata oqaasertalerneqanngitissamut pissutaavoq ilinniartut ineqarfiini inissianik amigaateqarneq. Ilinniartut ineqarfianni

najugaqartup assersuutigalugu ilinniarneq naammassisimappagu imaluunniit kipitissimappagu allatigulluunniit ilinniartut ineqarfianni inissiamik najugaqarnissamut piunasaqaatinik naammassinnikkunnaarpat tamatuma assingaa ilinniartut ilinniarnermik ingerlataqartuusut allat, ilinniartut ineqarfianni inissiamik tunineqarnissamut piunasaqaatinik naammassinnittut, ilinniartut ineqarfiini inissiat amigaataanerisa malitsigisaanik ilinniarnertik taamaatiinnartariaqarlugu.

Ilinniartut ineqarfianni najugaqartut ilinniartut ineqarfiini inissianik najugaqarnissamut piunasaqaatinik naammassinninnerinik ataavartumik ilinniartut ineqarfiinik aqutsisoqarfik qulakkeerinnissamut taamaattumik pisussaaffeqarpoq.

Aalajangersakkami oqaaseqatigiit kingulliit, ilinniartut ineqarfiinut nalunaarummi atuuttumi § 38, imm. 1, oqaaseqatigiit aappaannik issuaanerusoq, tassaavoq ilinniarnermik ingerlataqartuunnginnermut suup ilaasinnaaneranik erseqqissaaneq, tassanilu aamma ilinniartitaanermiit unikkallarnertit assigiinngitsut aamma ilaallutik.

Imm. 2-mut

Aalajangersagaq ilinniartut ineqarfii pillugit nalunaarummi atuuttumi § 38, imm. 2-mik issuaanerusoq tassanilu pineqarluni ilinniartut ineqarfianni najugaqartup ilinniartut ineqarfianni inissiamik kingusinnerpaamik qaqugu qimatsisimanissaa pillugu apeqqut. Ullut kingulliit qulit taamanikkut piffissap taaneqartup iluani illoqarfimmiit ilinniarfeqarfiusumiit ilinniarnernup aallartinnissaa sioqqullugu najugaqarfiusumut aalajangersimasumut angalanissaanut naleqqiullugu tulluurtumik aallariartornissap qulakkeerneqarsinnaaneramik naliliineq aallaavigalugu aalajangersarneqarpoq.

Imm. 3-mut

Aalajangersakkami pineqarpoq ilinniarfeqarfiup ilinniartut ineqarfianni najugaqartumik ilinniartitaanermiit anisitsinera, assersuutigalugu ilinniarnermik ingerlataqannginneq imaluunniit pissusissanik malinninnginneq tunuliaqutigalugu, ilinniartullu ilinniarfeqarfiup aalajangiinera allaffissornikkut oqartussanut allanut naammagittaalliuutigalugu. Pisuni taamatut ittuni imm. 3 naapertorlugu ilinniartut ineqarfianni najugaqartoq sulii ilinniartut ineqarfianni inissiami najugaqarsinnaassaaq, anisitsineq pillugu inaarutaasumik allaffissornikkut qaffasinnerusumik oqartussaasut aalajangiinissaasa tungaannut. Aalajangersagaq allaffissornikkut qaffasinnerusumik oqartussanut naleqqiullugu taamaallaat atorneqarsinnaavoq, pisunili anisitsineq eqqartuussivinnut suliaassanngortinneqarneraniunngitsaq.

§ 41-mut

Imm. 1-imut

Aalajangersagaq annertuutigut ilinniartut ineqarfii pillugit nalunaarummi atuuttumi § 49, imm. 1-imut naapertuuppoq tassanilu pineqarluni ilinniartut ineqarfiinut aqutsisoqarfiup

ilinniartut ineqarfianni najugaqartumik taamaatitsinissaa, aalajangersakkamut innersuunneqartunik malittarisassanik imaluunniit ilinniartut najugaqarfianut atuuttunik malittarisassanik ilinniartut ineqarfianni najugaqartoq unioqqutitsippat.

§ 40-p paarlattuanik aalajangersakkami innersuunneqartunik malittarisassanik ilinniartut ineqarfianni najugaqartoq unioqqutitsippat taamaatitsinissamut pisussaaffeqarnani. Tamanna § 41-p atorneratigut ilinniartut ineqarfianni najugaqartoq tunngaviatigut ilinniartut ineqarfianni inissiamik atuisinnaanermut tunngaviumik piumasaqaatinik suli naammassinninneranut atatillugu isigineqassaaq, paarlattuanillu § 40-mi pineqartut pisut, assersuutigalugu ilinniarnermik ingerlataqartuuneq atorunnaarsimasinnaalluni.

Aammattaq maluginiarneqassaaq ilinniartut ineqarfiinik aqutsisoqarfik nalinginnaasumik ingerlatsinikkut inatsisini malittarisassanik tunngaviumunillu malinnittussaammat, tassunga ilanngullugu sulianik suliarinninnermut atatillugu atsikkutigiissaartumik suliarinnittarneq pillugu tunngaviup isiginiarneqarnissaa pillugu piumasaqaat. Tassunga ilaapput ilinniartut ineqarfiinik aqutsisoqarfik aalajangersagaq tunngavigalugu pisinnaatitaaffinnik ingerlataqarnermut atatillugu aamma assersuutigalugu nalilersussammagu taamaatitsinissamut tunngavigineqartumi malittarisassamik unioqqutitsineq aamma pingaaruteqarnerseq, imaluunniit anniksumik sumiginnaaneq taamaallaat pineqarnerseq, assuarliuteqarnekut isumagineqarsinnaasoq.

Ilinniartut ineqarfiinut nalunaarummit atuuttumit takuneqarsinnaavoq ilinniartut ineqarfiinik aqutsisoqarfik nr. 3 malillugu ilinniartut ineqarfianni najugaqartumik taamaallaat taamaatitsinnaasoq, tamanna sioqqullugu allakkatigut marloriarluni mianersoqqusisoqarsimappat, ilinniartullu ineqarfiinik aqutsisoqarfik aalajangersakkami nr. 1-ip imaluunniit 2-p atorneratigut sioqqutsumik mianersoqqusisussaanani.

Tamanna maannakkut allanngortinneqarpoq iliniartut ineqarfiinik aqutsisoqarfiup aalajangersakkamik taamaatitsinissamut periarfissat taaneqartut arlaannik atuisinnaanani siumoortumik ataasiarluni allakkatigut mianersoqqusisimanngikkuni.

Pissusaanut naleqqiullugu unioqqutitsinerit ataasiakkaat pissussaaffinnut innersuussisussoqassaaq aalajangersakkami allanneqartunut.

Aalajangersakkami nr. 3 sukannersumik pisoqartillugu, tassunga ilanngullugu malittarisassanik immikkut ittumik ingasattumik unioqqutitsineq, § 42 imaluunniit § 43 malillugu suliamik suliarinninnissaaq pisariaqalersinnaasoq maluginiarneqassaaq, taanna malillugu ilinniartut ineqarfiinik aqutsisoqarfiup ilinniartut ineqarfianni najugaqartup taamaatinnaasanut taarsiullugu attartornermik isumaqatigiisummik atorunnaarsitsisinnaalluni.

Imm. 2-mut

Aalajangersagaq ilinniartut ineqarfii pillugit nalunaarummi atuuttumi § 40, imm. 1-imik ilaatigut ingerlatitseqqiineruvoq. Taamaatitsinerup allagaasimanissaa pillugu piunasaqaammut siullermik pissutaavoq inatsisitigut isumannaatsuunissamik isiginiakkat aamma suliami uppersaatissat eqqarsaatigineqarneri, tassunga ilanngullugu suliap ineriartornera pillugu nalornissutaasinnaasut pinngitsoortinnissaasa eqqarsaatigineqarneri. Tamanna pingaartumik taamaatitsinerup naammagittaalliutigineqarsinnaaneranut atatillugu pingaarpoq.

§ 42-mut

Aalajangersagaq ilinniartut ineqarfii pillugit nalunaarummi atuuttumi § 41, imm. 1-imik ilaatigut ingerlatitseqqiineruvoq tassanilu pineqarluni ilinniartut ineqarfiinik aqutsisoqarfiup ilinniartut ineqarfianni najugaqartumik attartorneq pillugu isumaqatigiisummik atorunnaarsitsisinnaanera. Tassani taamaatitsinerup paarlattuanik paasineqarpoq, taamaatitsinissamut kalerriineq ilaalluni, ilinniartut ineqarfiinik aqutsisoqarfiup attartorneq pillugu isumaqatigiisummik atorunnaarsitsineq pillugu ilinniartut ineqarfianni najugaqartumut nalunaaruteqarnerata piffissami kinguinngua attartorneq atorunnaarluni.

§ 42-imi allanneqartut unioqqutitsinerit erseqqinnerusumik misissorniarlugit pisussaaffinni pissutsinut aalajangersakkanut nassuiaatinut innersuussisoqassaaq.

Ilinniartut ineqarfii pillugit nalunaarummi aalajangersagaq imm. 2-mik ilassuteqarpoq, tassannga takuneqarsinnaalluni ilinniartut ineqarfianni najugaqartup sumiginnaanera annertuppat aalajangersagaq naapertorlugu attartornermik isumaqatigiisummik ilinniartut ineqarfiinik aqutsisoqarfik taamaallaat atorunnaarsitsisinnaasoq. Tamanna aalajangersakkami nutaami ilanngunneqanngilaq, tassa pissutsit allattorneqartut pissusaat malillugit annertuumik sumiginnaanertut aallaaviatigut isigineqartariaqarmata.

Aammattaaq aalajangersakkami tassani oqaaseqatigiit aappaannit takuneqarsinnaalluni pissutsit iluarsineqarnissaannut allakkatigut ilinniartut ineqarfianni najugaqartoq ilinniartut ineqarfiinik aqutsisoqarfimmit peqquneqartinnagu iliniartut ineqarfiinik aqutsisoqarfik attartornermik isumaqatigiisummik aamma atorunnaarsitsisinnaangitsoq, tamannalu aamma atuulluni pissutsit iluarsineqarsimappata, iliniartut ineqarfiinik aqutsisoqarfiup attartornermik isumaqatigiisummik atorunnaarsitsinissaa sioqqullugu. Tamanna aalajangersakkamik nutaamik oqaasertaliinermi ilanngunneqanngilaq, tassa aalajangersagaq pisariaqanngitsutut isigineqarmat, ilinniartut ineqarfiinik aqutsisoqarfik nalinginnaasumik ingerlatsivinni inatsisini malittarisassanik malinnittussaammat, tak. § 41-mut tamanna pillugu nassuiaammi allanneqartut.

Tassunga ilanngutissaaq aalajangersakkap atorneqarnera taamaattumik aamma sulianik suliarinnittarneq pillugu inatsimmi malittarisassat isiginiarlugit pisussaammat, tassunga ilanngullugit tunngavilersuineq, peqataasunik tusarniaaneq aamma naammagittaalliornissamut

ilitsersuussineq pillugit. Allatut oqaatigalugu naleqqiussineq pillugu tunngaviup isiginiarneqarnerata saniatigut aamma peqataasunik tusarniaasoqassasoq, aalajangersagaq naapertorlugu attartormik isumaqatigiisummik atorunnaarsitsinissamik ilinniartut ineqarfiinik aqutsisoqarfiup alloriarsinnaanera sioqqullugu.

Nr. 7-imi unioqutitsineq qanoq ingasatsigineranik apeqqummut naleqqiullugu unioqutitsinerup qanoq ittuuneranik aalajangersimasumik naliliineq aallaavigineqassaaq, tassunga ilanngullugu siusinnerusukkut assingusumik malittarisassanik unioqutitsisoqarsimanersoq, tassunga ilanngullugu pissuseq siusinnerusukkut uparuarneqarsimanersoq.

§ 43-mut

Imm. 1-imut

Aalajangersakkap ilinniartut ineqarfii pillugit nalunaarummi atuuttumi § 42, imm. 1-i assigilluinnarpaa tassanilu pineqarlutik pissutsit attartormik isumaqatigiisummik ingerlaannartumik atorunnaarsitsinermik tunngaviusinnaasut.

Ingerlaannartumik sunniuteqartumik atorunnaarsitsinermi peersitsineq pineqassaaq, § 42 malillugu atorunnaarsitsinermisut pinnani inissiap qimanneqarnissaanut ullualuinnarnik periarfissiisoqarluni.

Tassani pineqarput pissutsit, pissusai malillugit avatangiisinut navianartorsiortitsisut, tassunga ilanngullugit iliniartut ineqarfianni najugaqartut allat kiisalu ilinniartut ineqarfianni sulisut. Ingerlaannartumik sunniuteqartumik attartormik isumaqatigiisummik atorunnaarsitsinissamat pisinnaatitaaneq taamaalilluni piviusumik pisinnaasutigullu ajoqusiinerit sunniutaasut pissutsit ilaatinneqarput. Peqatigisaanik ilinniartut ineqarfianni suup qummut killiuneranut oqariartuutaalluni.

Imm. 2-mut

Aalajangersagaq ilinniartut ineqarfii pillugit nalunaarummi atuuttumi § 42, imm. 2-mik issuaaneruvoq aamma iliuitsinut pissutsinullu inunnit ilinniartut ineqarfianni najugaqartup ilinniartut ineqarfiannut isertitaanit pisunut ilinniartut ineqarfianni najugaqartup akisussaanageranut oqariartuutaalluni.

Aalajangersakkami assersuutigalugu ilinniartut ineqarfianni najugaqartup pulaartui aamma ilaallutik ilinniartut ineqarfianni malittarisassanik eqqortitsinissamat pissusaaffeqarnerat pillugit § 26-mut naleqqiullugu eqqarsaatigisassat atuuttuusut tunngavilersuutigineqarput. Tamanna isumaqarpoq ilinniartut ineqarfianni najugaqartumut pulaartut ilinniartut ineqarfianniinnerat ilinniartut ineqarfianni najugaqartumit akisussaaffigineqartut. Ilinniartut ineqarfianni najugaqartumut pulaartoq assersuutigalugu ilinniartut ineqarfianni najugaqartumut allanut imaluunniit sulisunut persuttaappat taava ilinniartut ineqarfianni najugaqartoq pulaartumi pissusilersuutaanut akisussaatinneqassaaq.

Peqatigisaanik oqaatigineqassaaq attartornermik isumaqatigiisummik ingerlaannartumik atorunnaarsitsineq tassaammat ingerlatsivimmi inatsisitigut aalajangiineq, taamaattumik ilinniartut ineqarfiinik aqutsisoqarfik pisuni taakkunani aamma nalinginnaasumik ingerlatsivinni inatsisitigut malittarisassat kiisalu sulianik suliarinninnermi inatsimmi malittarisassanik isiginiartussalluni.

§ 44-mut

Imm. 1-imut

Aalajangersagaq ilinniartut ineqarfii pillugit nalunaarummi atuuttumi § 43, imm. 1, oqaaseqatigiinnik siullernik ilaatigut naapertuuppoq, tassa oqaaseqatigiit siulliit assigimmagit.

2. Ilinniartut ineqarfianni najugaqartup sumiginnaanerup malitsigisaanik, tassunga ilanngullugu ilinniartut ineqarfianni inissiami ilinniartut ineqarfianni najugaqartup anisitaanerani aningaasartuutit, annaasanut sunulluunniit taarsiinissaa pillugu nalunaarummi atuuttumi immikkoortoq imm. 3-mut nutaanut nuunneqarpoq, tak. ataaniittoq.

Aammattaaq februar 2015-imi ilinniartut ineqarfii pillugit ataatsimiinnermi tamanna pillugu siunnersuut tunuliaqutaralugu oqaaseqatigiit pingajuannik nutaamik ikkussisoqarpoq, oqaaseqatigiinni siullermi malittarisassamut tunngatillugu oqilisaassinerusoq. Malittarisassaq nutaaq isumaqarpoq ilinniartut ineqarfiinik aqutsisoqarfik aalajangersimasumik naliliinerup kingorna nuunnissaa eqqarsaatigalugu anisitsineq ullut tallimat tikillugit kinguartitsisinnaasoq. Ilinniartut ineqarfiinik aqutsisoqarfik taamaalilluni suliami pisut aalajangersimasut aallaavigalugit aalajangersagaq naapertorlugu aalajangiisinnaavoq, tassunga ilanngullugu navianartup nalilersorneratigut ilinniartut ineqarfianni najugaqartoq suli ullualunnit najugaqartissinnaallugu, assersuutigalugu allap illusimatinnissaannut periarfissaq pillugu apeqqut kiisalu timmisartup imaluunniit umiarsuup tullianik qaqugu aallarsinnaanersoq pillugu apeqqut il.il. ataqatigiissillugit.

Imm. 2-mut

Aalajangersagaq nutaajuvoq aamma imm. 1, oqaaseqatigiit aappaanni oqilisaassinermut atatillugu isigineqassalluni.

Aalajangersakkap kinguneraa atorunnaarsitsinissamut tunngavigineqartoq ikiaroorartumik toqqortaqaqarnermik imaluunniit persuttaanermik imaluunniit tamanna pillugu siorasaarinermik tunngaveqarpat, taava ilinniartut ineqarfiinik aqutsisoqarfiup taamaattoq piumasarisinnaavaa ilinniartut ineqarfianni najugaqartoq sumiginnaasoq ingerlaannartumik sunniuteqartumik ilinniartut ineqarfiannik qimatsissasoq. Atorunnaarsitsinissamut tunngavigineqartut pissutsit taaneqartut ilinniartut ineqarfianni najugaqartut allat eqqarsaatigalugit immikkut sumiginnaanertut isigineqarput, tassunga ilanngullugu assersuutigalugu ilinniartut ineqarfianni najugaqartut allat persuttaaffigineqartut imaluunniit siorasaarneqartut

eqqarsaatigalugit aamma ilinniartut ineqarfianni najugaqartut ukiukinnerusut eqqarsaatigalugit.

Imm. 3-mut

Soorlu imm. 1-imut nassuiaatini allanneqartoq ilinniartut ineqarfii pillugit nalunaarummi atuuttumi § 43, imm. 1, oqaaseqatigiit aappaannik issuaaneq pineqarpoq.

Ilinniartut ineqarfianni najugaqartup sumiginnakkanik pilersitseqqinnissamut pisussaaffimmik aalajangersagaq pilersitsivoq. Aningaasartuutunut ilaasinnaapput assersuutigalugu pequtit aserorsimasut aamma ilinniartut ineqarfianni najugaqartup pigisaanik nuutsinermi aningaasartuutit. Malittarisassaq aamma nalinginnaasumik taarsiinissamut malittarisassanik malinnittuusooq naatsorsuutigineqarpoq, taamaattorli apeqqutit pillugu nalornissuteqarsinnaanerit pinngitsoortinnissaat siunertaralugu ilanngunneqarsimalluni.

Imm. 4-mut

Ilinniartut ineqarfianni inissiap inueruttup sapinngisamik sukkanerpaamik attartorteqqinneratigut ilinniartut ineqarfianni najugaqartup aningaasartuutaanik killeqartitsiniarnissamut ilinniartut ineqarfiinik aqutsisoqarfik aalajangersagakkut pisussaatinneqarpoq. Ineqarnermut akiliut, piffissami taamaatitsinissamik ilimasaarinerup naanissaa sioqqullugu attartortitseqqinnikkut attartornikkut ilinniartut ineqarfiinik aqutsisoqarfiup isertitaa ilinniartut ineqarfianni najugaqartumut nuuttumut ilinniartut ineqarfiinik aqutsisoqarfiup piumasaqaataanit ilanngaatineqassapput.

§ 45-mut

Imm. 1-imut

Aalajangersagaq ilinniartut ineqarfii pillugit nalunaarummi atuuttumi § 42, imm. 1-imik ingerlatitseqqinneruvoq.

Aalajangersakkamit takuneqarsinnaavoq illusimatitsineq eqqarsaatigalugu ilinniartut ineqarfiinik aqutsisoqarfiup pisussaaffii taamaatitsinermi atorunnaarsitsinermilu tamarmik atorunnaartartut.

Imm. 2-mut

Aalajangersagaq ilinniartut ineqarfii pillugit nalunaarummi atuuttumi § 45, imm. 2-mut naleqqiullugu annertuumik allanngortinneqarpoq.

Aalajangersagaq maannakkut imatut allanngortinneqarpoq ikiaroorartut imaluunniit persuttaaneq pineqartillugit sumiginnaaneq pissutigalugit atorunnaarsitsinermut naleqqiullugu peqataaqqusinnngikkallarnejq taamaallaat atorneqarsinnaalluni.

Tassani pineqarput pissutsit immikkut navianaateqartut, aamma ilinniartut ineqarfianni najugaqartunut allanut ulorianartorsiortitsisinnaasut, tassunga ilanngullugit assersuutigalugu ilinniartut ineqarfianni najugaqartut allat persuttaaffigineqartut imaluunniit siorasaarneqartut eqqarsaatigalugit.

Tassunga atatillugu ilaatitsiunnaarnermi ilinniartut ineqarfiat assersuutigalugu ikiaroorartut imaluunniit persuttaaneq pillugit malittarisassanik unioqqutitsiffiusoq kisimi pineqanngilaq, kisianni aamma ilinniartut ineqarfii allat.

Aammattaaq ilaatitsiunnaarnermut piffissatigut ukiumik ataatsimik qummut killiliisoqarluni. Tamanna nalunaarummi atuuttumi aalajangersakkap assinganut atatinneqassaaq, tassani ilaatitsiunnaarnek ilinniartut ineqarfianni najugaqartup ilinniartut ineqarfiinik aqutsisoqarfimmik isumannaagassami inissinneqarnissaasa tungaanut piffissamut tunngaviatigut ingerlaannassalluni. Tassunga ilanngutissaaq malittarisassat atuuttut malillugit ilaatitsiunnaarnissamut pisinnaatitaaneq atorunnaarsitsinermi tunngaviliisunut sumiginnaanernut sunulluunniit tunngaviatigut atorneqarsinnaammat.

§ 46-mut

Imm. 1-imut

Aalajangersagaq ilinniartut ineqarfii pillugit nalunaarummi atuuttumi § 46, imm. 1-imik ingerlatitseqqinneruvoq tassanilu pineqarluni ilinniartut ineqarfianni inissiaq qanoq ittuutillugu ilinniartut ineqarfiinik aqutsisoqarfimmut tunniunneqarnissaa pillugu apeqquut.

Apeqquutip akineqarnera § 20, imm. 2-mik aallaaveqartariaqarpoq, piffissami iserternermi ilinniartut ineqarfianni inissiaq qanoq pitsaassuseqassanersoq tassani allanneqarmat. § 20, imm. 2-mi pissutsit taaneqartut taamaalillutik piffissami tunniussinermi pissutsinik nalilersuinermit malittarisassat atorneqarsinnaapput. Tamatuminnga nalilersuinermit nungullariartormermik pisoqalerneranillu tunngaveqartut nalinginnaasumik ajorseriarnerit aamma ilanngaatigineqartariaqarput, aamma ilinniartut ineqarfianni najugaqartup aserfallatsaaliinissamut pisussaaffianut ilaanatik. Tassunga ilanngutissapput amigaataasinnaasut ilinniartut ineqarfianni najugaqartumit iluarsineqartussaasut.

Imm. 2-mut

Aalajangersagaq suliareqqinneqarluni ilinniartut ineqarfii pillugit nalunaarummi atuuttumi § 46, imm. 4-mik ingerlatitseqqiineruvoq.

Ilinniartut ineqarfiinik aqutsisoqarfik ilinniartut ineqarfianni najugaqartup nuunneranut atatillugu iserternermisullu ilinniartut ineqarfianni inissiap pissuseqalersinnissaanut qularnaveeqqutinik atuisinnaavoq, tak. imm. 1, aamma attartormermut isumaqatigiissummut atatillugu ilinniartut ineqarfianni najugaqartumut ilinniartut ineqarfiinik aqutsisoqarfiup aningaasatigut piumasaqaatigisinnaasaanut tamanut matussutissatut.

§ 47-mut

Imm. 1-imut

Aalajangersagaq ilinniartut ineqarfii pillugit nalunaarummi atuuttumi § 47, imm. 3-mik ilaatigut ingerlatitseqqiineruvoq tassanilu pineqarluni ilinniartut ineqarfianni najugaqartup nuunneranut atatillugu misissuinermi nalunaarusiornissaq.

Tassunga tunngatillugu oqaatigineqassaaq ilinniartut ineqarfiinik aqutsisoqarfiup aamma ilinniartut ineqarfianni najugaqartup akornanni ataatsimoorluni misissuinissaq pillugu aalajangersagaq peerneqarmat, tassa ataatsimoorluni misissuineq piviusumik ingerlanneqarneq ajormat. Tamatumunnga pissutaavoq ilinniartup amerlanertigut ilinniarterup naammassinerata kinguninngua ilinniartut ineqarfianni inigisaminik qimatsisarnera.

Misissuinissamut nalunaarummi siunertaq tassaavoq ilinniartut ineqarfianni inissiap pissusaa pillugu paasisaqarnissaq, tassunga ilanngullugu amigaataasinnaasut aalajangerneri. immikkoortoq ilinniartut ineqarfii pillugit nalunaarummi atuuttumi § 47, imm. 3, immikkoortut tallimaannut naapertuuppoq tassanilu allanneqarluni ilinniartut ineqarfianni najugaqartup akiligassaanik ilinniartut ineqarfianni inissiami suliaqartoqassasoq misissuinermi nalunaarusiami ilinniartut ineqarfiinik aqutsisoqarfiup inerniliinera tunngavigalugu ilinniartut ineqarfiinik aqutsisoqarfiup iliuseqarnissamut pisussaaffia. Pissutsit suliassat pineqartumut tunngasut misissuinermi nalunaarusiamit takuneqarsinnaanngippata tassunga aningaasartuutit ilinniartut ineqarfianni najugaqartumut ilinniartut ineqarfiinik aqutsisoqarfimmit akileqquneqarsinnaanngillat.

Imm. 2-mut

Aalajangersagaq ilinniartut ineqarfii pillugit nalunaarummi atuuttumi § 47, imm. 4-mut naapertuuppoq tassanilu pineqarluni uppersaateqarnissaq, ilinniartut ineqarfianni inissiami amigaatit paarsinerlunnerilluunniit patsigineqartut ilinniartut ineqarfiinik aqutsisoqarfimmut saqqummiunneqartussat. Tassunga oqaatigineqassaaq uppersaaneanerup inuit ataatsimik amerlanerusut peqataanerisigut tamatigut pisarnissaa pillugu nalunaarummi atuuttumi piunasaqaat ilanngunneqanngimmat. Tamanna assersuutigalugu pisortanut ingerlatsitatut ilaasutut inaassusersiunnginnermut, inatsisinut naapertuunnermut, ilumoortuunnermut aamma assersuutigalugu suliamut attuumassuteqarnermut naleqqiullugu immikkut akisussaaffeqarneq ilinniartut ineqarfiinik aqutsisoqarfik pisussaaffeqarmat, tamatuminngalu saneqqussineq suliffimmi akisussaannermik kinguneqarsinnaammat.

Imm. 3-mut

Misissuinermi nalunaarusiaq ilinniartut ineqarfianni najugaqartumut nuuttumut nassiunneqanngippat ilinniartut ineqarfianni najugaqartumut piunasaqaateqarnermut tunngavittut atorneqarsinnaanngilaq.

Ilinniartut ineqarfianni najugaqartup oqaaseqaatai, tak. aalajangersakkamik oqaaseqatigiit aappaat suliap sapinngisamik annerpaamik erseqqissaasoqarnissaanik kissaateqarnermik tunngaveqarpoq.

§ 48-mut

Aalajangersagaq suliareqqinneqarluni ilinniartut ineqarfii pilugit nalunaarummi atuuttumi § 48, imm. 1-imik ingerlatitseqqiineruvoq tassanilu pineqarluni misissuinermi nalunaarusiamut oqaaseqaatinik nassiussinnginnermut naleqqiullugu ilinniartut ineqarfianni najugaqartumit nuuttumiit kinguniusinnaasut. Tamanna pisuni taamatut ittuni ilinniartut ineqarfianni najugaqartup misissuinermi nalunaarusiamut akerliliiumannginneranik naatsorsuutigisaqarnermik tunngaveqarpoq.

§ 49-mut

Aalajangersakkap ilinniartut ineqarfii pillugit nalunaarummi atuuttumi § 49 assigilluinnarpa.

Aalajangersagaq sulianik peqquteqartumik tunngaveqarpoq, ilaatigut ilinniartut ineqarfianni inissiamut qimanneqartumut naleqqiullugu pissutsinik piumasagaatini nassiussisinnaaneq, pigisat qimanneqarsimasut nassiunneqarsinnaaneri il.il.

Tassani pineqarpoq torersuutitsinissamut aalajangersagaq pineqaatissiissutaasinnaanngitsoq, kisiannili ilinniartut ineqarfianni najugaqartup qimataanik pigisanik toqqortaqaarnissamut ilinniartut ineqarfiinik aqutsisoqarfiup qanoq sivisutigisumik pisussaaffeqarnera pillugu apeqqummut naleqqiullugu assersuutigalugu pingaaruteqarsinnaasoq, tak. § 50.

§ 50-imut

Imm. 1-imut

Aalajangersagaq nutaajuvoq aamma 2015-imi ilinniartut ineqarfii pillugit ataatsimiinnermi tamanna pillugu noqqaaneq tunuliaqutaralugu suliarineqarluni.

Aalajangersakkap kinguneraa ilinniartut ineqarfianni qimanneqartumi tamanna pillugu isumaqatigiissuteqarnani ilinniartut ineqarfianni najugaqartup qimataasa tammarnerinut imaluunnit aserornerinut naleqqiullugu ilinniartut ineqarfiinik aqutsisoqarfimmut ilinniartut ineqarfianni najugaqartoq nuuttoq piumasagaateqarsinnaanngitsoq.

Imm. 2-mut

Aalajangersagaq nutaajuvoq tassanilu allanneqarluni pigisanik qimatanik ilinniartut ineqarfiinik aqutsisoqarfiup peersinissaa sioqqullugu ilinniartut ineqarfiinik aqutsisoqarfiup

iliuseqarnissamut pisussaaffia, tamanna pisinnaalluni tunisinikkut, tassunga ilanngullugu akitsorterussineq imaluunnit igitsineq.

Aamattaaq aalajangersakkami oqaaseqatigiit aappaannit takuneqarsinnaalluni ilinniartut ineqarfianni najugaqartoq nuuttoq najugaqarfimmik ilisimatitsinngippat sapaatip akunneranik piffissaliineq atuutinngitsoq.

Imm. 3-mut

Aalajangersagaq nutaajuvoq aamma pigisat naleqarnerusut pineqartillugit piffissami sivisunerusumi toqqortaqsinnaaneq aalajangersarneqarluni, tamannalu pineqartup pigisaasa suuneri qanorlu pitsaatigineri aallaavigalugit aalajangersimasumik naliliisoqassalluni.

Imm. 4-mut

Ilinniartut ineqarfiinik aqutsisoqarfik pigisanik qimatanik iluanaaruteqarsinnaanngitsoq aalajangersakkami oqariartuutigineqarpoq, tassa tunisinermi iluanaarutaasinnaasut ilinniartut ineqarfianni najugaqartumut nuuttumut ilinniartut ineqarfiinik aqutsisoqarfiup piunasaqaatigisaanut naleqqiullugu atorneqassammata.

§ 51-imut

Imm. 1-imut

Aalajangersagaq suliareqqinneqarluni ilinniartut ineqarfii pillugit nalunaarummi § 50 imm. 1-imik ingerlatitseqqiineruvoq.

Malittarisassanut atuuttunut naleqqiullugu allannguinnermut pissutaavoq Namminersorlutik Oqartussani qitiusumik allaffissuarmut ilaasut immikkoortortat aamma assersuutigalugu Namminersorlutik Oqartussani naalackersuisoqarfiup akornanni allaffissornikkut qutsinnerusumut naammagittaalliortoqsinnaannginnera. Tamatuma kingunerisaanik aalajangiinerit, assersuutigalugu KAF-imit aalajangiiffigineqartut, Ilinniartitaanermut, Kultureqarnermut Ilageeqarnermullu Naalackersuisoqarfimmumut, ilinniartut ineqarfii pillugit akisussaasumut naammagittaalliutigineqarsinnaanngillat, tassa KAF-ip piginnaatitaanera naalackersuisoqarfimmi pineqartumi suliffiup iluani suliakkiissutaammat.

Imm. 2-mut

Tassani pineqarpoq ilinniartut ineqarfii pillugit nalunaarummi attuuttumi § 50, imm. 2-mik ilaannakuusumik ingerlatitseqqinneq.

Aalajangersakkami oqaaseqatigiinnit siullernit takuneqarsinnaavoq aalajangersakkani taaneqartut oqaaseqatigiinnut siullernut naleqqiullugu aalajangiiffigineqartut pillugit naammagittaalliutit kingunerissagaat allaffissornikkut inaarutaasumik aalajangiinerup pigineqalernissaata tungaanut ilinniartut ineqarfianni najugaqartoq ilinniartut ineqarfianni inissiami najugaqaannarsinnaasoq.

Taamaaqataanik § 43 malillugu aalajangiiffigineqartut attartornermik isumaqatigiisummik atorunnaarsitsineq pillugu aalajangiinernut naleqqiullugu aalajangersakkami oqaaseqatigiit aappaanut naleqqiullugu aallaaviatigut atuutissalluni, aalajangersimasumik naliliineq aallaavigalugu ilinniartut ineqarfiinik aqutsisoqarfik isumaqanngippat inaarutaasumik allaffissornikkut aalajangiinerup pigilernissaata tungaanut piffissami ilinniartut ineqarfianni najugaqartoq najugaqartariaqanngitsoq. Tamanna pingaartumik ikiaroorartunut imaluunniit persutaanernut imaluunniit siorasaarinernut tunngasuni suliani naleqqutissaaq, tak. aamma § 44, imm. 2-mi nassuiaatinut tamanna pillugu allanneqartut.

Imm. 3-mut

Aalajangersagaq nutaajuvoq aamma naammagittaalliorsinnaaneq pillugu malittarisassanik suli allanik nalunaarutikkut aalajangersaanermut atorneqarsinnaalluni, tassunga ilanngullugu naammagittaalliuuteqarsinnaanerup killeqartinnera.

Aalajangersagaq aamma Namminersorlutik Oqartussat avataanni immikkoortortamut tunngasuni naammagittaalliuuteqarsinnaanermik malittarisassaliornermut naleqqiullugu atorneqarsinnaavoq, § 8, imm. 3 naapertorlugu tamakkiisumik ilaannakuusumilluunniit ilinniartut ineqarfii pillugit malittarisassanik aqutsinermik tunniussiffiusimasunut.

Maalaarutit naleqquttumik suliarineqartarnissaannik qulakkeerinnitsisisinnaasunik maalaarutininik suliaqartarnerup naammaginartumik killilersornissaa maalaarutit pillugit malittarisassiornermi pingaartinneqassaaq.

§ 52-imut

Imm. 1-imut

Tassani pineqarpoq siunnersuutip piffissami atuutilerfissaa, aggustip aallaqqaataanni 2020-mi ukiup ilinniarfusup nutaap aallartinnerata missaani piffissamut aalajangersarneqartoq, taamaattoq tak. § 53.

Imm. 2-mut

Siunnersuutip atuutlernissaata kingunerisaanik peqatigisaanik malittarisassat atuuttut atorunnaarsinneqassapput. Inissianik attartorneq pillugu inatsisartut peqqussutaanni aalajangersakkap tunngavissiiisup atorunnaarsinneqarnera naatsorsuutigineqarpoq suliassaqarfimmi inatsisissap nalunaarutigineqarneranit takuneqarsinnaassasoq.

§ 53-imut

Imm. 1-imut

Soorlu nassuiaatini nalinginnaasuni aamma aalajangersakkanut eqqaaneqartunut nassuiaatini allanneqartoq naatsorsueriaatsinik kissaatigineqartunik pilersitsiniarluni sulineq pisariaqartoq naammassineqartinnagu aalajangersakkat atuutilernissaat naatsorsuutigineqarpoq.

Imm. 2-mut

Imm. 1-ip kingunerisaatut siunnersuutigineqarpoq ineqarnermut akiliutip aalajangersarnissaanut tunngasut malittarisassat atuuttut aningaasanut inatsimmi aalajangersarneqartassasut, §§ 15, 16, aamma 18-ip piffissami atuutilernissaata tungaanut.

Imm. 3-mut

Atuineq pillugu malittarisassaliorneq ineqarnermut akiliutip aalajangersarnissaanut tunngasuni apeqqummut atalluinnarpoq, taamaattumik pissutsit pillugit malittarisassaliorneq ataqatigiissarneqartariaqarluni, tassunga ilanngullugu piffissatigut.